



আট-আনা সংস্করণ গ্রন্থালয় পঞ্চদশাব্দ

দেওবান্দী

শ্রীরামকৃষ্ণ ভট্টাচার্য

আষাঢ়—১৩২৭।



শ্রীশ্রীগুরবে নমঃ

উৎসর্গ

যিনি স্বীয় অসামান্য প্রতিভাপ্রভাবে প্রাচ্যপ্রতীচ্য জ্ঞান-বিজ্ঞানের পরাকাষ্ঠা লাভ করিয়াছেন, এবং যাবজ্জীবন অধ্যবসায় সহকারে সেই জ্ঞানানুশীলনে কালান্তিপাত করিয়া দেশমাণ্ড ও বিদ্বদ্বরেণ্য বলিয়া গণ্য হইয়াছেন, যিনি পুত্র-নির্কিংশেযে শত-সহস্র শিক্ষার্থীদিগকে সম্মেহে জ্ঞানশিক্ষা দান করিয়া সকলের পরম ভক্তির আম্পদ হইয়াছেন ; যিনি ভবিষ্যদ্ বিঘাথিগণের সংশিক্ষার নিমিত্ত ইংরাজি বাঙ্গালা শব্দকোষাদি বিবিধ বহুমূল্য গ্রন্থরত্নাবলী প্রণয়ন করিয়াছেন, সেই আশ্রিতবৎসল কন্ম্ববীরাগ্রগণ্য পরম পূজ্যপাদ স্বর্গীয় **বেণীমাধব গঙ্গোপাধ্যায় মহাশয়ের** শ্রীচরণকমলোদ্দেশে আমার আন্তরিক ভক্তি ও কৃতজ্ঞতার চিহ্নস্বরূপ আমার এই ক্ষুদ্র পুস্তকখানি উৎসর্গীকৃত হইল। ইতি—

আহারবেলমা, বর্ধমান

১লা শ্রাবণ, ১৩২৭।

প্রণত

শ্রীরামকৃষ্ণ ভট্টাচার্য্য।

দেওসান্ধী

১

সদাশিব বন্দোপাধ্যায় নারায়ণপুরের ~~কীর্ত্তী~~ এক সময় শিরোরোগের জন্ম বার পরিবর্তনের বিশেষ আবশ্যক হওয়ায়, তিনি সপরিবারে তীর্থ-পর্যটনে যাত্রা করেন। সঙ্গে একমাত্র কন্যা মায়াদেবী ও পত্নী সরলা দেবী। একজন বর্দ্ধিষ্ণু জমীদারের বিদেশ যাত্রা করিতে হইলে, যত প্রকারের লোকজন সঙ্গে থাকা উচিত সে সবই তাঁহার সঙ্গে ছিল। ৩ বৈষ্ণোনাথধাম হইতে আরম্ভ করিয়া গয়া, কাশী, বিষ্ণাচল, প্রয়াগ, মথুরা, বৃন্দাবন, পুষ্কর, আজমীর, পরে কুরুক্ষেত্র, হরিদ্বার, কন্থল, জয়ীকেশ প্রভৃতি নানা তীর্থ ভ্রমণ করিয়া বৈশাখের শেষে রোগোপশমে মনের তৃপ্তিতে দেশে ফিরিবার ইচ্ছা করেন।

সেই সময় হঠাৎ একদিন সরলা দেবীর জ্বররোগের লক্ষণ দেখা দেয়। জয়ীকেশে চিকিৎসার কোনও সুবিধা না থাকায় রেল কোম্পানীকে প্রচুর অর্থ দিয়া একখানি গাড়ী রিজার্ভ করিয়া তিনি ৩ কাশীধামে যাত্রা করেন; কিন্তু সরলা দেবীর রোগের যাত্রা বৃদ্ধি হওয়ায় লক্ষ্মীএ নামিতে বাধ্য হন।

দৈব-বিড়ম্বনায় সদাশিববাবু লক্ষ্মী আসার আট দশ দিন পরেই সেখানে প্লেগের সূচনা হয়। পত্নীকে স্থানান্তরিত করিবার মত অবস্থা না থাকায়, মহামারী প্লেগের অতি ভীষণ সংহার-মূর্ছিত

দেখিতে-দেখিতে, সদাশিববাবু একদিন নিঃশব্দে দিকে চাহিয়া দেখিলেন,—শেষ শয্যায় অস্তিম্বাঙ্গী পত্নী সরলা দেবী অদ্রান্ত নিয়তির কঠোর আদেশে আসন্ন মৃত্যুর কবলে যাইতে বাধ্য হইয়াছেন ; তথাপি চির-আদরের সংসার, দেবোপম স্বামীর অগাধ ভালবাসা, আর স্নেহাধার একমাত্র শুশ্রূষারতা কণ্ঠা মায়াদেবীর অফুরন্ত মায়াকে ছাড়িবার ইচ্ছা আদৌ নাই, অথচ শত ইচ্ছা সত্ত্বেও থাকিবার কোন শক্তি নাই,—ইহ-পরজীবনের এমনই সন্ধিক্ষণে করুণা-কাহ্নর দৃষ্টিতে তাঁর চির-আরাধ্য স্বামীর পাদস্পর্শ করিয়া মায়াকে সংপাত্রে দান করিবার জন্ম শত অনুরোধে আবদ্ধ করিতেছেন ।

প্রকৃতির চিরন্তন প্রথাতে সৃষ্টির মধ্যে মৃত্যুই চির স্থির,—সত্য—ঋব । জীবমাত্রই একদিন, সে সত্যের পাশে আবদ্ধ হইতে—সেই সত্যের হাতে জ্ঞানে-অজ্ঞানে আত্মসমর্পণ করিতেই বাধ্য । এ বাধ্যতার মূলেও জীবের কামনা বাসনার অন্ত নাই । হিন্দু সতী মাত্রই অস্তিম্ব বাসনায় প্রার্থনা করেন—যেন স্বামি-পুত্রের হাসিমুখ দেখিয়া ইহজীবনের শেষ করিতে পারেন । যে সতীর ভাগ্যে তাহা ঘটে—যে সতী সে পথের শরণ লইবার জন্ম প্রস্তুত হন, তিনিই ভাগ্যবতী, তিনিই পুণ্যবতী, তাঁর স্মৃতি, তাঁর কন্ম মানবের স্মরণীয় । সে স্মরণীয় দিনের পুণ্যস্মৃতিতেই বিভোর হইয়া এ তীর্থ-যাত্রায় অতিরিক্ত ধনপ্রাণ ব্যয়ের পর অবশিষ্ট এক মাত্র মাতৃহারা কণ্ঠা মায়ী ও বৃদ্ধ দেওয়ান সনাতন রায় মহাশয়কে সঙ্গে লইয়া সদাশিববাবু ৬কাশীধামে আসিয়া বিশ্বনাথের আশ্রয়ে শেষ জীবন অতিবাহিত করিবার সঙ্কল্প করিলেন । প্রথম শোকের তীব্র জ্বালায় একবারও মনে করেন নাই যে, বিপত্নীক হইয়াও

আবার তাঁহাকে দেশে আসিয়া দেশের মতই জীবন-যাপন করিতে হইবে। তাঁর নিজের মন 'কোপীনবস্ত' হইতে চাহিলেও, মায়ার মায়ায়, দেওয়ানজীর অনুরোধে এবং নারায়ণপুরের প্রজাদিগের কাতর আছানে সে-সব আশায় জলাঞ্জলি দিয়া অগত্যা দেশে ফিরিবার জন্ত প্রস্তুত হইলেন।

২

সদাশিববাবুর গাড়ী ৬কাশীধাম ত্যাগ করিয়া মোগলসরাই ষ্টেশনে আসিয়া থামিল। যে গাড়ীতে তাঁহাদের যাত্রা করিবার কথা ছিল, সেই গাড়ীখানি নির্দিষ্ট সময়ের এক ঘণ্টা পরে আসিবে, জানিতে পারিয়া সদাশিববাবু কন্টার হাত ধরিয়া ষ্টেশনের প্ল্যাটফরমে এদিক-ওদিক পরিভ্রমণ করিতেছিলেন। প্ল্যাটফরমের একপার্শ্বে একটি অনিন্দ্য-সুন্দর বিংশবর্ষীয় যুবক মহাশয়-নিপাতের সমস্ত চিহ্ন ধারণ করিয়া, অতি ম্রিয়মাণ অবস্থায়, যেন ট্রেনের অপেক্ষায় উদ্‌গ্রীব হইয়া দাঁড়াইয়া ছিল। মায়ী তাহার দিকে চাহিয়া সদাশিববাবুকে বলিল, “দেখ বাবা, এঁকে যেন আমাদের দেশের লোক, দেখা লোক ব'লে মনে হ'চ্ছে না? জিজ্ঞাসা করুন ওঁর বাড়ী কোথায়? কে মরেছে? কোথায় যাবেন?” আরও কত কি হয় ত সে তাহার বালিকা বয়সের চাপল্যেই হউক অথবা অন্য কোন অজানা আকর্ষণেই হউক, পিতাকে শিখাইয়া দিত; কিন্তু সদাশিববাবু যুবকের দিকে জিজ্ঞাসুভাবে চাহিয়াই বলিয়া উঠিলেন—“এ যে আমাদের প্রণবকৃষ্ণ! জ্ঞানানন্দের ছেলে।”

সদাশিববাবুর কথা শেষ না হইতেই প্রণবকৃষ্ণ তাহার

পার্শ্বে আসিয়া দাঁড়াইল; এবং কথায় কথায় তাঁহাদের আকস্মিক পারিবারিক দুর্ঘটনার কথা শুনিয়া সকরণ নিঃশ্বাস ত্যাগ করিয়া বলিল,—“আমার দাদা-মহাশয় তাঁর অসুখের সংবাদ দিয়া আমাদের সকলকেই দেখিতে চাহিয়া ‘তার’ করেন। বিশেষ কার্যের জন্ত বাবা মহলে বাহির হইয়াছিলেন, কোথায় আছেন জানা না থাকায় আমিই মাকে সঙ্গে লইয়া সাতদিন হইল ৬কাশীধামে আসিয়াছিলাম। আমাদের আসার পর দুইদিন মাত্র দাদা-মহাশয় জীবিত ছিলেন। তার পর তাঁর ৬কাশীলাভ হয়। দাদা-মহাশয়ের মৃত্যুর দিন হইতেই মায়ের শরীর ধুবই খারাপ হয়। কোনও প্রকারে দাদা-মহাশয়ের শ্রাদ্ধ-কার্যাদি সমাধা করিলেন। পঞ্চম দিনেই মায়ের অবস্থা হঠাৎ এমন হইয়া উঠিল যে, কোন ডাক্তারই তাঁর রোগ নির্দ্বারণ করিতে পারিলেন না। ইতোমধ্যে বাবা আসিয়াছিলেন। তাঁর আসার পর মায়ের শেষ জ্ঞান ফিরিয়া আসে। গত কলা বেলা দশটার সময় তাঁর ৬কাশীপ্রাপ্তি হইয়াছে। বাবা দু’এক দিন পরেই আসিবেন, পথশ্রমে তাঁর শরীর বড়ই ক্লান্ত হইয়াছে। শ্রাদ্ধের আয়োজন করিতে ও পিসীমাকে লইয়া যাইবার জন্ত আমি অগুট যাইতেছি। মায়ার আমার সমান দশা হইল।” তার পর মায়ার দিকে চাহিয়া বলিল,—“মায়া, ছেলেদের চোখের জল মায়েরা যেন কখন দেখতে না পান, আমাদের চোখের জলে তাঁদের মন স্বর্গেও আনন্দে থাকতে পারবে না। তাই তোমায় চোখের জল ফেলতে নিষেধ করছি। মা আমার সব শেষে ব’লে গেলেন,— ‘আজ হ’তে প্রত্যেক নারীর মধ্যে আমায় দেখতে চেষ্টা ক’রো বাবা! আজ আমার এক শরীর বহুদে ব্যাপ্ত হ’বে; দুঃখ ক’রো

না, বাবা !' মায়ের কথা আমার মনের মধ্যে যেন প্রতিনিয়ত আমাকে একটা উত্তেজনায় ফেলে—কেবল মায়ের সেই হাসিমুখ মনে পড়িয়ে দিচ্ছে। আর আমার চোখ দুটো যেন আপনা হ'তেই জলে ভেসে আসছে। মনে হচ্ছে একবার কাঁদতে পারলে যেন মনের সমস্ত চাপা বোঝাটা জল হ'য়ে নেমে যায়, কিন্তু মায়ের আদেশে,—অনুরোধে তাঁর অতৃপ্তির ভয়ে তা পাচ্ছি না, তাই যেন সব কথাগুলো বুঝিয়ে বলতেও পারছি না। সব যেন ভাল বেঁধে একসঙ্গে মুখের উপর উঠে আসছে।”

এমন সময় রেলগাড়ী বিপুল জনসঙ্ঘ দেখিয়া নির্দিষ্ট স্থানে আসিয়া তাহার বিশাল শরীরের মধ্যে যাত্রীদের প্রবেশ করাইয়া লইবার জন্য প্রস্তুত হইল। ‘বহ্নিমুখে পতঙ্গবৎ’ বাত্রিদল স্বতঃ-প্রণোদিত হইয়াই শশব্যস্তে তাহার মধ্যে আত্মসমর্পণ করিতে ব্যস্ত হইয়া উঠিল। বলা বাহুল্য, রেল কোম্পানীর অনুগ্রহে সদাশিববাবু যাইবার সময় বেকুপভাবে গিয়াছিলেন, এবারে প্রচুর অর্থ দিতে স্বীকৃত হইয়াও, শত চেষ্টা করিয়াও রেল কোম্পানীর সে অনুগ্রহ না পাওয়াতে সাধারণ ভাবেই সাধারণ গাড়ীতে যাইতে বাধ্য হইয়াছিলেন। সদাশিববাবু প্রণবকেও তাঁহাদের সঙ্গে এক গাড়ীতে উঠিতে অনুরোধ করিতেছেন, এমন সময়ে এক বৃদ্ধা আসিয়া প্রণবের বলিষ্ঠ দেহের দিকে চাহিয়াই অতি কাতরভাবে বলিতে লাগিল,—“বাবা, আমাকে গাড়ীতে বসিয়ে দাও বাবা— আমার কেউ নেই বাবা, তোমার ভাল হবে বাবা, যাদের সঙ্গে এসেছি বাবা, তাদের খুঁজে পাচ্ছি না বাবা, দোহাই বাবা, তুলে দাও বাবা।” বলিতে-বলিতে কাঁদিতে লাগিল।

দ্বিতীয় শ্রেণীর নির্দিষ্ট গাড়ীতে সদাশিববাবু মায়াাকে লইয়া

বসিতে গেলেন। প্রণবকেও সেই নির্দিষ্ট গাড়ীতে বসিবার জন্ত পুনঃ পুনঃ অনুরোধ করিয়া বৃদ্ধ দেওয়ানজীকে যথাস্থানে বসিতে বলিয়া, তাঁহারা গাড়ীতে উঠিলেন। এদিকে বৃদ্ধাকে লইয়া প্রণবকৃষ্ণ যথাসাধ্য চেষ্টায় কোনও রূপে কৃতকার্য হইতে না পারিয়া, নিজের দ্বিতীয় শ্রেণীর টিকিটখানি তাহাকে দিয়া সদাশিববাবুর গাড়ীতে তাহাকে উঠাইয়া দিল। বৃদ্ধার টিকিটখানি নিজে লইয়া পরিবর্তনের জন্ত টিকিট ঘরের দিকে আসিবে, এমন সময় গাড়ী ছাড়িয়া দিবার শেষ ঘণ্টা বাজিয়া উঠিল। বিপুল জনতায় স্থান না পাওয়াতে মধ্যম শ্রেণীর টিকিট থাকা সত্ত্বেও বৃদ্ধ দেওয়ানজী চাকরদের জন্ত নির্দিষ্ট একখানা নির্জন গাড়ীতে বসিয়াছিলেন। প্রণবকৃষ্ণ সেইখানেই উঠিতে বাধ্য হইল। বৃদ্ধ দেওয়ান সনাতন বায় মহাশয় সেকালের লোক, প্রণবকে তিনি অনেকদিন দেখিয়াছেন, তাই সম্মানের সহিত তাহাকে নিজের স্থানে বসিতে দিয়া তাহার পার্শ্বে ই তিনি বসিলেন। প্রণবকে উদ্দেশ্য করিয়া বলিলেন,—“দেখুন প্রণববাবু, আপনারক আমি অনেকবার দেখেছি। আপনার তা মনে না থাকতে পারে। তা যাক্, এখন এই পাশের গাড়ীতে দুটা বাঙ্গালীর মেয়ে বসে আছে, গাড়ী চলা শুরু হ’তেই একটা মাতাল গোরা সাহেব জানালা দিয়ে তা’তে উঠেছে! আমার কেমন মনে হচ্ছে। একটু নজর ক’রে দেখুন দেখি, ব্যাপারটা কতদূর কি হ’য়ে দাঁড়ায়। মেয়ে দুটি ভদ্রঘরের ব’লেই মনে হয়। সঙ্গে পুরুষ আছে ব’লে ত মনে হ’ল না। যাতে তা’দের ওপর কোন অত্যাচার না হয় তার প্রতি লক্ষ্য করতে চেষ্টা করুন।”

দেওয়ানজীর কথায় প্রণবকৃষ্ণ অস্থির হইয়া জানালার উপর ভর দিয়া কি দেখিল, সেই জানে! তারপর জানালার কাঁক দিয়া

চলন্ত ডাকগাড়ীর বাহিরে পা-দানির উপর দাড়াইয়া অতি সাবধানে প্রাণপণ চেষ্টায় বায়ুর তীব্রবেগে পুনঃ পুনঃ নিজে ধাক্কা খাইতে খাইতে জানালার পর জানালা পার হইয়া পাশের যে গাড়ীতে ভদ্রমহিলাদ্বয় ছিলেন, সেই গাড়ীর দিকে চলিয়া গেল। দেওয়ানজীর বার্ককা-সুলভ ক্ষীণ দৃষ্টি তাহাকে দেখিতে যতই চেষ্টা করিতে লাগিল, বায়ুর তীব্রগতি ও ধূলারাশি তাঁহাকে ততই দৃষ্টিহার্য করিয়া দিতে লাগিল। শেষে সেই অশীতিপর বৃদ্ধ সেই বিপদের মধ্যে একটি তরুণ যুবককে ফেলিয়া দিয়া, অতি অনুতপ্তের ন্যায় দীর্ঘনিঃশ্বাস ত্যাগ করিতে করিতে, করুণ কণ্ঠে প্রাণের আবেগে বিপদভঞ্জন শ্রীমধুসূদনের নিকট তার মঙ্গল কামনা করিতে লাগিলেন।



গাড়ী পরের ষ্টেশনে আসিতেই দেওয়ানজী অতি ব্যস্ততার সহিত গাড়ী হইতে নামিয়া সদাশিববাবুর নিকটে আসিয়া বলিলেন,— “চলন্ত গাড়ীতে সাত-আনীর বাবুর ছেলে বেরিয়ে অপর গাড়ীতে গেছেন।” সে গাড়ীতে যে ব্যাপারের কথা তিনি প্রণবকুম্বকে বলিয়াছিলেন, এবারও তাহা তাঁহার প্রভুর নিকট বলিতে অন্তথা করিলেন না। তার পর বলিলেন,— “একবার খোঁজ নিন্—কোথায় গেলেন।”

যে বৃদ্ধা প্রণবের সাহায্যে এ গাড়ীতে স্থান পাইয়াছিল, সে আর ক্ষণমাত্র বিলম্ব না করিয়া চীৎকার করিয়া বলিয়া উঠিল— “আমি কেন মরতে এত লোক থাকতে তাঁকেই গাড়ীতে তুলে দিতে বলেছিলুম গো,—সে যে আমাদের দেশের সাত-আনার

জমীদারের ছেলে—তখন আমি কি জানি গো, দেশে গিয়ে আমি কি ক'রে মুখ দেখাবো গো,—তার মুখে একবার 'বুড়ি মা' কথা শুনে আমি যে আমার মরা ছেলের মা ডাক মনে করেছি গো ।” ইত্যাকারে গগনভেদী চীৎকার করিয়া গাড়ীর বিপুল জনসঙ্ঘকে তাহার নিকট আসিতে বাধ্য করিতে লাগিল ।

সদাশিববাবু দেওয়ানজীর কথা শুনিয়াই ক্ষণমাত্র বিলম্ব না করিয়া তীক্ষ্ণ দৃষ্টিতে প্রত্যেক গাড়ীর প্রত্যেক লোকের মধ্যে প্রণবের অনুসন্ধান করিবার জন্য গাড়ীর একদিক হইতে আর একদিকে পুনঃ পুনঃ যাতায়াত করিতে লাগিলেন । তিনি কোন গাড়ীতেই তাহাকে দেখিতে না পাইয়া অবশেষে ষ্টেশন মাষ্টারের ঘরে এই চর্ঘটনার সংবাদ দিতে গেলেন । তথায় মাষ্টারবাবুকে দেখিতে পাইলেন না । একজন চাপরাসীর নিকট হইতে বহু চেষ্টার পর গ্রাস্তারী আওয়াজে শুনিতে পাইলেন,—“সাব্ গাড়ীমে তদারক করনে গিয়া হৈ । একঠো বাঙ্গালী আদমী একঠো গোরা সাব্ কো জখম কিয়া হায় । আউর তাজ্জব কি বাত হায়, ওহি বেকুব আদমি আভি তক্ আপনা মুসে বোলতা হায়, 'হাম উদে, জখম্ কর্কে বাঁধকে রাখা হায় ।' কা বলেগা বাবু সাব্, হনিয়া মে কেতনা তাজ্জব হোতা হায় ।”

সদাশিববাবু আসিয়াই যাহা দেখিলেন, তাহা যেন তিনি কল্পনার অতি দূরদৃষ্টিতে কখন আঁকিতে প্রয়াস পান নাই । এমনই এক প্রত্যক্ষ-দর্শন জীবিত চিত্র দেখিয়া ক্ষণকাল স্তব্ধ হইয়া দাঁড়াইয়া রহিলেন । দেখিলেন অদূরে প্রণবরুক্ষ অসীম সাহসিকতার সহিত হস্তপদবন্ধ সাহেবী পোষাক পরিহিত এক ব্যক্তিকে বাহুবয় সাহায্যে শুল্লোপরি উত্তোলন করিয়া ষ্টেশন মাষ্টারের ঘরের দিকে

আসিতেছে। এক ঘণ্টা পূর্বে যে প্রণবকৃষ্ণকে নম্র, ধীর, শোকাক্ত মূর্তিতে দেখা গিয়াছিল, এখন আর সে প্রণব নাই। এখন তাহাকে দেখিয়া মনে হইতেছিল—পরাক্রান্ত শত্রুকে পরাজিত করিয়া দেশ-জয়ের পরে, সে দেশের প্রজাকুলের প্রতি যথাকর্তব্য সমাধা করিয়া, দেশের যত কিছু অশান্তি আর যত কিছু সার্থকতার তৃপ্তির ছবিত্তে নিজের শরীরের উপর জয়পতাকা অঙ্কিত করিয়া শান্তির রাজ্যে ফিরিয়া আসিতেছে। তাহার সঙ্গে বিরাট জনতায় মাষ্টারবাবুর ঘর পরিপূর্ণ হইয়া গেল। শত চেষ্টা করিয়াও প্রণবের চতুর্পার্শ্ব হইতে সে জনতা একেবারে অপমৃত হইল না। ষ্টেশন মাষ্টার সাহেব। বাঙ্গালা ভাল জানিতেন না। প্রণবের নিকট সমস্ত ব্যাপার ইংরাজিতে জানিতে চাহিলেন। প্রণব বলিল—“ইংরাজী কথাবার্তায় আমি বিশেষ অভ্যস্ত নহি। তবে ব্যাপার যাহা ঘটিয়াছে, তাহা আপনাকে বুঝাইয়া দিবার মত ইংরাজী-জ্ঞান আমার আছে।”

সাহেব কর্তৃক আদিষ্ট হইয়া প্রণব বলিতে লাগিল—“মোগল-সরহই ষ্টেশনে অতিরিক্ত জনতার জন্ম আমি চাকরদের গাড়ীতে উঠিতে বাধ্য হই। সে গাড়ীতে উঠিতেই আমাদের দেশীয় এক বৃদ্ধ আমাকে বলেন - ‘পার্শ্বের রিজার্ভ গাড়ীতে দুইটি ভদ্র-মহিলা বসিয়া আছেন ; গাড়ীর প্রথম চলন্ত অবস্থায় একটি মাতাল গোরা সাহেব টলিতে টলিতে জানালার ভিতর দিয়া ঐ গাড়ীতে উঠিয়াছে। দেখিয়া পর্য্যন্ত আমার মনে একটা সন্দেহ হইয়াছে। দেখুন না বাবু, মেয়েরা সব এখন কি করিতেছে। সাহেবটাই বা কোথায় গেল?’ তাঁহার কথায় আমারও মনে একটা অতি অশুভ চিন্তা আসে, সেই চিন্তার আকর্ষণেই দৈব-প্রেরিত হইয়া

জানালার উপর ঝুঁকিয়া পড়িয়া দেখিলাম—গাড়ীতে যে অল্প-বয়স্ক মহিলাটি বসিয়া রহিয়াছেন, তিনি জানালার উপর দুই হাতে ভর দিয়া প্রাণপণ শক্তিতে আপনার দেহকে সঙ্কোচ করিয়া, সাহেবের পুনঃ পুনঃ আকর্ষণ হইতে রক্ষা পাইবার চেষ্টা করিতেছেন। সাহেব দুই তিনবার টানাটানির পর যখন ক্রতকার্য হইতে পারিলেন না, তখন পকেট হইতে ছুরি বাহির করিয়া সেই রমণীর দুই হাতের উপরেই বেশ জোরে দুইটা টান দিয়া দিলেন। রক্তাক্ত-হস্ত হইয়াও সেই নিভীকা নারী নিজের ধর্মরক্ষার জন্ত একতিলও নড়িলেন না। এই ব্যাপার দেখিয়া আমার বিবেক-বুদ্ধি আগাকে পুনঃপুনঃ বেন অন্তরের মধ্যে বলিয়া উঠিতে লাগিল, ‘আত্মা রমণী—সহায়শক্তি ; তর্কত্বের হস্তে বিপন্ন হইয়াছে, অগ্রসর হও—অগ্রসর হও—নারীর মর্যাদা রক্ষা কর, সতীর সতীত্ব রক্ষা কর, ইহাতে প্রাণ যায় যাক্, তবু নারীর মান—নারীর অমূল্য ধর্ম রক্ষিত হউক’—এই বুদ্ধিতে আমার মনপ্রাণ নবশক্তিতে নিয়োজিত করিয়া আমি সেই মুহূর্ত্তে গতিশীল গাড়ীর বাহিরে যাইয়া অতি কষ্টে দুইটা জানালা পর পর অতিক্রম করিয়া ঐ গাড়ীর পা-দানির উপর দাঁড়াইতেই, এই উন্মত্ত সাহেব উপর হইতে স-বুট আমার মস্তকে এমন আঘাত করিল যে, আমি মাথা ঠিক করিতে না পারিয়া গাড়ীর হাতল ধরিয়া ঝুলিয়া পড়ি। সাহেব বোধ হয় মনে করিয়াছিল, আমি নীচে পড়িয়া গিয়াছি। কিছুক্ষণ পরে আমি প্রাণপণ শক্তিতে নিজেকে সামলাইয়া অতি দ্রুত গাড়ীতে উঠিয়া পড়িলাম। উঠিয়াই দেখি, সাহেব নারীর উপর শেষ অত্যাচার মানসে তাহাকে নীচে ফেলিয়াছে। আমি ব্যাপার দেখিয়া সাহেবকে অতি ভীষণ ভাবে আক্রমণ করিলাম।

স্থান অস্থান বিবেচনা না করিয়া দুই চারি ঘুসি মারিতেই সাহেব জখম হইয়া পড়ে। জখম হইয়াও সাহেব অসুরশক্তি প্রয়োগ করিতে ক্রটি করেনি। আমার দেহের উপরই সে সব চিহ্ন বিশেষরূপেই এখনও বিদ্যমান রহিয়াছে। আমি কার্য উদ্ধারের আনন্দেই সে সব ব্যথায় কাতর হইতেছি না। প্রায় পাঁচ মিনিট মল্লযুদ্ধের পর আমি সাহেবকে বিশেষরূপে আহত করিয়া আমার চাদরে বেঞ্চের পায়ে সঙ্গ সাহেবকে বাঁধিয়া রাখিলাম। তার পর দেখিলাম, যুবতী রমণী মূর্ছিতা হইয়া বেঞ্চের নীচে পড়িয়া গিয়াছে। কলের জলে কাপড় ভিজাইয়া মূর্ছিতার মুখে দিতে দিতে তাহার চৈতন্য ফিরিয়া আসিল। ঐ গাড়ীতে যে বৃড়ি রহিয়াছে তাহার নিকট গিয়া দেখিলাম, চৈতন্যনাশক ঔষধে সিক্ত একখানি রুমালে তাহার মুখ বাঁধা। রুমালখানি বোধ হয় এখনও কল-ঘরে আছে। পরে জানিতে পারিলাম ঐরা সিমলা পাহাড় হইতে আসিতেছেন। যুবতীর স্বামী একা দেশে আসিয়াই কলেরা রোগে আক্রান্ত হইয়া এদের আসিবার জন্ত 'তার' দিয়াছেন। সেখানে বন্ধুবান্ধবদের মধ্যে কাহাকেও না পাইয়া, স্বতন্ত্র গাড়ী করিয়া, একমাত্র বৃদ্ধা তাহাতে আবার চিরবধির ঐ স্থবিরটিকেই সঙ্গে লইয়া দেশে আসিতে বাধ্য হইয়াছেন। তার পর আর কোনও কথা আমি জানিতে সমর্থ পাই নাই। গাড়ী এখানে আসিতেই আমি মহাশয়ের নিকটে আসিয়াছি।”

ষ্টেশন মাষ্টারের আদেশে, বন্ধ-হস্তপদ গোরা সাহেব মুক্ত হইয়া জিজ্ঞাসিত হইল, এই যুবক যাহা বলেন, তাহা সত্য কি না ?

গোরা সাহেবের তখনও মদের ঝাঁক পূরা মাত্রায় কাটে নাই। অথচ যাহা ঘটতেছে সবই বেশ বুদ্ধিতে পারিতেছে। এমনই অবস্থায় সে অনেক কথা অনর্থক কহিয়া বাইতেছিল। শেষে ষ্টেশন মাষ্টার মহাশয়ের ধমক খাইয়া সে উত্তর দিল,—“বাগে পেয়ে এতটা মূর্থ ভেব না যে, আমি এর অণু দিক্ দেখিয়ে নিজের নির্দোষিতা প্রমাণ কর্তে পারব না।”

মগুপের উক্তির একটা বিশেষ গুণ এই যে, দেশ কাল সব ভুলাইয়া দেয়। তাহার বাকশক্তির জড়তাই সকলকে একটু আনন্দ দেয়। এক্ষেত্রে এই লোমহর্ষণ ব্যাপারের বিভীষিকার মধ্যেও তাহার অণুথা হইল না। সকলেই হাসিয়া উঠিল। কিন্তু সে হাসিতে প্রকৃত ইংরাজ ষ্টেশন মাষ্টার যোগ দিতে পারিলেন না। গোরা সাহেবের দিকে তর্জনী হেলন করিয়া অতি গম্ভীর কর্কশস্বরে বলিতে লাগিলেন, “জাতির কলঙ্ক, মূর্থ, কালসাপ, তুমি তোমার মন্দ কার্যের ফল ভোগ করিবার জন্ত হাজতের অন্ধকার গৃহে অবস্থান কর। সময়ে বিচারের অতি নিশ্চয়—অথচ অতি পবিত্র হস্তে তোমার জন্ত নূতন শাস্তির প্রস্তাব যাহাতে হয়, তাহার জন্ত আমি বিশেষ চেষ্টিত হইব।

“আর সংসাহসী ভদ্র যুবক, আপনি আপনার নাম ধাম জানাইয়া স্বস্থানে গমন করিতে পারেন। এত অল্প বয়সে—এত সাহস এ দেশের লোকের মধ্যে আমি আমার কর্মজীবনে এইমাত্র প্রথম দেখিলাম। সং ইচ্ছার বশবর্তী হইয়া আজ যে কর্ম করিলেন, তাহার জন্ত আমরা আপনাকে মুখে শত ধন্যবাদ দিতে পারি মাত্র, কিন্তু এ কার্যের যথাযোগ্য পুরস্কার ও যে পবিত্র আশীর্বাদ পাইবার আপনি যোগা, তাহা ভগবান আপনার

কর্মজীবনের উপরেই প্রদান করিবেন, এই প্রার্থনা করি। প্রত্যেক গাড়ীতেই সতর্ক করিবার জন্ত যে শিকল আছে, তাহার ব্যবহার গাড়ীতে উঠিলেই সর্বদা মনে রাখিবেন, অবশ্য অতি বিপদে মানুষের সবই মনে আসে না। চলন্ত গাড়ী হইতে বাহির হইবার জন্ত দৈব যে আপনার সংসাহসী জীবনকে বিপন্ন করেন নাই, তাহার জন্ত ভগবানকেও ধন্যবাদ দিন। আর এক কথা, যখন এই অতি অপ্রিয় ঘটনার রহস্য সর্বসমক্ষে সত্যরূপে প্রকাশ পাইল, তখন আর পর্দানশীন একটি নিরীহ সন্ন্যাস্ত মহিলার এজাহারের কোনও প্রয়োজন দেখি না।” ষ্টেশন মাষ্টার সাহেব গাড়ীর নিকটে আসিয়া সেই মহিলাদ্বয়কে সম্বোধন করিয়া বলিলেন,—“মা লোক, প্রণববাবুকো তোমারা গাড়ীপর লোক এক সং যাও। ডরো মাং, বাবু তোমলোককো ছেলিয়াকা মারফিক্। মাতারিকো লেড়কা যেসা মারফিক্ সাথ লে যাতে হৈ, এসা মারফিক্ বাবু তোমলোককো সাথ লে যায়েগা, ডরো মাং।”

সদাশিববাবু এখনও পর্য্যন্ত কোনও কথাই কহেন নাই,— যেন এই সব ব্যাপার চলন্ত চিত্রের মত দেখিয়া যাইতেছিলেন। প্রণবকৃষ্ণ সাহেবের কথায় কি যেন চিন্তা করিতে লাগিল, সেই গাড়ীতে উঠিতে যেন সম্পূর্ণ ইচ্ছা নাই, এমন ভাব দেখাইতে লাগিল। তখন সদাশিববাবু বলিলেন,—“প্রণব, তুমি ষ্টেডের বাড়ীতে পৌঁছে দিয়ে, তবে সাত-আনীতে গেলে বড় ভাল হয়। আর তোমার কর্তব্য আমি নিজের কর্তব্য মনে ক’রে সাত-আনীতেই যাচ্ছি। তোমার পিতা সেখানে না আসা পর্য্যন্ত আমি সাত-আনীতেই থাকবো।”

৪

আবালোর বন্ধু সদাশিববাবুর বিপদের কথায় জ্ঞানানন্দবাবু নিজের বিপদ গায়ে না মাথিয়া তাঁহাকে সাহায্য দিতে আরম্ভ করিলেন। কাতরতা যে কাহাকে অধিক কাতর করিয়াছিল, তাঁহার বিচার বৃদ্ধ দেওয়ান সনাতনের ধারণায় বাহ্য হইয়াছিল, তাহাতেই তিনি বলিলেন—“আপনাদের চিরদিনের সমান ওজনের কাজের মত ভগবান্ আপনাদের সমান শোকের মধ্যে ফেলেছেন; তার জন্ত দুঃখ করবেন না বাবুরা। আমি আপনাদের তিন পুরুষের কর্মচারী, তাই সুখে-দুঃখে—সব তাতেই আমার কথা বলবার একটি স্বত্ব মৌরুসী হ’য়ে গেছে। শূন্য ঘরে আপনাদের মন বসবে না,—তাই বল্চি, বাবুরা যদি মনোযোগ করেন, তাহ’লে এই বুড়ো সনাতন মনের পুরানো ময়লাগুলো সব মন থেকে ফেলে দিয়ে, আবার নূতন মন, প্রাণ, শক্তি নিয়ে এই দুটো সত্ত্বভাঙ্গা, শূন্য বাড়ী ঘোড়া দিয়ে আবার এমন একটা সাজান রাজবাড়ী ক’রে তুলতে পারে যে, তা দেখে দেবতাদেরও চোখ ঝলসে যাবে।”

সদাশিববাবু তাঁহার পিতার আমলের এই বৃদ্ধ দেওয়ানজীকে শ্রদ্ধার চক্ষে দেখিতেন। তা সেটা সেকালের রীতি নীতি অনুযায়ীই হউক, অথবা আধুনিক যুগের পক্ষে মনের অতি দুর্বলতাতেই হউক, সে বিচারের ভার ভারতের ভাগ্যের কর্ম-জীবনের উপরেই চিরন্তরে গুস্ত থাকুক। বর্তমানে তাহার মীমাংসা করিবার অধিকার আছে কি না জানি না।

. এই নব্যযুগের বাবুদের নিত্য-নব পরিচারকের নিত্য-নব সেবা-

গ্রহণ-পদ্ধতির আইন-কানূনের সঙ্গে আংশিক তুলনা করিলেই বোধ হয় অনেকটা বুঝা যাইতে পারে যে, সুখী ও কর্মী কাঁহারাই অধিক ছিলেন। তখনকার দিনে একটি লোক যে কোন বাড়ীতে আশ্রয়-গ্রহণ করিলে, বা চাকরী স্বীকার করিলে, তাহার বংশানুক্রমিক সেই বাড়ীরই পোষ্য মধ্যে চিরদিনের জন্ত গণ্য হইত, বিশেষ স্নেহ বা ভক্তির পাত্রে পরিণত হইত; হয় ত বা একটা বিশেষ আত্মীয়ের তুল্য সম্বন্ধেই জ্যেষ্ঠ কনিষ্ঠের গ্ৰায় আহত হইত। এখনকার দিনের মত পাঁচ বৎসরের শিশু তার পিতামহের সমবয়সী সন্তর বৎসরের বৃদ্ধ ভৃত্যকে যেভাবে নাম ধরিয়া—নাম ধরিয়া কেন নাম বিক্রত করিয়া ডাকে, তখন সে পদ্ধতি ছিল না। খাণ্ড সম্বন্ধেও প্রভু-ভৃত্যের বিশেষ পার্থক্য হইত না। পুত্রের সমান আদরে ও শাসনে শত দোষের মার্জনা করা, একটি অবনত জীবনের উৎকর্ষ সাধন করিয়া আপন সংসারের সর্বসাধারণের মধ্যে গণ্য করিয়া তোলাই সংসারের কর্তার অবশ্য কর্তব্য ছিল। তাই সে যুগে বংশ-পরম্পরা এক কাজ করিতে বড় কেহ লজ্জিত হইত না। এক কাজের মধ্যেও মনের ও কর্মের উন্নতির সঙ্গে সঙ্গে তাহাদের যে বুদ্ধির বিকাশ ও কর্ম-কৌশল আয়ত্ত্ব হইত, তাহাতেই তাহাদের আপন আপন সংসারের সকল অভাব দূর করিবার ভার পড়িত—তাহাদের প্রভুর উপরে; এখনকার মত নিত্য-নব রুচির মনিবের পদলেহনে ভৃত্যের চরিত্র নেমক-হারামীব শেষ সীমায় যাইত না। মনিব-চরিত্রের সঙ্গ-দোষে চাকরের চরিত্রকে 'ছিঁচ্কে চোর' হইতে ডাকাইত প্রস্তুত করিতে এযুগে সে সব সুযোগ দেয়, তখনকার দিনে সে সব কোন সুযোগই পাইত না। অর্গের রানি—কুবেরতুল্য ঐশ্বর্য্য প্রভৃতি থাকিলেও এখনকার

দিনে প্রকৃত সুখী—প্রকৃত ভোগী আদর্শ-গৃহী একজনও দেখিতে পাওয়া যায় না। তখনকার দিনে সংসারের যাবতীয় কর্মে, সংসারের যাবতীয় কর্তব্য সাধনে যাহাদের প্রাণ সতত নিয়োগ করা হইত, তাহাদের মধ্যে বিশ্বাস, সত্য, মমতা ও কর্তব্যজ্ঞান যতটা ছিল, এখন তেমন লোক দেখিতে পাওয়া যায় না কেন? এ যুগের বড়লোক—ব্যাঙ্কের কাগজে, জীবন-বীমায়, সেভিংস্-ব্যাঙ্কে, গার্ডেন-পার্টিতে, মোটারের দ্রুত-গতিতে। ব্যাঙ্কের কাগজে খাঁটি সুদই দেয়, কিন্তু সংসারের পক্ষে ভাবী বংশধরের জন্ত যে খাঁটি দুধের দরকার তাহা দেয় কি? ব্যাঙ্ক সুদই দেয় দুধ দেয় না। হাজার সুদের টাকা বাহির করিয়াও খাঁটি দুধ খাইতে পান কি? জীবন-বীমায় বর্তমান জীবনেই হটুক বা জীবনের পরেই হটুক, যখন হটুক টাকার রাশি পাওয়া যাইবে, তাহাতে সংসারের পক্ষে—সংসারীর পক্ষে কোন অভাব দূর হইল কি? টাকার গদিতে বসিয়া থাকুন বা টাকা উড়াইবার জন্ত যাহারা রহিলেন, তাঁহারা উড়ান; দূর জাতির লালন-পালনে যে জীবন-বীমা হইত, যে তৃপ্তির হিল্লোলে বর্তমান জীবনে ও পরজীবনে প্রীতির বন্ধন করিয়া সংসার সুখে-দুঃখে সকলের সাহায্য পাইত, এখনকার জীবন-বীমায় তাহা দেয় কি? চঞ্চলা লক্ষ্মী তাঁহার অঞ্চল দোলাইয়া কাহার শ্রান্তি কখন অপনোদন করিতে কোন্ স্থানে আগমন করিবেন, তাহা কেহ বলিতে পারেন কি? তাই সে যুগে খোঁজ করিয়া দরিদ্র দূর জাতির—নিরনের—দীনজনের প্রতিপালন করা অবশ্য কর্তব্য ছিল। প্রকৃতির পরিবর্তন পদ্ধতির স্বভাবগুণে আজ যে রাজা, কাল সে প্রজা, আজ যে প্রজা, কাল সে রাজা, আজ যে দুঃখী, কাল সে সুখী হইবেই, তাই ভূয়োদর্শী

মহাজনগণ ভবিষ্যৎ বংশধরের জন্য বিশ্বাস, সত্য, মমতা, পরোপকার, রুতন্ত্রতা সঞ্চয় করিয়া রাখিয়া, সকলকে প্রীতির বন্ধনে—শ্রেয় রজ্জুর পিঞ্জরে আবদ্ধ করিয়া সংসারের অভাবের মূলে কুঠারীয়াত করিয়া যাইতেন। এখন সারা বঙ্গে, ভারতে, আর সে প্রাণ—সে ভবিষ্যৎ-দর্শন আছে কি? কেন নাই? কেনই বা গিয়াছে? সংসারের নিত্য-নব অভাব অভিযোগ, অশান্তি যেভাবে আমাদের বিপন্ন করিতেছে, তাহার মূল কারণ কে অন্বেষণ করিবে? ওগো আমাদের ভাগ্যদেবতা, বলিয়া দাও,—কবে, কখন, কোন্ শুভ-মুহুর্তে তুমি আমাদের ভাগ্যাকাশে উদ্ভিত হইয়া, প্রকৃত সংসারের কর্তব্যপথে আমাদের চালিত করিয়া, অনুশোচনার হাত হইতে নিষ্কৃতি দিবে?

পুরাতন আজও নূতনের নিকট পরাজিত হয় নাই। উচ্চশিরে আদর্শের মত নিজের যোগ্যাসনে বসিয়াই আছে। আমরাই না শিক্ষার দোঁষে তাহার সে আসনের মর্যাদাকে পাগলের পাগলামী মনে করিয়া উপেক্ষার চক্ষে দেখি। এখনও বাঙ্গালার অনেক বনেদী-ঘরে বনেদী চালের—যাহাকে এ যুগ যুগের চক্ষে দেখে, সেই ভাবে—ব্যবস্থা পূরা মাত্রায় দেখা যায়, ঠাকুর সেবার কার্য হইতে আরম্ভ করিয়া, বাড়ীর মেথরের কার্য পর্য্যন্ত করিবার জন্য পুরুষানুক্রমে যে ভাবে জমী জমা দিয়া ব্যবস্থা করা আছে, সেই ভাবেই অপর বংশের লোকও পুরুষানুক্রমিক এক কার্য করিয়া আসিতেছে। তাহাতে তাহাদের কাহারও কখনও মর্যাদা-হানি হয় না। শিক্ষার সঙ্গে মনের গঠনে তাহাদের হৃদয় তখন যেভাবে গঠিত হইত, আজকালকার দিনের বিজ্ঞাতীয় শিক্ষা ধর্মহীন কর্ম-শিক্ষা তাহাদের মনের গঠন হৃদয়ে অঙ্কিত করিয়া

দিতে পারে না। সেকালের প্রত্যেক কর্মের সর্বপ্রথম হইতে শেষ-পর্যন্ত ঈশ্বর সাক্ষী করিয়া যে কর্ম করা হইত, এখন সে-সব কর্ম প্রাণহীন ভাবে অভ্যাসের বশে মাত্র ভোগের জন্ত করা হইতেছে। এখন আর কর্মের সূচনার সঙ্কল্প নাই, কর্ম-সমাপ্তির বিপুল আগ্রহ নাই, কর্মের উদ্দেশ্য নাই, কর্মফল শ্রীকৃষ্ণে সমর্পিত হয় না। তাই এখনকার দিনে কর্মের প্রকাশগতি কোন দিক দিয়া চলিয়াছে তাহা কে বলিবে? যে জাতির একমাত্র শিক্ষা ছিল—ফলাফলে অনাসক্ত হইয়া কর্ম করাই আমাদের চিরন্তন প্রথা—আর তাহাই পরামুক্তির সোপান, আজ সেই জাতি কেবল ভোগের জন্ত—অর্থের জন্ত কর্ম করিয়া নিজের কর্মপাশকে এতই সূদৃঢ় করিতেছে যে, তাহা শতকোটি জন্মের কর্মেও ছেদন করা সম্ভব হইবে না বলিয়াই মনে হয়। এই বিজাতীয় শিক্ষার ফলেই দেশ স্বেচ্ছাচারে নিমজ্জিত হইতেছে, দরিদ্র হইতেছে, বিলাসী হইতেছে। অথচ বিবেক-বুদ্ধির তাড়নায় দৈবদৃষ্ট সদাচারের শাস্তি দেখিয়া নিজের গত জীবনের কর্মের পরিণতিতে যে সব অশান্তির ফল তাঁহাকে গ্রাস করিতেছে, তাহা উপলব্ধি করিতেছেন। সর্বশেষে বার্কিকো যখন আর জীবন-স্রোত ফিরাইবার সময় ও সামর্থ্য নাই, কোনও উপায়ই রাখেন নাই, জীবনের জোয়ার ফুরাইয়া একটানা ভাটা কালের গতির সঙ্গে দ্রুতগতিতে বহিয়াছে; দক্ষিণ দ্বারের দ্বারীর আশ্রয় শ্রবণে আসিতেছে তখন আর কি ফল হইবে? জীবনের উদ্দেশ্য ঠিক করিতে স্বেচ্ছায় পথ ও কর্ম বাছিয়া লইতে শাস্ত্রের দিকে না চাহিয়া—ঋষিবাক্যে দৃঢ়-বিশ্বাস না আনিয়া—মহাজনের পথে না চলিয়া—অবিবেকীর মত সারা জীবন যে পথে চলিয়া—

যে সময় হাসিতে হাসিতে কাটাইয়া দিলে—জীবন-যুদ্ধে যে সময় চলিয়া গেল তাহাতে আর পবিত্র কর্ম—আত্মোন্নতির কর্ম—মানব-জীবনের পবিত্র কর্ম-সাধনার ফল—নির্ম্মল শান্তি-ভোগ হইল কই ? সম্পূর্ণ ভোগ করিতে না পারিলে—ত্যাগ হয় না । ভোগ ও ত্যাগ সমবায়-সম্বন্ধে আবদ্ধ । তখন বাল্যে ব্রহ্মচর্যা করিয়া, শরীর ও মন সম্পূর্ণরূপে গঠিত হইলে, গুরুর আদেশে গৃহী হইত । সে গৃহী ভোগীর ও ত্যাগীর আদর্শ । সেরূপ ভোগী ও ত্যাগী এখন আর নাই । তাই ত্যাগ বলিলেই হয় ত এ যুগের সন্ন্যাসীর স্বভাব সংসারের মধ্যে আনিয়া আরও নিম্নস্তরের আদর্শ মনের মধ্যে পোষণ করিবে ।

৫

বৃদ্ধ দেওয়ানজীকে বাল্যকাল হইতে সদাশিববাবু দাদা বলিয়াই ডাকিতেন । বিপদে-সম্পদে তাঁহার সাহস ও কার্য-তৎপরতা দেখিয়া—তাঁকে নিজের জ্যেষ্ঠের আসনে বসাইতে কোন দিন বিধা বোধ করেন নাই । এই কয়দিনেই কালের করাল গ্রাসে সবই গিয়াছে, যতটুকু আছে, তাহার মধ্যে সনাতনেরই বার্কিকা শক্তি একাই সব অভাব পূরণ করিয়া আসিতেছে । এই বিধি-বিপত্তির মধ্যে তাঁহার যতটুকু পরিচয় পাওয়া গিয়াছে, তাহাতেই সনাতন রায় সদাশিববাবুর বন্ধু, সখা, ভৃত্য ও গুরুর আসন অধিকার করিয়া লইয়াছেন ।

সেই প্রাণপোরা বিশ্বাসে—ভালবাসায় মুগ্ধ সদাশিববাবু সনাতনের কথাই কি প্রতিবাদ করিবেন ? তাই বলিলেন—
“দাদা, যাতে দশম্বর তৃপ্তির সঙ্গে আমাদের তৃপ্তি হয়—শান্তি পাই,

সেই মত ব্যবস্থা কর। আমাদের শোকে সাহায্য দিতেও এখন তুমি—আর সুখে আমোদ কর্তেও তুমি, বিপদের সহায়, সম্পদের বিভব, প্রাচীনের গৌরব তুমি—তোমার ইচ্ছাই পূর্ণ হউক।”

সনাতন বলিলেন—“আমার ইচ্ছা যে, প্রণববাবুর সঙ্গে মায়ার বিবাহ দিয়ে সাত-আনী আর নারায়ণপুরের মাঝের সীমানা তুলে দিয়ে এ দুই জিনিস—মানুষ থেকে আরম্ভ ক’রে, জায়গা জমী পর্যন্ত সব এক ক’রে দিই। তাদের সুখে শান্তিতে ভাসিয়ে দিয়ে, আমরা সব বুড়োর দল অশুভ কাশীবাস করি। জ্ঞানানন্দবাবুর যদি কোনও প্রকারে অমত না হয় তবে শুভকর্মে শীঘ্র সেরে ফেলুন।”

জ্ঞানানন্দবাবু বলিলেন—“আজ কালকার রীতি-নীতি অনুযায়ী আমার মতামত নেবার আগে একবার ছেলের মন বুঝে দেখাই উচিত ব’লে মনে হচ্ছে। প্রণবের বয়স হয়েছে—বাইশ বৎসর। নিজের বুদ্ধি বিবেচনার উপর দাঁড়াইতেই যেন সে ইচ্ছুক।”

সনাতন বলিলেন—“বাবু, আমি এখন যে কথাই বলি না কেন, উভয় পক্ষের ঘটকের কথার সমান ধ’রে আমাকে মার্জনা করবেন। আমার মুখে এত বড় কথা অনেকদিন বার হয় নি, কিন্তু আর থাকতে পারছি না। তাই, সব ব’লতে বাধ্য হচ্ছি। আমাদের বিবাহের সময় কি আমাদের মা বাপ কখনও জিজ্ঞাসা করেছিলেন যে, ‘ওরে তোর বিয়ে করবার ইচ্ছা আছে কি? অমুককে বিয়ে করি কি না?’ এ সব হচ্ছে সমুদ্র-পারের কথা—এ সব এখানে খাটে না, এখানে বাপ ছেলের বিবাহ দেয়, নিজের মতে পছন্দ ক’রে বিবাহ করে না। নিজের উপর কর্তৃত্ব করা আমাদের দেশের পক্ষে ভাগ্যের কথা নয়। অভিভাবক থাকা

সব্বেও যাহাকে কর্তৃত্ব করিতে হয় সে ভাগ্যবানও নহে । নিজের দায়িত্ব ও নিজের অধিকার নিজে নির্বাচন করিতে পারে এমন শক্তিশালী পুরুষ বা নারী ভারতে অনেক থাকিতে পারেন— কিন্তু এই শক্তির উপর অধিক মর্যাদা দিতে বাধা, মর্যাদা কেন আপনাকে উৎসর্গ করিতে বাধা বা উৎসর্গ করিয়াই ধন্য—এমন জাতি, এমন শক্তি এই কর্মভূমি ভারতেই আছে, অপর দেশে নাই । এমন আদর্শ কর্ম—চিরন্তন প্রথার বিরাট মর্যাদা যে পিতা স্বেচ্ছায় পুত্রের হস্তে তুলিয়া দিতে পারেন তাঁর কর্তব্য ও তাঁর পুত্রের কর্তব্য একদিকে একই কেন্দ্রপথে কর্তব্যের আস্থানে চালিত হইতে পারে কি না তাহা নির্দেশ করা বড়ই দুঃস্বপ্ন । এমনই কত ক্ষুদ্র বিরাট ঘটনায় শতশত পিতৃমর্যাদা খর্ব হইয়াছে, শতশত পুত্র পিতার স্নেহনীড় ত্যাগ করিয়া কামনা বাসনার করাল গ্রাসে নিজের জীবন বিসর্জন দিয়াছে তাহার সীমা কে করিবে ? এখানে বংশগত সম্বন্ধ পুরুষানুক্রমিক কর্ম বজায় রাখিবার ভার পুত্রের উপর । পৈতৃক ক্রিয়াকলাপ কীর্তি রক্ষা করিতে পুত্রের প্রয়োজন । পিতৃ-শোণিতে জন্ম—পিতৃ-কীর্তিতে মুগ্ধ পিতৃভাবে ভাবাপন্ন পুত্রই পিতার ইহ-পর জীবনের সঙ্গে সম্বন্ধ রাখিতে পারে । পারে বলিয়াই আজও ভারতের সনাতন ধর্মের দ্বারে সনাতন আচার ব্যবহারের আশ্রয়ে বিশ্ব-জগতের সকলেই আশ্রয়প্রার্থী ভিখারীর ন্যায় দণ্ডায়মান । এই বিলাসের বৃগে তাহার অস্থি-কঙ্কাল-সার অতি জীর্ণ মৃতপ্রায় জীবনেও আমরা— সেবার পরিবর্তে যে শাস্তি, আচারের বিনিময়ে অনাচার, ধর্মের বিনিময়ে যে অধর্ম, শাস্তির বিনিময়ে যে অশাস্তির অর্ঘ্য দিয়া তাহার পূজা করিতেছি—তাঁহার পবিত্রতার হানি করিতেছি—

তাহার পূর্ণ প্রায়শ্চিত্ত না করিয়া, তাহার অভাব পূরণ না করিয়া, যতটুকু শেষ ক্ষীণ প্রাণ আছে তাহা নষ্ট করিতে আমরা পাশব শক্তির পরিচয় আর কত বেশী দিতে পারিব? সনাতন-ধর্ম নিজের দেহ প্রাণ তাঁহার সেবকদের দ্বারা কোটা কোটা খণ্ডে বিভক্ত করিয়াও পুরুভ্রমের প্রাণের মত এখনও যে জীবিত রহিয়াছেন, তাহা এই সারা ভারতের প্রত্যেক ত্যাগ-ধর্মের শক্তিতে। এখানেই স্বামীর মুখ চাহিয়া, স্বামীর সুখে সুখী হইয়া পত্নী নিজের জীবন উৎসর্গ করেন। তাঁহার নিজের বলিতে মনের কোন স্থানে এতটুকু ইচ্ছা-শক্তিও রাখেন না। সারা জীবন— জীবন বলিলে ভুল হয়, মুক্তির দ্বারে পৌঁছিতে যত কোটা জন্ম জীবন ব্যয় হউক না কেন—তৃপ্তিতে, মনের পূর্ণ আনন্দে, অতি বড় পাষাণ্ড স্বামীরও পদতলে পড়িয়া থাকিতে চান। সতী স্বামীর সঙ্গ, স্বামীর মঙ্গল, স্বামীর সর্ব-মঙ্গল কামনা করিতেই নিজের অস্তিত্বটুকু কোথায় হারাইয়া ফেলিয়াছেন। কালের ইঙ্গিতে সনাতন ধর্মের অতি বিরাট অথচ অতি সূক্ষ্ম গতি আয়ত্ত করিয়া ত্যাগধর্মের—আত্মত্যাগের—আত্মোৎসর্গের বিজয়মঙ্গলগীতি ভারতের প্রত্যেক প্রাসাদ হইতে প্রত্যেক পর্ণকুটীরে কেন গীত হইতেছে, তাহা কে বলিবে! আমরা পিতার আদেশ—পিতৃকর্ম পিতৃ-ইচ্ছা পূরণ করিতেই এ কর্মভূমিতে আসিয়াছি, নিজের ইচ্ছা, সুখ, শান্তি, সবই পিতৃ-মাতৃপদে সমর্পণ করিয়া, প্রত্যেক কর্ম-জীবন অতিবাহিত করিতেছি—সেই ত্যাগ-ধর্মের মধ্যে জন্মলাভ করিয়াছি বলিয়াই। এই ভাবেই ভারতের সনাতন ধর্মের আশ্রয়ে আমাদের পিতৃলোক তৃপ্ত হইয়াছেন। আবার আমরাও আমাদের ভবিষ্যৎ বংশধরগণের শ্রদ্ধার দান মন্ত্রশক্তিতে গ্রহণ

করিয়া শান্ত, নিষ্ক, পবিত্র পিতৃলোকে স্থান পাইব। সুকর্ম ও দুষ্কর্মের বন্ধন—সংস্কার-পাশ হইতে চিরমুক্ত হইব—ইহা দেবা-দেশ—ইহা ঋষিবাক্য—ইহা চিরন্তন সনাতন প্রথা—সনাতন ধর্ম। ইহা উজ্জল আলোকের অক্ষরে লিখিত শাস্ত্রবাক্য—ঋষিবাক্য। আমাদের ভবিষ্যৎ আশা কখনই যেন কাহাকেও ভাগ করিতে না দেখি। কোন্ পুণ্যযুগের আদিত্তে এই প্রথা—এই সংস্কার আরম্ভ হইয়াছে, এই অক্ষয় রীতি নীতি, অমিতগতি কালের নিত্য নূতন গতির উপর দিয়াও অতি পুরাতন হইয়া চলিয়া আসিতেছে—বিশ্ব-সংসার ঝাঁহার নিকট নতশিরে বসিয়া আছে—তাঁহার উপর কর্তৃত্ব করিবার শক্তি স্বয়ং বিধাতারও নাট! এই কর্ম-ধর্ম-শক্তি নিয়তি হইতেও কঠোর—সত্য হইতেও রূব—বেদ ও নারায়ণ হইতেও অতি পবিত্র।”

বৃদ্ধ দেওয়ান সনাতন রায় নিজের জ্ঞান বুদ্ধির শক্তিতে আজ যে সব কথা বলিলেন, তাঁহার উপর তর্ক করিতে, বিচার করিতে জ্ঞানানন্দবাবু ও সদাশিববাবু সাহস পাইলেন না। কিছুক্ষণ সকলেই নির্বাক থাকিয়া, যেন অতীতের পুণ্য-গরিমা স্মরণ করিতে লাগিলেন। সেকালের সঙ্গে একালের শিকার পার্থক্য যে কত বেশী হইয়া দাঁড়াইয়াছে, তাহা বুঝিতে চেষ্টা করিতে লাগিলেন। অবশেষে সেই নিস্তরুতা ভঙ্গ করিয়া জ্ঞানানন্দবাবু বলিলেন, “দেওয়ানজী, আপনার হাতে-গড়া,—মানুষ-করা মায়াকে—সদাশিবের স্নেহের বন্ধন মায়াকে আমার প্রাণের অধিক ভালবাসার ধন—আমার বংশের একমাত্র শেষ সম্বল প্রণবকৃষ্ণের বপুর্কপে—আমার একমাত্র পুত্রবধূরূপে গ্রহণ করিলাম। আর এক কথা, সে কথা যতই অপ্রাকৃত হউক না কেন, দিতেই

হুঁবে। সদাশিব, ভাই, আমার একমাত্র প্রার্থনা, ভিক্ষা, অমুরোধ, এ বিবাহের যৌতুকরূপে যাহা কিছু দিবে, তৎসমুদায়েরই পরিবর্তে এই একমাত্র অশীতিপর বৃদ্ধকে—সে কালের শিক্ষার পূর্ণমূর্তি এই দেওয়ানজীকে, তোমার ভাবী জামাতার অভিভাবক-রূপে বিবাহের মঙ্গল্য-স্বত্বের সঙ্গে বন্ধন করিয়া বরবধর সঙ্গে পাঠাইয়া দিবে। এই বৃদ্ধের মিন্ধ শান্ত হাশ্চোচ্ছল প্রশান্ত হৃদয়ের কর্তব্যজ্ঞানের শীতল ছায়ায় বসিয়া তাহারাও যেন এই আদর্শ লইয়া প্রাচীনের মর্যাদা রক্ষা করিতে—সেবা করিতে—অক্ষয় কীর্তি স্থাপন করিতে—তাহাদের অমূল্য প্রাণ এই বৃদ্ধেরই আদেশে পরহিতব্রতে বায় করিয়া, আমাদের বংশ উজ্জল করে।”

৬

জ্ঞানানন্দ বাবুর ভগিনী—নন্দরাণী ভ্রাতৃজায়ার চন্দনধেনুর শ্রাদ্ধ উপলক্ষে একমাত্র পুত্র স্ত্রীধীরকে সঙ্গে লইয়া সাত-আনীতে আসিয়াছিলেন। মায়ার সহিত স্ত্রীধীরের ঘনিষ্ঠতা এই কয়দিনেই এত বাড়িয়া উঠিয়াছিল যে, তাহাতে কেহই বুঝিতে পারিত না যে, ইহাদের মধ্যে কোন আত্মীয়তা নাই—এইমাত্র কয়দিনের পরিচয়। খাওয়া-শোওয়া, গল্প-গুজব সবই পরস্পরের একসঙ্গে হওয়া চাই। কেহ কাহারও সঙ্গ ক্ষণেকের জন্তও ত্যাগ করিতে ইচ্ছুক নহে। সদাশিববাবু একদিন প্রাতঃকালে নারায়ণপুরে প্রত্যাগমনেচ্ছা জ্ঞানানন্দবাবুকে জ্ঞাপন করিলেন। সেইদিনেই মায়ী চলিয়া যাইবে শুনিয়া নন্দরাণী দেওয়ানজীকে ডাকাইয়া বলিলেন, “আজ তো কিছুতেই যাওয়া হ’তে পারে না, ক’দিনই কাজের গোলমালে মায়াকে, আমি একবারও দেখতে পাইনি।

ত্ৰচাৰ দিন পরে যাওয়ার ব্যবস্থা করলে ভাল হয়। দাদা-বাবুকে আপনি বলুন, এখন যাওয়া হ'তেই পারে না। বিশেষ, মায়া চ'লে গেলে, ঐ দৃষ্টি ছেলে সুধীরের জন্য আমাকেও শিগ্ৰি চলে যেতে হ'বে। মায়ার সঙ্গে বেশ মিলেমিশে আছে, আমাকে কোন ঝক্কিই পোয়াতে হচ্ছে না। আর মায়াও বেশ হাসিমুখে সুধীরকে নিয়ে বাড়ীময় খেলা ক'রে বেড়াচ্ছে, এই সময়টা একটু অন্তমনা হ'য়ে থাক্। বাড়ী গিয়ে আবার সব কথা মনে প'ড়ে মুখটি ভার ক'রে থাকবে। যদি এখানে থাকার জন্ত মায়ার মনের মধ্যে কোন কষ্ট হচ্ছে বুঝতে পারতাম, তাহ'লে আমি এ ক্ষেত্রে কখনই কর্তাম না। মায়াকে দেখে ওর ব্যবহার - কথাবার্তা শুনে আমিও খুব আনন্দিত হয়েছি। মনে মনে কত আশাও করছি, আমার সব কথা এখনও আপনাদের বলবার কোনও সুবিধে পাই নি।”

বৃদ্ধ দেওয়ানজী নন্দরানীর কথায় আনন্দের সহিত সম্মতি জ্ঞাপন করিয়া বলিলেন, “দিদি, তাই হবে। তোমার লুকুম না পেলে এখন আর আমরা এ বাড়ী হ'তে যাচ্ছি না। যদি দৈবচক্রে তোমা হ'তে মায়ের স্নেহ, ভগিনীর প্রীতি সবই পাচ্ছি, তবে তা হেলায় হারাবার ইচ্ছা অতিবড়. পাষাণ্ড আমারও নাই। বিশেষ যখন তোমার যত্নে মা-হারা মায়া ও প্রণব দুজনেই মায়ের অভাব ভুলে আছে। তাদের সে সুখ থেকে বঞ্চিত করতে আমার তত ইচ্ছে হচ্ছে না। দিদি, তুমি বা ক'দিন নিজের ঘরবাড়ী ছেড়ে এমন ক'রে এখানে থাকতে পারবে! হরিপুর হ'তে তোমার আবার ডাক এই কবে আসে দেখ, ডাক পড়লেই তো আমাদের কেলে রেখে চলে যাবে! তখন ত আর আমাদের

দিকে একবারও ফিরে চাইবার সময় পাবে না। আজ না হয় আমরা না গেলাম, কিন্তু আর একদিন যেতেই হবে যে দিদি !”

নন্দরাণী সলজ্জ হাস্যমুখে বলিলেন, “দেওয়ানজী, আমি যদি না যাই, আপনারা যাবেন না তো ?”

“না দিদি, তুমি জন্ম জন্ম সেখানে যাও, তোমার না যাওয়ার কথা যেন আমাদের কোনদিন ভাবতে না হয়। আমরা যতই কেন স্নেহ-যত্নের কাঙ্গাল হই না, তবুও কখনও কোন দিন যেন এভাবে তোমাকে আমাদের মধ্যে পেতে না হয়। স্বামীর ঘরের মান, মর্যাদা, যশ অক্ষয় হোক। স্বামীর আয়ুর সঙ্গে সঙ্গে স্ত্রীরও আয়ু বৃদ্ধি হোক এই আমাদের প্রার্থনা। নিজেদের অভাবের দিকে চেয়ে, তোমাকে আমরা এখানে এভাবে কয়দিন বা রাখতে পারি দিদি ! তাতে আমরা একটুও সুখী হ'ব না। তোমার সাজান সংসারের মত আমাদের এই ভাঙ্গাবাড়ী ছোটো সাজিয়ে দিয়ে আশীর্বাদ করতে করতে তুমি তোমার বাড়ী চ'লে যাও দিদি। এর বেশী চাইবার আমাদের আর কিছুই নাই।”

“দাদাকে আজ প্রণব ও মায়ার বিবাহের কথাই বলবো। আপনি মায়াকে আমাদের দেন। আপনি যদি মত দেন তা'হলে নারায়ণপুরের দাদাবাবুর অমত হবে না।”

“দিদি, মত দেওয়া কি—আমিই যে এতক্ষণ ধ'রে বাবুদের কাছে সদরে এ বিবাহের ঘটকালী কচ্ছিলাম। দিদি, তোমার আমার একমত। বাবুদেরও এ বিবাহে অমত নেই। এক বছর পরে—কালারশৌচ গেলে পর বিবাহের দিন স্থির হবে। আজ পরস্পরের বাকদান এক প্রকার হ'য়ে গেছে।”

সনাতন ও নন্দরাণী উভয়ে বিবাহের নানা কথাবার্তা

কহিতেছেন, এমন সময় সেখানে স্নানমুখে সুধীর আসিয়া কহিল,—“মা, মায়াদিদি আমার সঙ্গে আড়ি দিয়েছে, কথা কচ্ছে না। মুখ ভারি ক’রে বাগানে ব’সে রয়েছে। মা, তুমি বল না আমার সঙ্গে কথা কহিতে। আর আমি ছুঁছুঁ হব না।”

“কখনও ছুঁছুঁ হবে না—কখনও ছুঁছুঁমি করবে না ত?”

“না, আমি খুব ভাল হব। আমার দোষ কি শোন না, আমি দিদিকে বলেছি,—‘তুমি যে মালা গেঁথেছ, কাকে দেবে? তোমার যে বর হবে, তাকে?’ এই কথায় দিদি বলে—‘তুমি বড় ছুঁছুঁ, তোমার সঙ্গে আড়ি।’”

“ও, এই কথা! তুমি তোমার মায়াদিদিকে বলগে—তুমি যদি আমার সঙ্গে আর কথা না বল, তবে তোমাকে আর কখনও দিদি বলে ডাকবো না; আর তোমাকে আমার বৌদিদি হ’য়ে আমার সঙ্গে সেধে সেধে কথা কহিতে হবে।”

“মা, তবে বলিগে, যে তুমি, দিদি হ’য়ে রাগ কর, আর বৌদিদি হ’য়ে কথা কও।”

“তাই বলগে।”

মায়ের কথায় সরল হাস্যের লহরী তুলিয়া দিয়া আনন্দে নৃত্য করিতে করিতে সুধীর বাগানে আসিয়া দেখিল, মায়া মালা গাথা বন্ধ করিয়া শ্বেত পাথরের বেদীর উপরে—ঝরা শেফালি কুলের রাশি লইয়া সাজাইয়া সাজাইয়া শ্রীশ্রীচূর্ণা নাম লিখিয়াছে। আর তাহার নীচে খড়িতে লিখিয়াছে—

সেবিকা শ্রীমতী মায়াদেবী।

সুধীর অনেকক্ষণ দূর হইতে চাহিয়া চাহিয়া দেখিল, তাহার উপর নানাবর্ণের ফুল সাজাইয়া সাজাইয়া মায়া নিজের নামটি

ভূর্গানাংমের মত ফুল দিয়া লিখিতেছে। বাগানের ষত সব ফোটা ফুলী বাতাসময় সুবাস ছড়াইয়া, নিজের অরণ্যবাস-কাহিনী জগৎময় প্রচার করিয়া, সাধারণের মনোরাজ্যে প্রবিষ্ট হইবার জন্ত বাতাসের সঙ্গে ছলিয়া ছলিয়া, যেন ছোট শিশুর মত ঘাড় নাড়িয়া কত কল্পনা-জল্পনা করিতেছে। আর পুষ্পরাণী মায়াকে যেন ইঙ্গিতে বলিতেছে, আমাদের তুলিয়া লইয়া ঐ নাম-সংস্পর্শে ফুলজীবনের সার্থকতা করিয়া দাও। আমরাও যেন ফুলে-গড়া ঐ নাম-মাহাত্ম্যে জীবন দিতে দিতে অনন্তের পথে সুবাসের মত চলিয়া যাইতে পারি। ওগো সুন্দরীর সুবাস, আমাদের বঞ্চিত করিও না, তোমারই পদা-হস্তে আমাদের বহুজীবনের পাশ ছেদন কর। দেবতার নামে চরণে অর্পণ কর।

সুধীর সেই নব-ফোটা ফুলের সঙ্গে আলাপ করিবার জন্ত— কথা কহিবার জন্ত, তাহাদের প্রত্যেকের বোটারূপ স্কন্ধটি ধরিয়া বলিতে লাগিল—“ও ভাই বেলফুল, ও ভাই যুঁইফুল, ও ভাই গোলাপ, তোমরা সবাই শোন—আজ যে দিদি আড়ি দিয়ে রাগ করে আমার সঙ্গে কথা কছে না, সেই একদিন আমার বৌদিদি হ'য়ে আমার সঙ্গে কথা কইবেই।”

“সুধীর!” খুব গ্রামভারী আওয়াজে মায়া বেদীর উপর হঠতে বলিল, “সুধীর, বেশ ভাই, আমি তোমার সঙ্গে কথা কচ্ছি, কিন্তু ও কথা আর কখনও বলবে না বল।”

“তা কেন, আমি ত মাকে বলেছি যে, দিদি আমার সঙ্গে কথা কছে না। মা আমায় বলে দিয়েছেন এই কথা বলতে— তোমার দিদিকে বলগে, তুমি দিদি হ'য়ে রাগ কর, আর বৌদিদি হ'য়ে কথা কও। মা বলতে বলেছেন, আর আমি বলব না!”

তা কেন? আমি তো ফুলদের সঙ্গে কথা কচ্ছি, আমি তো আড়ি দেওয়া লোকদের সঙ্গে কথা কচ্ছি না, আমি বাগানময় সব ফুলদের ব'লে বেড়াব যে, 'আজ যে দিদি হ'য়ে রাগ কচ্ছে,—সেই একদিন নৌদিদি হ'য়ে সেধে সেধে কথা কইবেই।"

সাত আট বৎসরের বালক সে আর কি বুঝবে—এই কথা কাহার মর্মে কিরূপভাবে প্রবেশ করিতে পারে। সুধীর দেখিল, তাহার মায়াদিদি এই কথা যতবার শুনিতেছে, ততবারই ব্যাকুল-ভাবে চারিদিকে চাহিয়া দেখিতেছে, আর বলিতেছে, "এ কথা এখনি কেহ শুনিতে পাইলে তাহাকে ছুঁছুঁ বলিবে—শয়তান বলিবে—আরও কত কি বলিয়া নিন্দা করিবে।" কিন্তু সে এইমাত্র বুঝিল যে, যাহার সহিত আড়ি, সেই যখন এই কথা শুনিয়া কত রকম খোষামোদ করিয়া তাহার সহিত ভাব করিতে বাস্তু—তখন আর অপরে যাহাই বলুক না কেন, তাহার ব্যবস্থা করিতে সে জানে। অপরকে শাসন করিতে হইলে ক্রন্দন করিতে করিতে বিছানার বালিস উঠানের নর্দমায় ফেলিয়া দিতে, ধোয়া বাসনে ধূলা বালি দিতে, মা'র ভাঁড়ার ঘরের জিনিস পর্য্যন্ত ফেলিয়া দিতে, পরণের কাপড় দাঁতে কাটিতে, অবশেষে সর্বাঙ্গ নগ্ন করিয়া মাটির উপর গড়াগড়ি দিতে, তাহার সমান আর কাহাকেও কেহ কখনও দেখে নাই।

বীরদর্পে পদক্ষেপ করিতে করিতে সুধীর বাগানের যত সব কোটা ফুলের গাছের নিকট গিয়া, বিরাট অভিজ্ঞতায় অতি স্পষ্ট স্পষ্ট করিয়া তাহার ভবিষ্যৎ আশার কথা বলিয়া বেড়াইতে লাগিল। সুধীর তাহার ভবিষ্যৎ আশার কথা ছোট বড় প্রত্যেক ফুলগাছকে বলিয়াও কান্ত হইতেছে না। মায়্যাও শত কাকুতি-

মিনতিতে শত প্রলোভনে তাহাকে অগ্রদিকে আকৃষ্ট করিতে পারিতেছে না। প্রায় আধ ঘণ্টা এইরূপ ঝগড়া করিয়া, সুধীর বোধ হয় শান্ত হইয়া কতকগুলি ফোটা, আধফোটা, সাদা, লাল, একরাশ ফুল কোঁচার কাপড়ে সঞ্চয় করিতে করিতে বলিল, “আমিও ফুলের লেগায় এ কথা লিখিয়া রাখি। আমার নামও লিখিয়া রাখিব!” মায়ার সম্মুখের রুমপ্রস্তর নির্মিত বেদীর উপরে ফুলের রাশি ঢালিয়া খড়ির জন্ত বেদীর চারিদিকে একবার তাঁর অনুসন্ধান-দৃষ্টি নিক্ষেপ করিয়া নিজেই বলিল—“আর ত কোথাও খড়ি পাব না—বাই দাদার পড়ার ঘর থেকে খড়ি আনি, নেই বা কেউ দিলে।” বাড়ীর দিকের পথে একটু যাইয়াই একটা লোহার ছোট্ট কাঁটা পেরেক দেখিয়া বলিয়া উঠিল— “এতেও লেখা হ’তে পারে—তবে পাথরে দাগ হবে—তা হ’ক, এখানে কেউ আমাকে বকে না—এতেই হবে।” তারপর যেমন কথা তেমনই কাজ। সুন্দর মন্বণ করা পাথরের উপর সেই শান্ত শিষ্ট সুবোধ সুধীর প্রজ্ঞাপতির বিধিলিপির উপরেও বৃষ্টি নিজের অনাস্ত ধারণা লিখিয়া দিল—“আজ বে দিদি হ’য়ে রাগ কচ্ছে, সেই একদিন বৌদিদি হ’য়ে সেধে কথা কইবেই।” তারপর পূর্ক-সঞ্চিত নানাবর্ণের ফোটা আধফোটা ফুলের রাশি লইয়া সেই খোদিত ক্লেথার উপর পুষ্পবৃষ্টি করিয়া ফুলের লেখা করিয়া দিয়া হাততালি দিয়া সুর করিয়া নাচিয়া গাহিয়া মায়ার দিকে চাহিয়া বলিয়া উঠিল—“আমার এ লেখা তোমার চেয়ে খুব ভাল হয়েছে। তোমার সাদা ফুল সাদা পাথরে মিশে গেছে। আমার লেখা কাল পাথরের উপরে খুব মানিয়েছে। তুমি হার স্বীকার কর, তবে আমি চুপ করবো।”

মায়া বলিল—“তুমি ফুলের লেখা মুছে ফেল, তবে আমি ভাব কর্ণো, তা না হ'লে আমি কথা কব না।”

এমন সময় প্রণবকে দেখিয়া মায়া ছুটিয়া সেখান হইতে পলাইয়া গেল। সুধীর তাহার সেই ভবিষ্যৎ বার্তা দিগ্দিগন্তে প্রচার করিতে লাগিল। সুধীরের সে কথা ও হাশ্ব-লহরী প্রণব ও মায়ার কর্ণে এক সঙ্গে একই ভাবে প্রবেশ করিয়াছিল কি না, তাহা তাহাদিগকে আর একদিন জিজ্ঞাসা করা যাইবে।

জ্ঞানানন্দবাবুর স্বর্গীয় পিতামহ অচ্যুতানন্দ মুখোপাধ্যায়ের সময় এই সাত-আনীর নামকরণ হয়। তাঁহার দুই পুত্রের মধ্যে জ্যেষ্ঠ ভবানন্দকে পৈতৃক সম্পত্তির নয় আনা দিয়াছিলেন বলিয়া লোকে তাঁহাকে নয়-আনীর জমিদার বলিত ও তাঁহার আবাস-ভবনকে নয়-আনী বলিত। কনিষ্ঠ হরানন্দ সাত আনার অংশ পাইয়া সাত-আনীর জমিদার ও তাঁহার আবাস-ভবন সাত-আনী নামে আখ্যাত হইয়া আসিতেছে। কি কারণে যে দুই ভায়ের মধ্যে প্রতিদ্বন্দ্বিতা চলিত ও এখনও নয়-আনী সাত-আনীতে বহু দূর জ্ঞাতির জ্ঞাতিদের মত মুখ দেখাদেখি বন্ধ হইয়া আছে, তাহা কেহই জানে না। লোকমুখে অনেক কথাই প্রবাদ বাক্যের মত চলিয়া আসিতেছে। এখন নয়-আনীর জমিদার নব্যশিক্ষিত বৃক দেবনারায়ণ মুখোপাধ্যায়। সম্প্রতি বি-এ পাশ করিয়াছেন। দেশে প্রবাদ, আর পড়াশুনা করা হইবে না। উপযুক্ত কর্মচারীর অভাবে জমিদারী একেবারে নষ্ট হইতে বসিয়াছে। নিজেদের কর্তৃত্বে সেই সব মহল মজকুর দেখিবেন। এবং দেশের যতটুকু সুখ-স্বাচ্ছন্দ্য বাড়াইতে পারেন, তাহার জন্য রাস্তা ঘাট ইত্যাদির দিকে নজর দিতেছেন। শিকারে তাঁহার এত আনন্দ ও অধাবসায়

যে, সেকালে কোনও ক্ষত্রিয় সম্ভানের তেমন নৃশংস শিকার প্রেরিত্ব ছিল কি না, তাহা কোন ঋষি কোন পুরাণে লিখিয়া যান নাই।

প্রাতে অশ্বারোহণে বাড়ীর বাহির হইয়া দামোদরের বাধের ধারে নানা জাতীয় পক্ষিকুল বিনষ্ট করা তাঁহার একটা দৈনন্দিন কার্য। তাঁহার বিশাল চক্ষু দুইটি মেমন অব্যর্থ সম্ভানের সহায়তা করিয়া, পক্ষিকুলের ভীতি উৎপাদন করিত, তেমনই এই দামোদরের তীরে ছোট ছোট পল্লীর নরনারীর প্রতি অতি কুৎসিত দৃষ্টিপাতে যে শিকার-বাসনা তাঁহার মনের মধ্যে উঠিত, তাহাতে তাহারাও কম ভীত হইত না। নদীর বাধের নীচে অনেক পল্লীতে তেমন ভাল জলাশয় না থাকাতে প্রত্যেক গৃহস্থের ছোট বড় ছেলে-মেয়ে—সকলেই নদীর ঘাটে আসিয়া স্নান করিত। পল্লীগ্রামে পুরুষেরা স্বভাবতঃই বেলায় স্নান করেন। মেয়েরা প্রাতঃকালেই স্নান করেন। স্নানান্তে আচ্ছ বস্ত্রেই জলপূর্ণ কলসী লইয়া বাড়ী যান। এ দেশের এই দরিদ্রতার যুগে—ইতরভদ্র সকলেই অসঙ্কোচে নদীর ধার হইয়া, গ্রামের মধ্যে সদর রাস্তা দিয়া বাড়ী যান। ইহাতে কে কাহার নিন্দা করিবে—সকলেরই অবস্থা সমান। যাঁহার বা একটু ভাল অবস্থা, তাঁহার ভাগ্যে এ কার্যের জন্ত লোক মেলা অতি ছুঁট। দেবনারায়ণবাবু প্রতিদিন প্রাতঃকালে নদীর ধারে, সাধারণের স্নানের ঘাটের নিকট ছোট ছোট ঝোপে বসিয়া কখনও নানাপ্রকার শিকারে বাস্ত থাকিতেন, কখনও বা শিকার-ক্লাস্তি অপনোদন জন্ত নৃত পক্ষিকুলকে উপাধান করিয়া পথিপার্শ্বে শায়িত থাকিতেন। প্রবলপ্রতাপ জমীদার এই অল্প কয় দিন দেশে আসিয়া, সমস্ত

পুরাতন প্রবীণ কর্মচারীদিগকে তাড়াইয়া দিয়া নিজের বন্ধু-বান্ধবদের মধ্য হইতে পছন্দ করিয়া জমীদারীর কর্মে নিয়োগ করিয়াছেন। তাঁহার ধারণা এখন আর সেকালের মাথা লইয়া কোন কাজ করা চলে না। নূতন রক্তে জন্ম—নূতন শিক্ষায় শিক্ষিত—নবীন উদ্যমে উন্নত যুবকের দ্বারা যত কাজ পাওয়া যায়, প্রবীণের মস্তিষ্ক-বিকৃতির অবস্থায়—সেকালেব সেই অতি পুরাতন লোক লইয়া তাহা কখনই হইতে পারে না। নিজের ধারণামতে নব্য-সম্পদায় নব্য-যুবকদের সঙ্গে লইয়া যত ভাল কাজ করিয়াছেন, আবার তত বেশী মন্দ কাজ করিতে কোনদিনই কুণ্ঠিত হন নাই। দেশের লোক সেই ভয়ে এই খামখেয়ালী যুবকের সম্পর্ক হইতে যতটা পারেন, নিজেদের বাচাইয়া চলিতে যথাসাধ্য চেষ্টা করেন। কিন্তু এই যে প্রতিদিন নদীর স্নানের ঘাটের মধ্যে আশে-পাশে—ঝোপে-ঝোপে বসিয়া, তাঁহার অবার্থ অনুসন্ধান-দৃষ্টিতে ইতর-ভদ্র সকল ঘরের নারীর মধ্যে কি শিকার অনুসন্ধান করিতেছেন, তাহার কৈফিয়ৎ কে চাহিবে? দেশের রাস্তা ঘাট ভাল করিয়া দিয়া প্রথমে তিনি যতটা স্ত্রী নাম অর্জন করিয়াছেন—এখন তাঁহার তেমনই দুর্নাম—অপযশ সকলেই করিতেছে।

তার পর একদিন গ্রামের সব প্রবীণের দল বাবুর কাছারীতে বাইয়া, তাঁহার সহিত সাক্ষাৎ করিয়া, তাঁহাদের অভিযোগ অতি মিনতি করিয়া জানাইলেন।—‘বাবু, যদি শিকার করিতে হয়, তবে ঘাটের পথ ছাড়িয়া বন-জঙ্গলের মধ্যে শিকার করুন। এখানে আপনি প্রতিদিন শিকারে আসিলে, আমাদের মেয়েদের বিশেষ অশুবিধা হয়। গ্রামের মধ্যে স্নান ও পানের জল নাই, আমাদের যে না খাইয়া মরিবার উপক্রম হইয়াছে।’

বিশেষ আদর-আপ্যায়নের পর বাবু বলিলেন,—“দেশে স্ত্রী-স্বাধীনতা না থাকায়, তোমাদের এই সব কুসংস্কার চিরদিন সমানভাবে তোমাদিগকে আচ্ছন্ন করিয়া রাখিয়াছে। এখন সে দিন—সে যুগ নাই। এখন স্ত্রী-পুরুষের সমান অধিকারের যুগ চলিয়াছে। প্রত্যেক শিক্ষিত দেশেই এখন নারী-মর্যাদা বাড়াইবার জন্য অবরোধ-প্রথা তুলিয়া দিয়াছে। তোমাদের অন্ধ সংস্কার ত্যাগ কর। দেশকে উন্নতির পথে ঠেলিয়া তুলিতে হইলে—বীর সাহচর্যে আসিতে স্ত্রীলোকদের কোনদিন কোনও প্রকারে বাধা দিও না। ইহাতে অপমান নাই। ইহাই মনুষ্যত্ব। অনেক শিক্ষিত দেশের লোক স্বামি-স্ত্রীতে মিলিয়া শিকারে যায়, একসঙ্গে একই জীব একই লক্ষ্যে শিকার করে। তাহাতে কত আনন্দ, তাহা তোমরা বঝিতে পারিবে না। আমার কোনও কর্মের উপর তোমরা বিচার-বুদ্ধি প্রয়োগ করিও না। তাহাতে কখনই কোনও সফল হইবে না। তোমাদের ধারণার কোন মূল্য নাই। বিশেষতঃ, ভবিষ্যতের জন্য বলিতেছি, কখন কেহ আমার কার্যের উপর দৃষ্টি দিও না। যদি পার, আমার উপর নির্ভর করিয়া দেশের মুখোচ্ছল করিও।”

যাহারা আসিয়াছিলেন, তাঁহারা বিস্ময়ে নির্বাক হইয়া গেলেন। ইহার মধ্যে সর্বাপেক্ষা প্রবীণ রামদয়াল বসু মহাশয় বলিলেন—
“নারীর মর্যাদা দিতে আমাদের দেশ—আমাদের শাস্ত্র বিশ্বের আদর্শ। হিন্দুর নিকটে পরস্ত্রী মাতৃস্থানীয়। নারীমাত্রেই মাতৃশক্তিতে পূর্ণ। নারীমাত্রেই সেইজন্য আমাদের নিকট সর্ব সময়ে পূজ্যা। শক্তির নিকট—এই প্রকৃতি শক্তির নিকট পুরুষ চিরদিন নতশিরে রহিয়াছে। এ তত্ত্ব, এ শিক্ষা আর কোন দেশে

আছে ? সনাতন শিক্ষার শেষ পরীক্ষাই বোধ হয় বিশ্বমাতা নারীর পূজা।”

দেববাবু এই প্রবীণ বৃদ্ধের কথায় জ্বলিয়া উঠিয়া বলিলেন—
“বচনে বাঘ মারা যাইলে এতদিন ধরিয়া অকস্মীর দল এই হিন্দু পৃথিবীর উপরে নিজেদের আধিপত্য প্রচার করিতে পারিত। কিন্তু তাহা পারিয়াছে কি ? কেন পারে নাই, তাহা তোমাদের জানা নাই। সেই ভুল সংশোধন করিতে হইলে, আমার আদর্শে নিজের স্ত্রী-কন্যা ভগিনীদিগকে পাশ্চাত্তা শিক্ষায় শিক্ষিত করিয়া—পাশ্চাত্তা আদর্শে তাহাদের সর্ব সমক্ষে বাহির হইবার অবাধ ক্ষমতা দাও। তাহারাও যে নিজেদের সামর্থ্যে নিজেদের ভরণ পোষণ করিতে পারে, তাহার আদর্শ আমাদের দেশের বাহিরে প্রত্যেক মহাদেশেই আছে। সেইভাবে তাহাদের মানুষ কর। অন্ধকারময় গৃহ-কক্ষটিই তাহাদের বাসস্থান নহে। আলোকের উন্মুক্ত ক্ষেত্রেও তাহাদের আসিবার ক্ষমতা আছে।”

অবগো রোদন করিয়া কোন ফল নাই বুঝিয়া, ভদ্রমণ্ডলী উদ্ধত নবীন জমিদার মহাশয়ের নিকট হইতে চলিয়া আসিয়া জ্ঞানবাবুর শরণাপন্ন হইলেন। জ্ঞানবাবু বলিলেন—“ও বাড়ীর সহিত পুরোনানুক্রমে আমাদের মনোমালিণ্য। ইহার প্রতিকার আমার দ্বারা সম্ভব হইবে না। তবে আমি এই পর্যাণ্ত বলিতে পারি যে,—আমার কাছারীবাড়ীর পুষ্করিণীতে গ্রামের স্ত্রীলোক মাত্রেই আসিতে পারেন। সেখানে কাছারীর লোকজন আজ হইতে আর কেহ থাকিবে না। আপনারা নিজেদের তত্ত্বাবধানে কাছারী বাড়ী রক্ষা করুন।” সকলেই তাহার মঙ্গল কামনা করিতে করিতে নিজ নিজ বাড়ী ফিরিয়া গেলেন।

• পুরদিন দেববাবু সদলবলে শিকারে আসিয়া, নদীর ঘাটের উপরে নিজের তাম্বু বিস্তার করিয়া, বন্ধুদের প্রাতর্ভোজের আয়োজন করিতে ব্যস্ত হইলেন। • যাহাদের অন্ধকার হইতে আলোকে আনিবার জন্ত তাঁহার উদ্যোগ, তাহাদের কাহাকেও সেদিন আর দেখিতে না পাইয়া, বিশেষম বিস্মিত হইয়া বন্ধুবান্ধবদের সঙ্গে নূতন উপায় উদ্ভাবন করিতে প্রবৃত্ত হইলেন।

ঘটনাচক্রে সেইদিন সদাশিববাবু ও মায়া নদীর বাধের উপর দিয়া টমটমে চড়িয়া নারায়ণপুর হইতে বাহির হইয়া বায়ুসেবনের জন্ত এখান পর্য্যন্ত আসেন। এখান পর্য্যন্ত আসিবার উদ্দেশ্য—জ্ঞানবাবু প্রায়ই এই বাধের উপর বেড়াইতে আসেন। যদিই সাক্ষাৎ হয়। সাত-আনী হইতে নারায়ণপুরের বাবধান মাত্র দুই মাইল। ঘাটের উপর তাম্বু দেখিয়া জিজ্ঞাসা করিয়া জানিতে পারিলেন—দেববাবু বন্ধুবান্ধবের সহিত শিকারে আসিয়া এখানে তাম্বু ফেলিয়াছেন। সেইখান হইতে গাড়ী ফিরাইবার আদেশ দিলেন। কিন্তু হঠাৎ একটা উচ্চ কোলাহলে গাড়ীর ঘোড়া ক্ষেপিয়া উঠায়, সদাশিববাবু ও মায়া কোনও প্রকারে গাড়ী হইতে অবতরণ করিলেন। এদিকে ঘোড়ার চীৎকারে ও সহিস কোচম্যানের কর্কশ আওয়াজে তাম্বু হইতে দুই এক জন লোক বাহিরে আসিয়া, বহু দর্শনীয় বস্তু অনেক থাকা সত্ত্বেও কিশোর-যৌবনের সন্ধিস্থলে অনিন্দা-সুন্দরী মায়াকে দেখিয়াই তাম্বুর মধ্যে এ সংবাদ দিতে ক্ষণমাত্র বিলম্ব করিল না। এ শুভ বার্তা তাহাদের মধ্যে অতিরঞ্জিত হইয়াই প্রকাশ পাইয়াছিল, তাহাতে কোনও সন্দেহ নাই। দেববাবু বাহিরে আসিয়া সদাশিববাবুকে দেখিয়াই চিনিতে পারিলেন। নিকটে আসিয়া নমস্কার করিয়া

দাঁড়াইলেন। সময়োচিত আলাপের পরে মায়ার দিকে লক্ষ্য করিয়া বলিলেন—“এ মেয়েটিকে আমি ত কখনও দেখি নাই; এটি কি আপনারই কন্যা?”

অপরিচিত যুবককে সম্মুখে দেখিয়া মায়া পিতার হাত ধরিয়া কেমন যেন বিরক্ত হইয়াই বলিয়া উঠিল,—“বাবা চলুন, এখানটা আমার কেমন বিশ্রী বোধ হচ্ছে।”

৮

মহা সমারোহে মায়া তাহার মায়ের বাৎসরিক কার্য সমাধা করিল। এদিকে সাত-আনীতেও প্রণবকৃষ্ণ তাঁহার মায়ের বাৎসরিক কার্য করিলেন। বৃদ্ধ দেওয়ান সনাতন রায় সাত-আনীতে আসিয়া জ্ঞানবাবুর সহিত পরামর্শ করিয়া, বিবাহের দিনস্থির করিলেন, অগ্রহায়ণ মাসের প্রথমেই বিবাহ হইবে। সমস্ত কথাই স্থির হইয়া যাইবার পরও দেওয়ানজীকে বিশেষ কার্যোপলক্ষে দুই দিন সাত-আনীতে থাকিতে হয়।

সাত-আনীর সঙ্গে নয়-আনীর চিরদিনের অসম্ভাব। দেববাবু মায়ার অন্ত্র বিবাহের কথা স্থির হইয়াছে জানা সত্ত্বেও, মায়ার পাণিগ্রহণ করিতে চাহিয়াছেন। দেশময় প্রচার করিয়াছেন, জ্ঞানবাবুর ছেলের সঙ্গে এ বিবাহ হতেই পারে না। কারণ সদাশিববাবু নিখরচায় প্রণব অপেক্ষা ধনে, মানে, শিক্ষায় যোগ্য পাত্র পাইয়াছেন। এর মধ্যে একদিন একজন ঘটক গিয়া জ্ঞানবাবুকেও বলিয়া আসিয়াছেন যে, “সদাশিববাবু আমাকে আপনার নিকট পাঠিয়েছেন, বিশেষ প্রয়োজনীয় কথা আছে, একটু অন্তরালে আসিতে আজ্ঞা হয়।” তারপর ঘটক মহাশয়

বলেন, “সদাশিববাবুর একান্ত ইচ্ছা মায়ার বিবাহ অন্ত্র দেন। কারণ প্রণবের এই শিক্ষার অবস্থায় এ বিবাহ কোনও প্রকারে সম্মত হ'বে বলে মনে হচ্ছে না। তখন মনের চাপ্পল্যে বেশী না ভেবেই হঠাৎ একটা ছেলে-মানুষের মত যে কাজ ও কথা হয়ে গেছে তা' দয়া ক'রে ভুলে যান। তিনি নিজে বিশেষ লজ্জিত হয়েছেন বলে, আর আপনার সহিত দেখা পর্যন্ত করতে সাহস ক'রেন না। দয়া করে আপনি একটু পত্রে আপনার সব বক্তব্য অবশ্য লিখে দিবেন, আমার এই অনুরোধ।” ঘটকচূড়ামণি জ্ঞানবাবুকে এ কথা বলিতে বিশ্বস্ত হন নাই যে, “এটা সদাশিববাবুর পক্ষে ভাল কথা হ'ল না। বাকদানের পরে কথা ফেরান! আশ্চর্য্য কথা বাবু! একালে কতই না দেখতে হবে। কি করি বলুন বাবু, আমরা ত আপনাদের ছকুমের চাকর। যখন যেখানে যে কাজের জন্ত পাঠান না কেন, আমরা ত কখন 'না' বলতে পারি না। ত্রেতার রামরাজত্বের ছুগুখের কাজ এখন আমাদের করতে হচ্ছে। আমাদের মান নেই, অপমান নেই—যে যা ব'লবেন তাই কর্তে হ'বে।”

ইহাতে জ্ঞানবাবুও ছুগুখের সহিত সেই ঘটকচূড়ামণিকে দিয়া বলিয়া পাঠান যে, ইহাতে আমি বিশেষ প্রীতিলভ করিলাম। আমার আদৌ এ বিবাহে ইচ্ছা নেই। কেবল সনাতন দেওয়ান-জীর কথায় ভুলিয়া আমারও এ ভুল হইয়াছে। যাক্, ভগবান্ যা করেন মঙ্গলের জন্ত। পত্রে এ কথা লিখিয়া দিবার জন্ত অনেক প্রকারে অনুরুদ্ধ হইয়াও জ্ঞানবাবু পত্র লিখিতে সম্মত হন নাই। কোন প্রকারে বুঝাইতে না পারিয়া শেষে বলেন, “এক্ষেত্রে সম্মান ব্যবহারই উচিত ঘটক মহাশয়। হাজার হোক্, আবারো বন্ধ

সদাশিব, সে যখন পত্র দেয় নাই, পত্র দিতে সঙ্কোচ বোধ করেছে, তখন আমি কোন মতেই পত্র দেব না। পত্র লেখা অপেক্ষা আমি বরং সাক্ষাতে সব কথা বলাই সম্মত বিবেচনা করি। যাক্, আপনি এ শুভসংবাদের বাহক হ'য়ে এসেছেন, তার জন্তু ধন্যসামান্য প্রণামী নিয়ে যান। তা হ'লেও সকলেই বুঝতে পারবেন—আমি ইহাতে বিশেষ সুখী।”

জ্ঞানবাবু এ ঘটকচূড়ামণিকে কোন দিনই বিশ্বাসের চক্ষে দেখেন নাই। কারণ, কত স্থান হইতে কত ডানা কাটা পরী আনিয়া প্রণবের সঙ্গে তিনি বিবাহ দিবেনই, এ কথা বহুদিন ধরিয়া কহিয়া আসিতেছেন। এই প্রকার ভরসা দিয়া অনেক পথের খরচও ইতোমধ্যে তিনি গ্রহণ করিয়াছেন। কিন্তু বিশ্ববরণ্য পাত্রী উপস্থিত দৃষ্টি বহির্ভূতেই অবস্থান করিতেছেন। কোন দিন যে লোক চক্ষুর সম্মুখে আবির্ভূত হইবেন, তাহা বলিতে ঘটকচূড়ামণি এখন সম্মত নহেন।

দেওয়ানজী সাত-আনীতে আসিয়া এই সব ব্যাপার শুনিয়া স্তম্ভিত হইয়া জ্ঞানবাবুর মুখের দিকে চাহিয়া রহিলেন। অতি কুট বুদ্ধিতে দক্ষ বৃদ্ধ দেওয়ানজী আজ কাহার নিকট পরাস্ত হইতেছেন, ইহা বুঝিতে না পারিয়াই দু'দিন কাল এখানে বসিয়া রহিলেন। দেওয়ানজী পূর্বেই বুঝিয়াছিলেন যে, জ্ঞানবাবু কথা দিয়া তাহার পরিবর্তন কখন করেন নাই। ইহার মূল অন্তসন্ধান করা বিশেষ প্রয়োজন। যাক্, সময়ে সব বাহির হইবে। বৃদ্ধ দেওয়ান কর্মচারীদের সহিত কথায় কথায় নয়-আনীর দেববাবুর সহিত প্রজাদের ব্যবহার ও কাছারী-বাড়ীর পুকুর গ্রামের লোকের জন্তু দেওয়ার কথা শুনিতে পাইলেন। তখন আর বুঝিতে বাকি

রহিল না যে, এ বিশ্বের উৎপত্তি কোথায় ! দেওয়ানজী বলিলেন, “তবে ও পক্ষের সহিতই একটা দিন ধাৰ্য্য করিয়া বিবাহের আয়োজন করা যাউক—আর এখানে থাকিয়া আমার কোনও লাভ নাই। নয়-আনীর বাড়ীতেই নূতন কুটুম্বের আদর গ্রহণ করিতে প্রস্তুত হই।”

জ্ঞানবাবু বলিলেন, “সেই ভাল। তবে বলা বাহুল্য, আমার একমাত্র ভাবী পুত্রবধু মায়ার সহিত অন্ত্র বিবাহের প্রসঙ্গ তুলিয়া কেহ যেন আমার অপমান করিতে সাহস না করে। অপর কোন বংশ-মর্যাদায় শ্রেষ্ঠা দরিদ্রা সুন্দরী ব্রাহ্মণকণ্ঠার সহিত আপনার ঈপ্সিত নূতন কুটুম্বের সে বিবাহ হইবে। রূপে গুণে সে মায়ার মতই হউক, এই আমার প্রার্থনা ! দেবনারায়ণ যতই উদ্ধত, অসংযমী হউক না কেন, তাহার ভবিষ্যৎ বাহাতে ভাল হয়, তাহার জন্ত আমাদের চেষ্টা করিতেই হইবে। তাহার উপর অভিমান করিয়া, তাহার এই অভিভাবকহীন অবস্থায় প্রতিশোধ মানসে কোন প্রকারেই তাহার সহিত মন্দ ব্যবহার করিতে পারিব না। উপযুক্ত শিক্ষার অভাবে দেবনারায়ণ বংশের গ্লানির মত দেশময় যে সব অত্যাচার করিতেছে, তাহার জন্ত আমরাও দায়ী। আমাদেরই বংশের সম্মান চিরদিন যে একটা উচ্ছৃঙ্খল প্রবৃত্তিতে পড়িয়া থাকিবে, ইহা আমার পক্ষে যত নিন্দার, অপরের পক্ষে ততটা নহে।”

দেওয়ানজী বলিলেন, “আপনার শুভেচ্ছা কার্য্যে পরিণত হউক। তবে বোকাকে যত সহজে সুপথে আনা যায়, শয়তানকে তত সহজে সুপথে আনা যায় না। আর এটাও খুব সত্য যে, যে যত বড় শয়তান, তার তত বড় বুদ্ধিটি যদি একবার সুপথে অগ্রসর

হয়, তবে তার উন্নতি জন্মগত সুবোধ সুশিষ্ট হইতেও অধিক হইবে ইহা সুনিশ্চিত। ব্রাহ্মণের সন্তান চিরদিন ভোগের জগ্ন লালায়িত হইবে, ইহা কখনও সম্ভব নহে। একদিন না একদিন ব্রাহ্মণাশক্তির তেজেই তাহার মতি-গতির পরিবর্তন হইবে।”

দেওয়ানজীর প্রমুখাৎ সাত-আনীর এই সমস্ত সংবাদ অবগত হইয়া সদাশিববাবু কহিলেন, “আমি ত এ সব জানি না। কখনও একরূপ ভাবিও নাই যে, এত বড় চক্রান্ত করিয়া দেবনারায়ণ আমার অপমান করিবে। ধন্য তাহার সাহস! এখানেও ঘটক পাঠাইয়াছিল। ওঃ! এতবড় ধূর্তামি এই অল্প বয়সে দেব-নারায়ণের যে সম্ভব, তাহা স্বপ্নেরও অগোচর। তুমি সাত-আনী গেলে পর, ঘটক এখানে আসে এবং আমায় বলে ‘মায়ার সহিত দেববাবুর বিবাহের সম্বন্ধ করিতে তিনি এখানে শুভাগমন করিয়াছেন। এ বিবাহে পাত্র পাত্রী উভয়েই সুখী হইবে। এমন কি সদাশিববাবুর আদেশ পাইলে বিবাহের পর নয়-আনীর সমস্তই তুলিয়া আনিয়া এ বাটীতে বাস করিতেও পারেন।’ এই সমস্ত শুনিয়াই আমি বলিয়াছিলাম—‘আমার কন্টার বিবাহ অন্ত্র স্থির হইয়া গিয়াছে। পরম্পরের বাগ্দানও হইয়া গিয়াছে, এখন মাত্র বিবাহের মন্ত্র কয়টি পড়িতে বাকি আছে। আমি বড়ই দুঃখের সহিত জানাইতেছি যে, দেববাবুর মত শিক্ষিত যোগ্য পাত্রে কন্টা দান করিবার সুযোগ আমি নষ্ট করিয়া ফেলিয়াছি।’”

দেওয়ানজী ফিরিয়া আসিয়া সমস্ত কথা শুনিয়া বলিলেন—
“উত্তর ঠিক দেওয়া হয় নাই। রোগের উপযুক্ত ঔষধ প্রয়োগও হয় নাই। ইহাতেই শেষ হইবে বলিয়া মনে হয় না। নয়-

আনীতেও একবার দেখা দিয়ে এসেছি। দেববাবু বলিলেন—
 ‘সেদিন নদীর বাঁধে মায়াকে দেখিয়াছিলাম, তখন হইতে আমার
 ইচ্ছা আপনাদের জামাই হই।’ বেশ স্বচ্ছন্দচিত্তে একটা রূপ-
 মগ্ন উন্নত যুবক আমাকে মাতৃরূপের ব্যাখ্যা করিয়া শুনাইয়া
 দিল। আমিও অবনত শিরে সে অপমানের বোঝা মাথায় বহিয়া
 নীরবে বাড়ী ফিরিয়া আসিলাম। দোষ দিব কাহাকে? তাহাকে,
 না আমাদের এই সমাজকে? বোধ হয় তাহার উপরেও আর
 কাহাকেও দোষ দিলে দোষের হয় না। বাগ্দত্তা কন্যাকে যাহারা
 সাধারণ চক্ষুর উপর সাহেবী কায়দায় গাড়ী জুড়ি চড়িয়া বায়-
 সেবনের জন্ত ঘরের বাহির করে, তাহাদের এখন শত অপমান
 সহ্য করিতে হইবে। এ অপমান সহ্য করিবার শক্তি না থাকিলে,
 এই পল্লীগামে চতুর্দশ-বর্ষীয়া কন্যাকে লইয়া কে কবে এমন ভাবে
 সাহেবীয়ানা করিয়াছে? যাহারা দেশের প্রথার উপর, দেশের
 আচারের উপর নিজের স্বেচ্ছাচার আনিতে সাহস পায়, তাহাদের
 উপর সাধারণের তীক্ষ্ণ দৃষ্টি বিক্রমের আকারে পড়িবেই। এই
 যে এক উদ্ধত যুবক, কুমারী কন্যাকে কুৎসিত দৃষ্টিতে দেখিয়া
 রূপমগ্ন হইয়াছে—হিতাহিত-বোধশূন্য হইয়াছে—তাহাতে তাহার
 ধন, প্রভুত্ব, অবিবেকতা ও যৌবনই দোষী বটে। কিন্তু আমার
 মনে হয়, এই সব উদ্ধত প্রকৃতির সম্মুখে যাহারা প্রলোভন
 ধরিয়াছে, তাহাদের পাপ সর্বাপেক্ষা অধিক। এ পাপের
 প্রায়শ্চিত্ত করিতে উভয়েই বাধা।”

অগ্রহায়ণ মাসেই বিবাহ হইবে। শ্রাবণ মাসের মাঝামাঝি
 সময় হইতে তাহার আয়োজন চলিতে লাগিল। আশ্বিন কার্তিক
 দু’মাস পূজার ব্যাপারে বিশেষ ব্যস্ত থাকিতে হয়। কাজেই যতটা

বে কার্য্য করিয়া রাখা সম্ভব, তাহার জন্ত বৃদ্ধ দেওয়ানজী একবার সকলকে ডাকিয়া বলিয়া দিলেন। এতদিন থাকিতে বিবাহের উদ্যোগ পৰ্ব্ব দেখিয়া সদাশিববাবু বলিলেন, “দেখো দাদা, শেষে যেন বহুবাড়ীঘরে লঘুক্রিয়া না হ’য়ে পড়ে।”

“না, সে ভয় নেই। তবে কথা হচ্ছে, দুটো বিয়ের আয়োজন করা হবে কি না। তাই বা একটু সময় অল্প হ’য়ে যাচ্ছে।”

“দুটো বিয়ে! সময় অল্প! মানে!”

“সব কথার মানে কি কাজে পরিণত না ক’রে করতে পারা যায়? এটা এখন বলা হতেই পারে না। সময়ে কার্য্য শেষ হ’লে অর্থ নিজেই সামনে এসে দাঁড়াবে।”

সদাশিববাবু জানিতেন, আর জিজ্ঞাসা করা বুগা। শত অনুরোধে উপরোধে আর সনাতন রায়কে গলাইতে পারা যাইবে না। এটাও তিনি জানিতেন যে, যাহা অসম্ভব তাহাতে সনাতন রায় কখনও হাত দেন না। সাধারণে সনাতন রায়ের প্রত্যেক কর্ম্মের মধ্যেই একটা নূতন কিছু অদ্ভুত দেখিতে পাইতেন। যাহা কেহ কখনও বড় একটা করে নাই, সনাতন রায় তাহাই বিপুল উদ্ভমে করিবেন। অথচ তাঁহার দোষ কেহ কখনও বাহির করিতে পারেন নাই। এইরূপ স্বভাব ও প্রকৃতি লইয়া সনাতন রায় এই পরিবারের মধ্যে নিজের অসাধারণ কৃতিত্বকে সম্মানের আসনে বসাইয়া আজীবন অতিবাহিত করিতেছেন। আর অল্প দে কয়দিন বাকি আছে, তাহার মধ্যে কে উপরোধ, অনুরোধ করিয়া তাঁহার নিয়মের পরিবর্তন করিতে সাহসী হইবে! তাই সদাশিববাবু নিজের দিকে চাহিয়া যেন একটু ‘কিন্তু’ হইয়াই নীরবে অশ্রুত্র চলিয়া গেলেন। মনে মনে ভাবিতে লাগিলেন—“এ.

বৃদ্ধ করে কি ? বলে কি ? মায়ার ত বিবাহ হইবেই এ কথা স্থির ; তবে আর কার বিবাহ দিবার ইচ্ছা মনের মধ্যে গোপন করিয়া রাখিয়া, এত বড় উদ্যোগ পর্বের সূচনা করিতেছেন ! এ বিপদের মধ্যে আবার আমাকে জড়াইতে সাহস করিবে না কি ? এ ধারণা যদি তাহার মধ্যে অণু পরিমাণেও স্থান পাইয়া থাকে, তবে বৃদ্ধের চিরজীবনের কন্মের উপর ভুল একটা কলঙ্ক-রেখাপাত করিবে । এত বড় ভুল করিবে কি ? না, এ চিন্তা যে আমারই হৃদয়ের পরীক্ষা করিতেছে । আহা ! সেই মুখ— তাহা আমার সাধনার ধনের মত— আমার জীবনে পূর্ণ শান্তি দিয়া আমার নিকট অমরত্ব লাভ করিয়া রহিয়াছে, তাহা কি কখনও ইহ-পরজীবনেও ভুলিয়া যাইতে পারি ? কোন্ শুভ মুহূর্ত্তে আবার আমাদের চির-মিলনের দিন আসিবে, তাহাই আমার একমাত্র ধ্যানের বিষয় । ওগো, তোমরা বলিয়া দাও, আরও কতদিন আমায় এ ধ্যানের সমাধির অপেক্ষায় বসিয়া থাকিতে হইবে ।”

৯

অনেক সময় আমরা বিবেচনা করিয়া যাহা করিতে যাই, তাহাই যেন ঠিক আমাদের উপযোগী না হইয়া বিপরীত হইয়া দাঁড়ায় । নিজেদের সুবিধার জন্য যে কন্ম, যে সময়ে, যেমন করিয়া সমাধান করিতে পারিলে আমাদের যশ, মান, কীৰ্ত্তি—মোটের উপর আত্মগৌরব লোকচক্ষুর সম্মুখে অধিকতর ভাবে পরিস্ফুট হইবে, তাহাই করিতে প্রাণপণ করিয়া থাকি । কিন্তু কন্মশক্তি .কাহার প্ররোচিত হইয়া কখন অন্ত্রদিকে চলিয়া যায়, তাহা বুঝিতে

পারি না। আমাদের কর্মে অধিকার আছে—কর্মফলে অধিকার নাই। ভগবানও তাহাই বলিয়াছেন—

“কর্মণ্যোবাধিকারস্তে মা ফলেষু কদাচন।

মা কর্মফলহেতুভূম্মা তে সঙ্গোহস্বকর্মণি ॥”

কর্মের সূচনায় সঙ্কল্পের সহিত ফল কামনা থাকিলেও, আমাদের কর্মফল ভগবৎ ইচ্ছার ভগবানেই সমর্পিত হয়। ফলাফলে অনাসক্ত না হইলে বুঝি কর্মে অধিকার আসে না। ভগবৎ-প্রীতিতেই আমাদের সনাতন কর্মের আমরা অনুষ্ঠান করি। কিন্তু আমরা শিক্ষার গুণে এখন এমনই হইয়া পড়িয়াছি যে, কর্ম ও কর্মফল আমাদের আয়ত্ত করিয়াছে—আমরা কর্ম ও কর্মফল আয়ত্ত করিয়া ‘ইদং কর্মফলং শ্রীকৃষ্ণায় অর্পণমস্তু’ বলিবার শক্তি হারাইয়া বসিয়াছি। নিজেদের গর্কে যতই গর্কিত হইয়া তাহাদের আয়ত্ত করিতে যাই, ততই যেন তাহারা আসক্তির বর্মে নিজেকে আবৃত করিয়া আমাদের উপহাস করে। এই ভুলের নীতিতে পড়িয়াই আমরা কর্তব্যজ্ঞানশূন্য হইয়া পড়িতেছি। কর্ম-বৈফল্যে কর্মশূন্য হইয়া পড়াই আমাদের শিক্ষার সার নহে। কর্ম অনাদি অনায়ত্ত। কয়জন এ কথা বুঝিয়া কাজ করিতে পারি!

দেওয়ানজীর ইচ্ছা অগ্রহায়ণ মাসেই মায়ার ও প্রণবের বিবাহ হয়, সদাশিববাবু ও জ্ঞানবাবুর ইচ্ছাও তাই অগ্রহায়ণেই মায়ার ও প্রণবের বিবাহ হয়। কিন্তু ভাগা-বিধাতা কাহার অদৃষ্টে কি লিখিয়াছেন, তাহা পড়িবার সুযোগ এ মরুভূমিতে কাহারও ভাগে ঘটে না বলিয়াই যত বিড়ম্বনা। এই জীবন-নাটোর অভিনয়

করিতে বাধা জীব কতই না কর্ম-বিপত্তিতে পড়িয়া গুটিপোকায়
 গত নিজের কর্মপাশে নিজেই আবদ্ধ হইয়া পড়িতেছে। ভগবৎ-
 নীতিতে কর্মের কোশল আয়ত্ত করিতে যদি সমগ্র বিশ্ব পারিত,
 তাহা হইলে এতদিনে কর্মের সমাধি হইয়া বাইত। তাহা হয়
 কই? হয় না বলিয়াই ত বত কিছু বিপত্তি। এই কর্ম-বিপত্তি
 আমাদের আয়ত্ত করিয়া বিদ্রোহীর মত কার্যা করাইতেছে।
 আমরা তাহারই কামনা বাসনার মধ্যে প্রবুদ্ধ হইয়া আমাদের
 ভূতাতীত নিরঞ্জন বিরাট পুরুষকে - পরমানন্দের রাজরাজেশ্বরকে
 বিশ্বত হইয়াছি। আবার কতদিনে সে সূদিন আসিবে, যে দিন
 আমাদের কর্ম-কোশল আমাদের নিদান অবস্থা দেখিয়া, প্রাণের
 আবেগে নিজের পথে চলিয়া আনন্দিত হইবে—আনন্দ পাইবে।
 কর্মজয়ী দেবতার প্রসাদে কর্মের বন্ধন স্বতঃই মুক্ত হইয়া জীবনের
 সাফল্য আনিয়া দিবেনই। এ বিশ্বাস যেন আমরা কোন দিনই
 না হারাই।

বৃদ্ধ দেওয়ানজীর চিরজীবনের কর্মের একটি মহা পরীক্ষার
 দিন আসিয়া উপস্থিত হইল। কোনও দিন তাঁহাকে নিজের
 আরক কর্ম শেষ করিতে এত বেগ পাইতে হয় নাই। কুটিলতা
 অবলম্বন করিয়া কখনও কোন কাজে হাত দেন নাই। কিন্তু এই
 শেষ দশায় জীবন গরণের সন্ধিস্থলে বৃষ্টি বা সে সুনাম ও সে
 অধাবসায় সব বিসর্জন দিতে হয়। নিয়তিদেবী এমনই সমস্যায়
 ফেলিয়া বৃদ্ধ দেওয়ানজীকে পরিহাস করিতে লাগিলেন।

এই সময়ে একদিন রাত্রে দামোদর নিজের দামোদর বিস্তার
 করিয়া একটি খণ্ড-প্রলয়ের সৃষ্টি করিলেন। নিজের ক্ষমতায়
 কাহার সহিত যুদ্ধ করিবেন, এই উদ্দেশ্যেই যেন একবার চিরদিনের

নিজের গণ্ডী—কূল ছাপাইয়া, দুই পার্শ্বে যোজন পরিমাণ ভূমির উপর প্রতিবন্দী খুঁজিতে বাহির হইলেন। নিজের জন্মস্থান রামগড় পাহাড় হইতে বগ্যরূপ বাহনে আরোহণ করিয়া পশ্চিমধো ঝড় ও বৃষ্টি সেনাপতিদ্বয়কে সঙ্গে লইয়া, এমন এক দিগ্বিজয় করিতে সূত্রপাত করিলেন যে, তাহাতে বিজিতদেশে এমন কেহ রহিল না, যাহারা তাঁহার এই অমিত শক্তির প্রোপা মর্যাদা দিবেন—বা তাঁহাকে জয়মালা দিয়া বরণ করিয়া রাজাধিরাজের সম্মানে ভূষিত করিবেন। বিশ্বশত্রুর সঙ্গে তাঁর চির-সখাতা আছেই, এ ধারণা তাঁর তীরে বাস করিলেই উপলব্ধি করিতে বাধ্য। বিজ্ঞান ও অর্থশক্তির বলে প্রবল-প্রতাপান্বিত ইষ্ট-ইণ্ডিয়া-কোম্পানী এই বাধ্যতার উপরও দামোদরের অভ্যাচার হইতে রেল বাঁচাইয়া রাখিবার জন্ত একটি কাটাখালের সৃষ্টি করিয়া তাহারই পাশে দামোদরের তীরে-তীরে এমন এক সুদীর্ঘ বাধের সৃষ্টি করিলেন যে, তাহাতে তাঁর বাম তীর-বালু একেবারে ছিন্ন হইয়া গেল। সেই রাগ মিটাইয়া লইবার জন্ত নিজের দক্ষিণ বালু এমনভাবে প্রতি বর্ষার দিন বাড়াইতেছিলেন যে, বর্ষা, শরৎ, হেমন্ত পর্য্যন্ত এই তীরবাসীকে এই সব ঋতুর কোন শস্যই গ্রহণ করিতে না দিয়া—নিজের দামোদরের তৃপ্তি করিতেন। কিন্তু এবারে এই দুই সান্দ্রোপাঙ্গ সঙ্গে আনিয়া এতদিনের গায়ের ঝাল মিটাইয়া লইবার জন্ত মধ্যে মধ্যে বাঁধের অন্তিম পর্য্যন্ত উড়াইয়া দিয়া পুরাতন দ্রুত রাজ্যের সৌন্দর্য্যরাশি একেবারে নিজের বিরাট উদরে প্রবেশ করাইতে কণামাত্র করুণা প্রকাশ করিলেন না। পঞ্চাশ বৎসরের পর এই ভূরি ভোজনে বৃষ্টি শ্রান্ত হইয়া পড়িয়া-ছিলেন—তাই দামোদর নিজের বিরাট দেহ বিস্তার করিয়া

তীরের উভয়দিকে চারিক্রোশ স্থানে ৩৬ ঘণ্টার জন্য বিশ্রাম
সুখ উপলব্ধি করিয়াছিলেন, তাঁর সেই সুখনিদ্রার সময়ে
চারি শত গ্রামবাসীকে একেবারে সম্পূর্ণ নিরাশ্রয় হইতে হয়।
এই বিরাট অতিথির বিরাট উদর-গহ্বর পূর্ণ করিতে চির-
দিনের বাস্তু, পৈতৃক ধন-দৌলত—স্ত্রী-পুত্রসহ কত সংসার
আত্মোৎসর্গ করিয়াছে। তবে না কি বাঙ্গালী তেমন অতিথি-
সংকার জানে না, তাই যথাসর্বস্ব দিয়া স্ত্রী-পুত্রের হাত
ধরিয়া কোনমতে বৃক্ষে—উচ্চস্থানে কোথাও বা কটি নিমজ্জিত
জলে তিনদিন পর্য্যন্ত অভুক্ত থাকিয়া কোন রকমে প্রাণ
বাচাইয়াছিল।

নারায়ণপুরের দশা এখন কি হইয়াছে দেখুন—মাত্র জমীদার
সদাশিববাবুর প্রাসাদতুল্য আবাস ভবনের দ্বিতলে ৮।১০খানি
ঘর আছে। একতলার ঘর একেবারে জলে পরিপূর্ণ হইয়া
গিয়াছে। আর গ্রামের কোনও কিছুই নাই। কেবল চারিদিকে
জলরাশি মরুর মত ধুঁ ধুঁ করিতেছে। চারিদিকে যতদূর দৃষ্টি
চলে—কেবল জল—জল—আর কিছুই নাই। দুই ক্রোশের মধ্যে
২।৫টি অতি বৃহৎ বৃহৎ বট, অশ্বখ প্রভৃতি বৃক্ষ নিজেদের কাণ্ডেহ
নিমজ্জিত করিয়া যেন কোন্ যুগ হইতে সমাধিতে বসিয়াছে!

বহুবার রাত্রে সদাশিববাবু ও দেওয়ানজী লোকজন সঙ্গে লইয়া
দু'খানি বাচ্ খেলার ছোট নৌকা করিয়া বিপন্ন গ্রামবাসীদের
বহিয়া বহিয়া নিজের বাড়ীতে আনিতেছিলেন। রাত্রি ১টার পর
হইতে ৪টা পর্য্যন্ত ক্রমাগত ঘুরিয়া ঘুরিয়া যত লোকের সন্ধান
পাইলেন—প্রায় গ্রামের সকলকে আনিয়া, বাড়ীর দ্বিতলে ও
ছাদে কোনও প্রকারে বসাইয়া দেওয়ানজীর উপর তাহাদের

ভার দিয়া একবার শেষ খুঁজিয়া দেখিতে লাগিলেন—যদি আর কাহাকেও দেখিতে পাওয়া যায়। ঘণ্টার পর ঘণ্টা অতিবাহিত হইয়া গেল, সদাশিববাবু আর ফিরিয়া আসেন না দেখিয়া সূর্যোদয়ের পর দেওয়ানজী নিজে ও আরও দুই চারি জন লোক আপন নোকায় উঠিয়া সদাশিববাবুর সন্ধান লইবার জন্ত বাহির হইলেন। আর দ্বিতীয় যান নাই যাহার সাহায্যে আরও কেহ সন্ধান করিতে বাইতে পারে।

সদাশিববাবু অতি বাল্যকালে এই জলযান দুইখানি নারায়ণপুরে শিবসায়েরে ভাসাইয়া বাচ্ খেলা করিতেন। এখনও বৎসরের মধ্যে দশহরার দিনে নোকাদ্বয় নব-কলেবরে শোভিত হইয়া স্কুলের ছেলেদের বাচ্ খেলায় ব্যবহৃত হয়। গ্রামের মধ্যে—গ্রামের মধ্যে কেন চতুর্দিকের দশখানি গ্রামের কোথাও জলযান নাই, যাহাতে এই বিপদের দিনে কোনও প্রকারে কাহারও সাহায্য হয়। অশীতিপর বৃদ্ধ দেওয়ানজী বেলা ১০টা পর্যন্ত সেই প্রকার তুফানের মধ্যে কোথাও সদাশিববাবুকে দেখিতে না পাইয়া, নিরাশ হইয়া বাড়ীর দিকে ফিরিয়া আসিবার পথে দেখিলেন, একটি বট বৃক্ষের ডালে সদাশিববাবু যে নোকায় বাহির হইয়াছিলেন, সেই নোকাখানি বাঁধা রহিয়াছে, তাহা জন-শূন্য। নিজের নোকায় সঙ্গে সেখানিকে বাঁধিয়া লইয়া, বাহিরের বহুর তুফানের ঞায়ই মনের মধ্যে তুফান তুলিয়া, যৌবনের শক্তিকে স্মরণ করিয়া একাই দুইখানি নোকা ধীরে ধীরে বাহিয়া বাড়ীর প্রান্তে আসিয়া ঙনিলেন—মায়া ছাদের উপর হইতে চীৎকার করিয়া জিজ্ঞাসা করিতেছে—“জেঠা মশায়, বাবা— বাবা কোথায় গেলেন?”

দেওয়ানজী বাড়ীতে উঠিয়া মায়াকে বলিলেন,—“বাবু বোধ হয় আর কাহারও নৌকায় অন্ত্র গিয়াছেন। ভাবনার কারণ কি ? সঙ্গে ত একজন লোক রহিয়াছে। তা ছাড়া আমার সঙ্গে বারা ছিল, তাদের সব বাবুর সন্ধানে পাঠিয়েছি।”

মায়া জিজ্ঞাসা করিল,—“জ্যেষ্ঠা মশায়, কিম্বে তারা সব গেল ? বানের জল যে সর্বত্রই যায় নাই তারই বা ঠিক কি ?”

“সাত-আনীর দিকে তাদের পাঠিয়েছি, সেখানে বানের জল কম হওয়াই সম্ভব। এখান হ'তে সাত-আনী পাঁচ-ছ হাত উচুতে। অনেকগুলি কপাট ও কাঠ বানের জলে ধ'রে একসঙ্গে বেঁধে তাতেই কোন রকমে নির্ভর ক'রে, তাদের সাত-আনীতে পাঠিয়েছি। বাবুও বোধ হয়, এই সব লোকের ব্যবস্থার জন্তে, সেদিকেই গেছেন। বাবুর নৌকায় ভৈরবও ছিল সেও গিয়াছে। সে সঙ্গে থাকায় আমি অনেকটা নিশ্চিত। তা মা এখন বাবুর ভাবনা না ভেবে এই তিন চারশো লোকের আজকের খাবার ব্যবস্থা কি করছ ? তোমার ঘরে দাঁড়িয়ে তোমার সব ছেলেরা কি উপোস দেবে ?”

“একবার দেখুন দেখি জ্যেষ্ঠা মশায়, কোথায় কি করা যায় ! ঘর, ছাদ লোকে পরিপূর্ণ, তার উপর এই বৃষ্টি। খাবার জিনিস কোথায় বা কি আছে ? বানের প্রথমে এ সব কথা ত মনে হয় নাই। নীচের ভাঁড়ার ঘর জলে পরিপূর্ণ, আর এক ধাপ হইলেই উপরে জল আসে। তখন দলিলপত্র নিয়েই আপনার সঙ্গে ওপরে জোড়া ছিন্দুম। কি হবে জ্যেষ্ঠা মশায় ?”

“কি হবে বলি হ'বে না মা ! এ বাড়ী হ'তে তোমার বাপ ঠাকুরদাদার আমলে কখনও কেহ অভুক্ত ফেরে নাই। আজ

তুমি অন্নপূর্ণা হ'য়ে অন্ন দিতে কাতর কেন মা ? লক্ষ্মীর ভাণ্ডার কখনও কি শূন্য হয় মা ! সবই আছে, তোমার এই বুড়ো ছেলের পেটের চিন্তা সব চিন্তার বড়। সব খেয়েও এ পেট পোরে নি। তাই, সব কাজের আগে পেটের যোগাড় ক'রে রেখেছে। তোমার সঙ্গে আর ছ'চার জনকে নিয়ে আমার সঙ্গে এস ত মা। আমি সব দেখিয়ে দিই, কোথায় কি আছে, কোথায় কি হ'বে।” এই বলিয়া দেওয়ানজী মায়াকে সঙ্গে লইয়া দ্বিতলের বাহিরে নাইবার বারান্দার চাবি খুলিয়া দেখাইতে লাগিল—“এই দেখ মা চালের বস্তা, এই দেখ মা ডালের বস্তা—এই দেখ মা ঘিনের টিন্—এই দেখ মা শুকনো কাঠ—আর এই কাঠের গাদার ও-পাশে তেল হুন মশলা পাতি, রাঁধবার হাঁড়ি-কুড়ি থেকে যা যা দরকার সবই পাবে। তবে ছেলেদের ডুধের কি হয় মা ? মায়েদের ডুধে কতক্ষণই বা তাদের কিদে মিটবে ! একটু জলখাবার করেছিলে মা ?”

“বড় জেঠা মশায় কাল যে সব মিষ্টি পাঠিয়ে দিয়েছিলেন—সে সব ঠাকুরের ঘরে ছিল। ঠাকুরের পূজার পরই সেই সব প্রসাদে এদের একটু ক'রে জল খাওয়া হয়েছে। ছোট ছেলেদের বানের জল খেতে দিইনি, ঘরের জলেই তখন কুলিয়ে গেছে। আর একটুও খাবার জল তাদের দিবার মত নেই।”

“সমুদ্রে দাঁড়িয়ে আকণ্ঠ জলের তৃষ্ণা। আচ্ছা, তার ব্যবস্থা আমি করছি, তুমি এদিকের ব্যবস্থা কর মা। আরও সব সঙ্গে লও। গিন্নীদের সব দেখিয়ে দিতে বল—তুমি, তোমার সঙ্গে আর যাকে যাকে ইচ্ছে সকলকে নিয়ে—তৎপর ক'রে রান্নার যোগাড় কর। তোমাদেরই সব করা চাই মা ! আর.

বিধবাদের জন্ত দিনে দিনেই সব যাতে হ'য়ে যায় তারও ব্যবস্থা তাঁদের ক'রে নিতে বল মা। যাও, আর দেরি ক'র না। আমি আর একবার বেরুবো। দেখি, যদি কেউ আর একখানি নৌকা নিয়ে কোথাও কিছু যোগাড় ক'রে আনতে পারে। যা চাল ডাল আছে, এতে ত আর তিনদিনের বেশী চলবে না। ঘর-বাড়ী না হওয়া পর্যন্ত কে কোথায় যাবে? কি যে হবে মা! লীলাময়, তোমার বিচিত্র লীলা বুঝিবে কে? মধুসূদন! এ বিপদে আমাদের ধৈর্য্য দাও, শক্তি দাও, সামর্থ্য দাও।” এই বলিয়া বৃদ্ধ চক্কের জলে বক্ষ ভাসাইতে ভাসাইতে সেখান হইতে চলিয়া গেলেন।

দ্বিতলের সব ঘরে স্ত্রীলোক ও ছাদে পুরুষরা আশ্রয় লইয়াছিল। দেওয়ানজী ছাদে আসিয়া ২।৪ জন প্রবীণ লোককে ডাকিয়া জিজ্ঞাসা করিলেন, “এখন কি করা উচিত।” তাঁহাদের পরামর্শে দেওয়ানজী তাঁহার অনুগত দুইজন যুবককে ডাকিয়া বলিলেন,—“এই বিপদের সঙ্গে লড়াই কত্তে হবে,—তোমাদের উপর আজ যে ভার দিচ্ছি, তা উদ্ধার কর ত ভাই। তোমাদের দু'জনকে একখানা নৌকা নিয়ে বর্ধমান যেতে হবে। সেখানে গিয়ে—কলিকাতার এই ঠিকানায় ‘তার’ কর যে, ‘হাজার মণ চাল ও পাঁচ শত মণ ডাল—একশ’ মণ আলু, দশ গাঁট কাপড় নিয়ে দুইদিনের মধ্যে যেমন ক'রে হোক বর্ধমানে হাজির হ'তে হবে।’ বর্ধমানে আমাদের উকিলের কাছে পত্র দিচ্ছি। তিনি পত্র পেলেই টাকার ব্যবস্থা করে দেবেন। কাপড়ের কানাৎ—তাঁবু যত যোগাড় ক'রে আনা সম্ভব, তাও ‘তার’ কত্তে ভুল না। এই চব্বিশ মাইল পথের পাথেয় তোমাদের জন্ত মাত্র একপো গুড় আর আধ সের চাল দিতে পারবো, এর বেশী দিতে হ'লে হয় ত

আর একজনের মুখের গ্রাস কেড়ে নিয়ে দিতে হবে। আজ আর ফিরতে চেষ্টা করো না। কাল বেলা ১০টার মধ্যে তোমাদের এখানে আসা চাই। তোমাদের না দেখে আমি একবিন্দু জল মুখে দেব না। দেখ, যেন আশী বছরের বুড়া বামুনের প্রাণটা তোমাদের জন্মই বা'র না হয়।”

দেওয়ানজী প্রদত্ত দুইখানি পত্র ও সেই অপূর্ব উপহার গুড় চাল সঙ্গে লইয়া, কমলাকান্ত দত্ত ও রাধাশ্যাম বসু স্বচ্ছন্দে দেওয়ানজীকে প্রণাম করিয়া, তখনই নৌকায় আরোহণ করিয়া নৌকাখানি একবার পরীক্ষা করিল। তাহারা উভয়ে উদ্দেশে গৃহ-দেবতাকে প্রণাম করিয়া শ্রোতের মুখে নৌকা ভাসাইয়া দিল। যতক্ষণ পর্য্যন্ত দৃষ্টি চলে—ততক্ষণ পর্য্যন্ত দেওয়ানজী তাহাদের দিকে এক-দৃষ্টে চাহিয়া রহিলেন। অদৃশ্য হইলে বলিয়া উঠিলেন,—“ভগবান্, যাহাদের হৃদয়ে এত সাহস—যাহারা পরের জন্ম এখন ভইতে জীবন দিতে উদ্বৃত্ত, তাহাদের যেন কখনও কোনও বিপদ না হয়, তাহাদের প্রত্যেক কর্ম্ম যেন দশের আদর্শ হয়—তাহাদের কোন কর্ম্মই যেন কখন বিফল না হয়।”

কমলাকান্ত ও রাধাশ্যামের দেখাদেখি আরও দুই চারিজন আসিয়া দেওয়ানজীর নিকট কর্ম্ম প্রার্থনা করিল। দেওয়ানজী আরও দুইজনকে আর একখানি নৌকা লইয়া, কলাগাছ কাটিয়া ভেলা বাধিয়া আনিবার ভার দিলেন—এবং বলিয়া দিলেন, যেন প্রত্যেক ভেলাই তিনজন লোকের ভার বহন করিতে পারে। একঘণ্টার মধ্যে তাহারা দুইটি ভেলা লইয়া ফিরিয়া আসিল। দেওয়ান সেনাপতির কি গুণে জানি না, অনেকেই এই বিপদের সঙ্গে যুদ্ধ করিতে অতঃপ্রবৃত্ত হইয়া, তাহার সৈনিকের দলে নিযুক্ত

হইতে চারিদিকে তাঁহাকে ঘেরিয়া দাঁড়াইল। দেওয়ানজীও আনন্দে অধীর হইয়া তাহাদের আশীর্বাদ করিয়া এক এক কার্যে নিযুক্ত করিতে লাগিলেন। এক ভেলার সাহায্যে ঘণ্টা দুইয়ের মধ্যে কুড়িটি ভেলা প্রস্তুত হইয়া আসিল। নৌকা লইয়া দুইজনকে দুধের জন্ত সাত-আনী পাঠাইয়া দিলেন। এদিকে মায়া ও তাহার সমবয়সীরা খেচরান প্রস্তুত করিয়া সকলকে আহারের জন্ত প্রস্তুত হইতে বলিল। বালক-বৃদ্ধদের প্রথম অধিকার, তাহারাও একত্রে বঞ্চিত হইল না। প্রথম প্রেরিত লোকদের মধ্যে একজন এই সময় সাত-আনী হইতে সংবাদ লইয়া আসিয়া জানাইল—“সদাশিববাবু সাত-আনীতেই আছেন। শরীরটা ধারাপ হয়েছে ব’লে তাঁকে সেখানেই রেখে আসা হয়েছে। জ্ঞানানন্দবাবুও ছাড়িলেন না। তৈরবও বাবুর নিকট আছে। ছোট ছোট ছেলের জন্ত নৌকায় দুধ নিয়ে পেছুতে অল্প লোক আসছে। সাত-আনীর অবস্থা এতটা শোচনীয় নয়। তবে গ্রামের ছয় আনা রকম নষ্ট হইয়া গিয়াছে—দশ আনার বিশেষ কিছু ক্ষতি হয় নাই।”

১১

ধ্বংসের পর প্রকৃতি যেন নূতন করিয়া আপন সৃষ্টি বিস্তার করিতে কৃতসঙ্কল্প হইয়া নূতন বেশে—সারা বিশ্বের উপর আপনার মোহিনী মূর্তি বিস্তার করিতেছে। চারিদিকের ধ্বংসের লীলা-চিহ্ন তখনও মুছিয়া যায় নাই। তাহারই মধ্যে আবার নূতনের উৎপাদন না হইলে এ বিশ্ব যে একেবারে যায়। তাই প্রকৃতির চিরনিয়মে ধ্বংসই সৃষ্টির রূপান্তর—আর সৃষ্টিই ধ্বংসের

অপরাশক্তি। যাহা কিছু ধ্বংস হইবে, তাহাতে সৃষ্টির বীজ থাকিবেই, নতুবা স্থিতির—এই বর্তমানের চিহ্ন থাকে কোথায়! সৃষ্টির ও ধ্বংসের মধ্যেই স্থিতির জন্ম। এ সমবায় সম্বন্ধেই ব্রহ্মাণ্ড গ্রথিত। কাহাকেও ত্যাগ করিবার উপায় কাহারও নাই। তাই প্রকৃতি নিজ প্রকৃতিতেই বৃষ্টি বাধা হইয়া আবার নূতন করিয়া দিগ্দিগন্তকে পূর্ণরূপে গড়িয়া তুলিবার জন্ত, বসুন্ধরার বক্ষে শশুশ্রামলা রূপের ছটায় নিজের আসন বিস্তার করিয়াছেন।

প্রভাত-সূর্য্য এই কয়দিন মেঘে ঢাকা থাকিয়া কিছুমাত্রও মলিন হন নাই—কিরণ শক্তিতেও হ্রাস পান নাই, তাহাই যেন প্রমাণ করিতে বদ্ধপরিকর হইয়া, প্রথম উদয়েই নিজের পরীক্ষা এ জড়-জগতের সাক্ষাতে দিতেছেন। আর শশুশ্রামলা সুজলা-সুফলা বঙ্গের রাত বজ্রার প্রকোপে পড়িয়াও যে নিজের যথাকর্তব্য বিস্মৃত হন নাই, তাহাই দেখাইতে যেন নব-কলেবর লইয়া ঈষৎ কৃষ্ণাভ সবুজ ধরিত্রীর বৃকে বাতাসের সঙ্গে হেলিয়া-ঢলিয়া কথা কহিয়া প্রথম পদক্ষেপ করিতেছেন। চারিদিকের বজ্রার জল কমিয়া গিয়াছে। কোথাও-কোথাও বালুকারাশির উপর সূর্য্যকিরণ পড়িয়া একটি জলন্ত অগ্নিকুণ্ডের মত দেখাইতেছে— আবার কোথাও বা প্রকৃতির এই বিপর্যয় চিহ্নরাশি কোন একটি অতি বৃহৎ অথচ অতি প্রাচীন বটবৃক্ষের কাণ্ডে ও শাখায় আবদ্ধ হইয়া বলিতেছে, তোমার এই সুদীর্ঘ জীবনে কখনও আমরা তোমার আতিথ্যলাভ করিতে পারি নাই। যদি কালের গতির সঙ্গে স্রোতোমুখে পড়িয়া এই তীর্থে আসিয়া পড়িয়াছি, তবে আর কেন গৃহবাসী হই, আর সে ক’দিন আমাদের জীবন আছে সে কয়দিন—এইপানেই কাটাইয়া দিই।

প্রকৃতির এই জন্ম-মৃত্যুর কোন দিকেই লক্ষ্য না করিয়া একটি যুবক এক দ্রুতগামী অশ্বের পৃষ্ঠে বসিয়া চলিয়াছে। তীরবেগে ঘোড়করাজ ছুটিতেছে, তবুও যেন আরোহী তাহাতে সন্তুষ্ট নয়; যেন তার মনের বেগের সঙ্গে চলিতে পারিলে তবে ঠিক চলা হয়। এমনি মনে করিয়া পুনঃপুনঃ কশাঘাতে অশ্বরাজকে আরও বেগে চলিতে ইঙ্গিত করিতেছে। মধ্যে মধ্যে নিজের কপালের ঘাম মুছিয়া ফেলিয়া তীক্ষ্ণ দৃষ্টিতে সম্মুখের দিকে চাহিয়া দেখিতেছে। তাহার গন্তব্য স্থান আরও কত দূরে! ক্রমাগত তিনঘণ্টাকাল একভাবে অশ্ববরকে চালাইয়া বর্ধমানের পারঘাটার কাছে আসিয়া, দামোদরের তীরে ঘোড়ক হইতে অবতরণ করিয়া, তার পর ঘোড়করাজের মুখটি দুই হাতে ধরিয়া আদর করিয়া বলিতে লাগিল—

“মলয়, তোমায় আজ বড় নিষ্ঠুর চক্ষেই দেখেছি—বড় নিষ্ঠুর শাসনেই অতি দ্রুত চালিয়েছি—কেন, তা কি জান বন্ধু! আজ আমার হাতে, আর তোমার শক্তিতে হাজার-হাজার লোকের ভার পড়েছে।”

পারঘাটার নৌকায় মলয়কে লইয়া যুবক দামোদর পার হইয়া আবার তেমনি ক্ষিপ্রগতিতে চলিতে লাগিল। বর্ধমানের আদালত-সীমানার মধ্যে আসিয়া দেখিল, সেদিন আদালত জনশূন্য অবস্থায় বিবাদকারিগণের জন্ত বিবাদমগ্ন হইয়া বিরহীর গায় হা-হতাশ করিতেছে। বিশেষ চেষ্টায় জানিতে পারিল, বন্ধুর পর হইতে এই সাত দিনই প্রায় আদালতের অবস্থা এইরূপই। মাত্র বিচারপতিগণ ও কর্মচারীরা আসিয়া ভূমিশূন্য রাজার রাজকাষের মত জনশূন্য গৃহে বিচারপ্রার্থী-শূন্য বিচারে ব্যাপৃত থাকিয়া নানা গবেষণা করিতেন। আজ জন্মাষ্টমীর অবকাশ বলিয়া কেহই আসেন নাই। বিশেষ ক্রোধ

হইয়া আবার সেই যুবা অশ্বপৃষ্ঠে বসিয়া ম্যাজিষ্ট্রেট সাহেবের বাঙ্গালায় আসিয়া অতি ধীরে-ধীরে প্রবেশ করিল। নিজের নামের কার্ডখানির উপর “বন্টার স্বেচ্ছাসেবক সম্প্রদায় হইতে” এই কয়টি কথা লিখিয়া দিয়া একজন চাপরাশীর নিকট দিয়া বলিল—এইখানি এখন সাহেবের নিকট পৌঁছাইয়া দিতে পারিলে সে বিশেষ পুরস্কৃত হইবে। আরদালীপ্রবর নতশিরে তাহাকে সম্মান জানাইয়া কার্ডখানি লইয়া ভিতরে গেল এবং ফিরিয়া আসিয়া বলিল, “সাহেব আপনাকে ভিতরে যাইতে বলিলেন।”

সদাশয় উদারহৃদয় H. D. Ware বন্টার হৃদ্দিনের সময়ে বন্ধমানের ম্যাজিষ্ট্রেট ছিলেন। চিরপ্রফুল্লতার সদানন্দ যেন তাঁহাকে সব সময়েই ঘেরিয়া থাকিত। যুবাকে গৃহে প্রবেশ করিতে দেখিয়া, সাহেব উঠিয়া গিয়া সম্মানের সহিত তাহার হাত ছ'খানি ধরিয়া বিনয়কণ্ঠে বিস্তৃত বাঙ্গালায় বলিতে লাগিলেন, “আপনার ‘দর্শনী-পত্র’ বাঙ্গালায় লেখা আছে প্রণবকৃষ্ণবাবু! সেইজন্য আমি আপনাদেরই বাঙ্গালার আদব কায়দায় আপনার সম্মান করিতেছি। আশুন—বসুন, এই কেদারায় উপবেশন করুন—আমার অন্তর্ধান গ্রহণ করুন। প্রণবকৃষ্ণবাবু, সঙ্কোচবোধ করিবেন না—আমার বাড়ীতে এখন আপনি আমার অতিথি। আপনার মর্যাদা কি তাহা জানি না—তবুও সে অজ্ঞাত মর্যাদাকে সামান্য আকারে দেখা কোন প্রকারেই উচিত নয়। আপনি স্নহ হন—শ্রান্তি অপনোদন করুন, পরে আপনার বক্তব্য শুনিতেছি।”

পূর্বে ছ'একবার কার্ফান্সত্রে প্রণবকৃষ্ণ ম্যাজিষ্ট্রেট সাহেবের সম্মুখে আসিয়াছিল মাত্র—কিন্তু বিশেষভাবে কোন কিছু কথা

হয় নাই। তখন আদালত গৃহের কর্ম-গণ্ডীর মধ্যে তাঁহার গাভীর্ণ্যপূর্ণ ব্যবহার দেখিয়া মনে হয় ত অগ্র ধারণা ছিল—তাই যেন কিছু বিস্মিত হইয়া আপন মনেই বলিয়া উঠিল, “ইনিই কি আমাদের দেশের একমাত্র বিচারকর্তা। এমন প্রাণগোলা সরল ব্যবহার—এমনই সদানন্দ—”

“প্রণবকৃষ্ণবাবু, ক্রিয়ারহিত প্রত্যেক পদবিগ্রাসেই যদি আপনীর সহিত বাক্যানাপ করিতে হয়, আমি তাহাতেও সক্ষম। কিন্তু কেবলমাত্র আপনীর দেশের প্রকারভেদ অদ্ভুত চলন কথায় আমার স্থল মস্তিষ্ক অনভ্যস্ত। প্রত্যেক মহকুমাই এ বিষয়ে ভিন্ন-ভিন্ন রীতিনীতিতে ও পদবিগ্রাসে অভ্যস্ত। তদ্বিত্তু আমার বঙ্গ-ভাষা শিক্ষার প্রবল বাসনা অধাবসায়-শূন্যতা দোষে দূষিত। এক্ষণে আপনীর বক্তব্য, অভিযোগ, অনুযোগ, আবেদন, নিবেদন সকলই বিশুদ্ধ বাঙ্গালা ভাষায় ব্যক্ত করিতে পারেন। আর এক কথা বলি, মনোযোগ দিয়া শ্রবণ করুন। বক্তুর নিকট বক্তু যেমন ভাবে তাহার মন-প্রাণের কথা অসঙ্কোচে বলিয়া থাকেন, আপনিও তেমনি ভাবে আপনীর সমুদয় বিষয় ব্যক্ত করিবেন, আমার ইহাই একমাত্র অনুরোধ। আর যদি এই প্রবাসীকে বক্তুত্বে বৃত্ত করিতে পারেন, তাহা হইলে সে নিজেকে ধন্য জ্ঞান করিবে।” মহানুভব সাহেবের কথায় প্রণবকৃষ্ণ যেন নব-শক্তিতে উৰ্ব্বুদ্ধ হইয়া বলিতে লাগিল—“আপনীর সৌজন্ম—আপনীর সরলতা—আপনীর মহৎপ্রাণ দেবতারই সঙ্গে তুলনীয়। দেব প্রকৃতিতে জন্মগ্রহণ করিয়াই আপনি রাজপদে—রাজপ্রতিনিধিত্বে অধিকৃত। আমাদের শাস্ত্রে বলে—‘ভগবান্ রাজদেহে অধিষ্ঠান করিয়া প্রজার প্রাণরক্ষা করেন’ আজ নিজের চক্ষু-কর্ণে—মনে-

প্রাণে তাহা পূর্ণরূপে উপলব্ধি করিয়া নিজেকে ভাগ্যবান্ মনে করিতেছি।

“বন্টার স্বেচ্ছাসেবক সম্প্রদায় কলিকাতা হইতে খাণ্ড সামগ্রী সঙ্গে আনিয়া, নারায়ণপুরে তাঁহাদের কেন্দ্র করিয়া, এই আট দিনে লোকহিত-ব্রতে যথাসর্ব্বশ্ব বিতরণ করিয়া, সহস্র-সহস্র লোকের প্রাণরক্ষা করিয়াছেন। আর একদিন মাত্র বিতরণ করিবার মত সকল জিনিস আছে। এখন এই বিপন্ন দেশকে রক্ষা করিবার ভার আপনার উপরেই নির্ভর করিতেছে। মাত্র সামান্য খাণ্ড ও পরিধেয় অভাবে ভগবানের সৃষ্ট এতগুলি জীব একেবারে মৃত্যুমুখে মাইতে বসিয়াছে। ইহার প্রতিকার প্রার্থনা আর কাহারও নিকট না করিয়া, আমাদের রাজার নিকট আমাদের সমুদয় অভাব অভিযোগ—মরণের পূর্ব্ব মুহূর্ত্তে বলিতে আসিয়াছি। কৃতকার্য্য হইলে নিজেকে ধন্য মনে করিব। অতি প্রত্যাশ হইতে আরম্ভ করিয়া সন্ধ্যা পর্য্যন্ত নিজদের মাথায় মোট লইয়া ত্রিশ জন কর্ম্মঠ ব্যক্তি এই কয়দিন যে ভাবে কার্য্য করিতেছে, তাহা আমার এই অল্প জীবনে সম্পূর্ণ নূতন বলিয়া মনে হইতেছে। যাহাদের সামর্থ্যে কখনও নিজদের খাবার যোগাড় করিয়া খাইতে কুলাইয়া উঠে না, যাহাদের পাচক ও পরিচারক আবশ্যক, তাহারাই পরের জন্ত মাথায় মোট লইয়া দ্বারে-দ্বারে বন্ট্যপীড়িত বুদ্ধিকিতের অন্ন যোগাইতেছে। প্রাতে বাহির হইয়া সন্ধ্যায় আসিয়া কোনরূপে শাক-অন্ন খাইয়া এই সাতদিন অতিবাহিত করিয়াছে—আরও কত দিন যে এ পরিশ্রম তাহাদের করিতে হইবে, তাহাই বা কে বলিবে ? উৎসাহ তাহাদের হৃদয়ে যথেষ্ট আছে, কিন্তু ভাণ্ডার অতি ক্ষুদ্র। তাই আর আপনার নিকট সাহায্য প্রার্থনায় এখানে

আসিয়াছি। এ বিষয়ে আপনি যথাসাধ্য মনোযোগী না হইলে অনাহারে, অনাশ্রয়ে প্রায় চারিশত গ্রামের লোক একেবারে অকালে কালের গ্রাসে পতিত হইবে। বিশেষ কষ্ট হইয়াছে মধ্যবিত্ত ভদ্রলোকের। বড়লোক যাহারা, তাঁহারা প্রায় সকলেই এখন সহরে বাস করেন। আর ছ'চারি ঘর বড়লোক—দেশের উপর প্রভু করিবার জন্ত এখনও যাহারা ছিলেন,—তাঁহারা এই দুর্দিনে বাধ্য হইয়া দেশত্যাগ করিয়া অন্তর গিয়াছেন। নিম্ন শ্রেণীর লোক খাটিয়া খাইতেছে। এ দুর্দিনেও পরিশ্রমের বিনিময়ে তাহাদের অন্ন-সংস্থানে তত কষ্ট হইতেছে না। সামান্য গরে ও সামান্য পরিচ্ছদে থাকিতে তাহাদের কোনও লজ্জা বা অসুবিধা হয় নাই। আজ এ দুর্দিনে তাহাদের কর্মক্ষেত্র এতদূর বিস্তৃত হইয়া পড়িয়াছে যে, তাহা অনেক দিন ধরিয়া বহু লোকেও শেষ করিতে পারিবে না! প্রত্যেক গৃহ-হীনের গৃহ নিৰ্মাণ করিবার জন্ত এই শ্রেণীর লোক আহত হইতেছে। দ্বাপার বৃষ্টি তাহারাও তাহাদের পারিশ্রমিক সাত আট গুণ বৃদ্ধি করিয়াছে। এই শ্রেণীর মধ্যে যাহারা পরিশ্রম করিতে সক্ষম নহে—তাহারা নিজের অভাব জানাইতে কখনও লজ্জাবোধ করে না। কিন্তু মধ্যবিত্ত শ্রেণী নিজেদের মর্যাদা ও বংশগৌরব লইয়া প্রাণ দিতে প্রস্তুত, তবুও তাহাদের সম্মম নষ্ট করিবে না। তাহাদের অভাব অনুসন্ধান জানিতে হইতেছে। তাহার ফলে, বৃষ্টিতে পারা গিয়াছে, তাহাদের সংখ্যা পল্লীগামে এত বেশী যে, তাহার তুলনা অন্তর আর কোথাও হইতে পারে না।”

ম্যাজিষ্ট্রেট সাহেব বলিলেন—“মধ্যবিত্ত ও নিম্নশ্রেণী আখ্যা যাহাদিগকে দিতেছেন, তাহাদের অধো পার্থক্য কি

তাহা বুঝিতে পারিলাম না। আপনি মধ্যবিত্ত কাহাকে কহেন ?”

“বংশ-মর্যাদায় শ্রেষ্ঠ এবং নিম্নশ্রেণী অপেক্ষা সম্ভবমই যাহাদের একমাত্র লক্ষ্য ও রক্ষণীয় এবং আর্থিক অবস্থায় ইতর অপেক্ষা হীন, শ্রমকাতর,—তাহারাই আমাদের দেশের মধ্যবিত্ত। হয় ত এক-জনের বিশ বিঘা জমি আছে ; তাহার চার-পাঁচটি পোষ্য। সম্বনের দিকে চাহিয়া নিজে শরীরপাত না করিয়া, জমিজমা নিম্নশ্রেণীর কাহাকে ফসলী বিলি করিয়াছেন। তাহার ফলে জমীর স্বত্বাধিকারী বলিয়া, উৎপন্ন দ্রবোর অর্দ্ধেক মাত্র নিখরচায় পাইতেছেন। বিশ বিঘার মধ্যে দশ বিঘার ফসল হইতে ভদ্রতা রক্ষা করিয়া জীবন-পাত করাই কোনরূপ সম্ভব নহে ; তাহার উপর আবার ঐ কয় বিঘা জমীর রাজার খাজনা দিয়া আর কি থাকিবে ! অথচ নিম্নশ্রেণী বলিয়া আমার দেশ যাহাকে আখ্যা দিতেছেন, তাহাদের দ্বী-পুরুষে প্রত্যেক কন্ঠেই প্রাণপণ পরিশ্রম করিতে চিরাত্মস্থ ; যে কোনরূপ গ্রাসাচ্ছাদন হইলে আনন্দে তাহাদের জীবন কাটিয়া যায়। কোনও অভাব অভিযোগে পড়িলে তাহারা কখনও কাতর হয় না। মান-সম্মত, আত্মীয়-স্বজনের সঙ্গে প্রতিদ্বন্দ্বিতায় কাজ করিতে কখনই বাধ্য নহে। রাজার খাজনার কোন ধারই ধারে না। সময়ে চাষ আবাদ করিতে পারিলেই বেশ স্বচ্ছন্দে তাহাদের দিন কাটিয়া যায়। নিজের চাষ সারিয়া অত্র ক্ষেত্রে কাজ করিয়া দুই পয়সা সংস্থানও করিতে পারে। আর এই ভগবানের পলগ্রহ স্বরূপ অবস্থায় হীনের আদর্শ—মধ্যবিত্ত ভদ্র-সম্ভান—সব কাজের বাহিরে। প্রতি মুহূর্ত্ত নিজেদের জীবনকে ভার করিয়া তুলিতেছে। একে চিরদিনের এই অভ্যাস—তার উপর আবার এই খণ্ড

প্রলয়ের যুগে তাহাদের অবস্থা অতি ভয়ানক হইয়া উঠিয়াছে। মুখ ফুটিয়া অস্তরের কথা বলা অপেক্ষা মৃত্যুর সঙ্গে বৃদ্ধ করাই যেন তাহারা একমাত্র গতি বুঝিয়া একবারে নিশ্চিত ছিল। ভগবানের এইরূপ শাসনে তাহারা একটু অগ্রদিকে যাইবার জ্ঞান চেষ্টা করিতেছে। ভদ্রলোকের সন্তান—বিশেষ উচ্চ-শিক্ষায় শিক্ষিত হইয়াও, স্বচ্ছায় সেবারত গ্রহণ করিয়া—কোন দেশ হইতে আসিয়া মাথায় মোট বহন করিয়া যখন কি ভদ্র-ইতর, সকল চুস্তেরই দ্বারের নিকটে দাঁড়াইতেছে, তখন যেন তাহারা বুঝিতেছে—‘মান মর্যাদা কোন পথ দিয়া চলিয়া চিরদিনই সমানভাবে রক্ষা করিতে পারা যায়।’ প্রকৃত কর্মীর আদর্শ তাহাদের জীবনের সম্মুখে দাঁড়াইয়া—তাহাদিগকে সহজ পথে আনিবার জ্ঞান আজ যেন নিজেদের জীবনী-শক্তি তাহাদের মধ্যে প্রেরণ করিতেছেন। সেই সব অমূল্য জীবন রক্ষার ভার আপনার হাতে, দেশ-কাল-পাত্র বিবেচনা করিয়া আপনাদের প্রজ্ঞার প্রাণরক্ষা করুন।”

“আপনার আশা ও আমার ভবিষ্যৎ কর্তব্য যাহাতে রক্ষা হয় তাহার জ্ঞান আজ সদর আদালতে বিশেষ অধিবেশনে আমার সহকর্মীদের এখনই আহ্বান করিতেছি। সেখানেই যথাকর্তব্য সাধন করিবার জ্ঞান যথাসাধ্য চেষ্টিত হইব।

মাজিষ্ট্রেট সাহেব প্রণবকৃষ্ণকে সঙ্গে লইয়া আদালতে আসিয়া, জেলার প্রধান প্রধান কার্যকারকদিগকে ডাকাইয়া আনিয়া, বর্ধমান জেলার মানচিত্র বাহির করিয়া বলিলেন—“প্রণববাবু, আপনি নিজের চক্ষে যে সব গ্রামের অবস্থা দেখিয়াছেন ও অতীব শোচনীয় বলিয়া আপনার ধারণা হইয়াছে, সেই সব গ্রামগুলি লাল রেখায় চিহ্নিত করিয়া দিন।”

প্রণবকৃষ্ণ প্রায় একশত গ্রামের উপর লাল রেখা টানিয়া দিয়া বলিল—“নারায়ণপুরের দেওয়ান বৃদ্ধ সনাতন রায় মহাশয় নিজের অর্থে হাজার মণ চাল, পাঁচশত মণ ডাল, একশত মণ আলু ও কাপড় দিয়া এই সব গ্রামের লোকদের তিনদিন কাল রক্ষা করিয়াছিলেন—পরে কলিকাতা হইতে স্বেচ্ছাসেবক আসিয়া সাতদিন কাল তাহাদের রক্ষা করিতেছেন ! আগামী কাল তাহাদের ভাণ্ডার শূন্য হইবে।”

ম্যাজিষ্ট্রেট সাহেবের সহকর্মী—যাহারা পূর্বে কর্তৃপক্ষের আদিষ্ট হইয়া বণ্ডার বিবরণ সংগ্রহ করিবার জন্ত নিয়োজিত হইয়াছিলেন—তাহাদের সন্ধান বোধ হয় স্বচক্ষে না হইয়া ‘রাজ্য পশ্চিতি কর্ণেন’ এই বাক্যের সাফল্য করিয়াছিলেন। সেইজন্য দুই একজন বলিয়া উঠিলেন—“একজন উদ্ধত যুবক যাহা বলিতেছে, তাহাই কি আমাদের বিশ্বাস করিতে হইবে ? আর সাতঘাটের জল খাইয়া আমরা যে সব দেগিয়া শুনিয়া আসিলাম—তাহা কি সব ভুল দেখিলাম শুনিলাম।”

ম্যাজিষ্ট্রেট সাহেব বলিলেন—“এই ‘উদ্ধত যুবক’ আখ্যাধারী স্ভাব-সুন্দর প্রতিভা-মণ্ডিত যুবক নিজের চক্ষে যাহা দেখিয়াছেন তাহাই বলিতেছেন—এঁর কথা আপনাদের বিশ্বাস করিবার মত হৃদয় ও শক্তি আছে কি না, জানি না। শোনা কথাই যাহাদের দেখা হইয়া দাঁড়াইয়াছে—তাহাদের পক্ষে সবই সম্ভব হইতে পারে। যাক, সে কথা আমাদের এখন আলোচ্য নহে। জীবন-মরণ সমস্তার দিকে লক্ষ্য রাখিয়া—আমার হিতৈষী এই ভদ্র বন্ধুর সঙ্গে আপনারা আলাপ করিতে পারেন। এখন উপায় কি ? কয়দিনই বা সেই দেব-হৃদয় স্বেচ্ছাসেবকগণ এভাবে কাজ করিতে

পারিবেন ? দুই হাজার টাকা আমার নিজের হইতে এঁর হাতে দিই। যদি আপনাদের ইচ্ছা 'ও সামর্থ্যে বণ্টা-পীড়িতের জন্ত কিছু কিছু এখনই সাহায্য করিতে পারেন, তাহা হইলে আপনাদের দেশের ও দেশের উপকার করা হয়। আর দেখুন দেখি, বণ্টা-পীড়িতের সাহায্য-কল্পে আজ আর কোনও টাকা ডাকঘরে আসিয়াছে কি না,—তাহা হইলে তাহাও এঁর সঙ্গে দিন। আর প্রণবকৃষ্ণবাবু, আমি একটি পরোয়ানা দিই, যাহাতে দেশীয় মহাজনগণ এই দুর্দিনে টাকায় এক আনার বেশী লাভ খাণ্ডদ্রব্যের উপর না করেন।”

বেলা ৫টার সময় প্রণবকৃষ্ণ ম্যাজিস্ট্রেট সাহেবের নিকট হইতে সর্বসমেত পাঁচ হাজার টাকা লইয়া সকলকে যথামোগ্য অভিবাদন করিয়া উঠিলেন।

ম্যাজিস্ট্রেট সাহেব বলিলেন—“পথ অতি দুর্গম, কল্যা প্রাতে যাইবার ব্যবস্থা করিলে ক্ষতি কি হইবে ?”

প্রণবকৃষ্ণ বলিল—“স্বৈচ্ছা-সেবকদিগের নিকট প্রতিজ্ঞাবদ্ধ হইয়া আসিয়াছি—বর্ধমান হইতে আজই ফিরিব। কৃতকার্য হইয়া জলগ্রহণ করিব। তাঁহারাও আমার অপেক্ষায় বসিয়া থাকিবেন। হয় ত আমারই জন্ত অভুক্ত থাকিবেন। কার্য-সাফলাই আমাকে এত উৎসাহ দিতেছে যে, আমার শরীর বা মন তাহাতে বিন্দুমাত্রও অবসাদগ্রস্ত হয় নাই। আমি দুই তিন ঘণ্টার মধ্যে গন্তব্যস্থানে পৌঁছিতে পারিব মনে হইতেছে। আমার ঘোটকও অনেকক্ষণ বিশ্রাম করিয়াছে।”

“চলুন প্রণববাবু, আপনাকে পারঘাটা পর্য্যন্ত পৌঁছাইয়া দিয়া আসি। অনেকদিন দামোদরের ধারে যাই নাই। একটু বায়-

সেবনও হইবে।” এই বলিয়া প্রণবকৃষ্ণের সহিত সাহেব আদালতের প্রাক্গণে আসিলেন। নিজের নিজের অশ্বে বসিয়া নানা প্রকার কথোপকথন করিতে করিতে উভয়ে পারঘাটার নিকট আসিয়া পৌঁছিলেন। শত ধন্যবাদ দিয়া, অভিবাদন করিয়া প্রণব অশ্বসহ নোকায় উঠিল। সাহেব বলিলেন—“বন্টার বৃত্তান্ত সহ সমুদায় গ্রামবাসীর একখানি আবেদন পত্র সহর লিখিয়া পাঠাইলে, আমি কর্তৃপক্ষের নিকট হইতে সাহায্য প্রার্থনা করিয়া, প্রত্যেক গ্রামেই সাময়িক ভাবে সাহায্য ভাণ্ডার স্থাপন করিতে চেষ্টা করিব। হয় ত বা আমি দুই একদিন মধ্যে এই সব স্থান পরিদর্শন করিবার জন্তও একবার যাইতে পারি। দেবতার আশীর্বাদে—আপনারা স্বেচ্ছা থাকিয়া সেই সময় আমার যথাসাধ্য সাহায্য করিবেন। দেশের অভাব অভিযোগের প্রতিকার দেশের লোকে বতটা সহজে করিতে পারেন—ভিন্নদেশী আগন্তুক তাহা পারে না বলিয়াই আমাদের বিশ্বাস। আসুন প্রণবকৃষ্ণবাবু, আর আপনার অমূল্য সময় নষ্ট করিয়া দিব না। আমার মঙ্গলচ্ছা আপনাকে বর্ষের মত আবৃত করিয়া রাখুক, আমার এইমাত্র শেষ প্রার্থনা।”

১২

ম্যাজিষ্ট্রেট সাহেব দেওয়ানজী ও স্বেচ্ছাসেবকদিগের সাহায্যে বন্টার চিহ্ন গ্রামের উপর হইতে মুছিয়া ফেলিতে বন্ধপরিকর হইয়াছিলেন। আশ্বিন মাসে পূজার পূর্বে কতকটা যেন কৃতকার্য হইলেন। যে কয়দিন সাহেব পরিদর্শন করিবার জন্ত বাহিরে গিয়াছিলেন, সেই কয়দিনই নারায়ণপুরে স্বেচ্ছাসেবকগণের সঙ্গে

মায়ার আতিথ্যগ্রহণ করিয়াছিলেন। বৃদ্ধ দেওয়ানজীকে ম্যাজিস্ট্রেট সাহেব সকলের দেখাদেখি “গুরু” বলিয়া আহ্বান করিতে দ্বিধা বোধ করেন নাই। দেওয়ানজী একদিন বলিলেন—“সাহেব, মুখে গুরু বললে হবে না, যদি শিষ্যত্ব গ্রহণ ক’রে থাকেন, তবে তার দক্ষিণা, প্রণামী সবই দিতে হ’বে। নতুবা কাজে মুখে পৃথক হ’য়ে দাঁড়াবে। অন্তর বাহির পৃথক হ’য়ে যে আপনার হৃদয়ে একটা রেখা পড়ে, সেটা আমার মত সোভাগ্যবান গুরুর পক্ষেও মর্যাদার নয়, তাই আমিও এর একটা কিছু শেষ করতে চাই। সে প্রণামী বা দক্ষিণা স্বর্ণ রৌপ্যে পূরণ হ’বে না। সাহেব, দক্ষিণার স্বরূপ একটা কাজের ভার আপনাকে নিতেই হ’বে। আর আমি যখন এমন সব শিষ্য ভগবানের দয়ায় বিনা আয়াসে লাভ করতে পেরেছি, তখন আমার সে ইচ্ছাটা তাদের দিয়ে পূরণ করিয়াই বা না নেব কেন?”

সেদিন সন্ধ্যার সময় সমবেত স্বেচ্ছাসেবকগণের সমক্ষে দেওয়ানজী বক্তার রাত্রির সকল কথা বলিলেন—“সদাশিববাবু কোথায় আছেন তাহা আমরা কেহই জানি না। এই দুর্দিনে এই সংবাদে মায়ী যদিই একান্ত কাতরা হইয়া আমাদের সেবাত্রেতে গোল বাধাইয়া বসে, সেইজন্য এই মিথ্যার সৃষ্টি আমিই করিয়াছি যে, ‘পীড়িত অবস্থায় সদাশিববাবু সাত-আনীতে আছেন।’ এদিকের কাজ যাহা কিছু সবই যেন তাঁহারই পরামর্শে হইতেছে, মায়ী এইরূপই জানে। আপনার দয়ায় এখন বক্তার দায় হইতে এক প্রকার সকলে কণ্ঠস্থ অব্যাহতি পাইয়াছে। এখন যে যাহার সামর্থ্য নিজের সুখ সুবিধার চেষ্টা করিতে পারিবে। অথচ অভাব হইলে তাহাও সরকার হইতে ঋণরূপে গ্রহণ করিতে

পারিবে। এ সব বাহা কিছু করিয়াছিলেন, সবই সকলের পক্ষে আশাতীত সুবিধার হইয়াছে। কিন্তু সাহেব, এইবার আমি কি লইয়া থাকিব, মায়াকেই বা কি দিয়া ভুলাইয়া রাখিব। বাহা লইয়া এই কয়দিন কাটাইবার সুবিধা হইয়াছিল—তাহা ত আজ শেষ করিয়া আপনারা চলিয়া বাইতেছেন। সাহেব, করুণাপরবশ হইয়া সদাশিববাবুর সন্ধানের জন্য কোনও প্রকার ব্যবস্থা করিয়া দিন। আমার বান্ধিক্য-শক্তি যেন ক্রমশঃ আমাকে শেষ-অবসাদে পোছাইয়া দিতে উত্তম হইয়াছে। আর পারি না এইবার যেন জীবন শেষ হইলেই ভাল হয়। মৃত্যু-চিন্তা আমাদের পক্ষে পাপের হইলেও, বিপদের উপর বিপদ আসিয়া যেন ধৈর্য্যশক্তি নষ্ট করিয়া সেই পাপবুদ্ধিকে উৎসাহিত করিতেছে।”

ম্যাজিস্ট্রেট সাহেব বলিলেন—“আমার শক্তিতে যতদূর সম্ভব, আপনার অনুরোধ রক্ষিত হইবেই। তবে সত্তর যে কার্যোদ্ধার হইবে, এমন কোন আশাই করা যায় না। দেখা যাউক, কতদূর কি করা যায়। নিরুদ্দিষ্ট হইবার কোনও কারণও ত বুঝিতে পারিলাম না। গুরু, আমার সাধ্যমত যত্ন-সহকারে এ বিষয়ে হস্তক্ষেপ করিব। বিশেষ, মায়াদেবীর আতিথেয়্যে আমরা সকলেই প্রীত হইয়াছি। এ বিপদের দিনে মায়ার মত অল্পবয়স্ক বালিকা যে সাহসে বুক বাঁধিয়া, নিজের বিপদ তুলু করিয়া, অসামান্য উপকার করিয়াছে, তাহাতে দেশের লোক তাহার কাছে অশেষ ঋণে ঋণী। তাহার যৎসামান্য উপকার করিতে পারিলেও, কথঞ্চিৎ ঋণ পরিশোধ হইবে। বাহা হউক, এ বিপদের শেষ হইলে মায়ার বিবাহের সময় যেন আমরা নিমন্ত্রিত হইয়া হাসি মুখে এখানে আসিতে পারি।”

দেওয়ানজী বলিলেন—“সদাশিববাবুর সন্ধান না পাওয়া পর্যন্ত মায়া'র বিবাহ যে স্থগিত থাকিবে ইহা নিশ্চিত। সে অনির্দিষ্ট দিনের কতদূরে যে সীমা, তাহা কে বলিবে সাহেব! তবে যতদিন পরেই সে শুভদিন আসুক না কেন, সে শুভদিনের নিমন্ত্রণে এই সব মহৎপ্রাণ, মহানুভবদিগকে স্মরণ না করিলে আমার কর্তব্যে ত্রুটি থাকিবে, আমার আনন্দ হইবে না। আর আপনারাও স্নীকার করুন, এই বস্তার স্মৃতিরক্ষার জন্ত দয়া করিয়া মায়া'র বিবাহের সময় এখানে আসিবেনই।”

দেওয়ানজী অনেক দূর পর্যন্ত সঙ্গে সঙ্গে আসিলেন। ফিরিয়া আসিবার জন্ত পুনঃপুনঃ অনুরোধ হইতে লাগিলেন। শেষে দেওয়ানজী বাষ্পরুদ্ধকণ্ঠে বলিয়া উঠিলেন—“ভাই সব, এই আশা বৎসর বয়সের মধ্যে এমন প্রাণ—এমন দয়ার শরীর—এমন পরদুঃখ-কাতরতা—ঐশ্বর্যের মধ্যে লালিত পালিত হইয়াও এমন ভাবে পরের জন্ত নিজেদের সর্বস্বথ বিসর্জন দিতে তোমাদের ব্যতীত আর কাহাদিগকেও দেখি নাই। তোমাদের সেবারত শিক্ষা করিবার জন্ত আমার মন, প্রাণ, শক্তি—সব বেন তোমাদের পশ্চাৎ পশ্চাৎ ছুটিয়া চলিয়াছে। আমার যতটুকু জীবন এখনও এ মরজগতে থাকিবে—তাহাই যেন তোমাদের এই সেবারতে ব্রতী হইয়া তোমাদের পুণা-স্মৃতি বহন করিতে সমর্থ হয়। আমাদের ভবিষ্যৎ বংশধর তোমরা—তোমাদের উপর আমাদের কল্পনা যেন কার্যে পরিণত হইয়া দেশের কলঙ্ক-কালিমা মুছিয়া যায়। ভাই সব, এ বৃদ্ধ ব্রাহ্মণ তোমাদের আর কি বলিয়া আশীর্বাদ করিবে? ভগবানের নিকট প্রার্থনা করি, চির-নিশ্চল শান্তি ও মঙ্গল যেন তোমাদের সর্ব সময়ে সহায় হন।”

আর কোনও কথা সেই বৃদ্ধের কণ্ঠ দিয়া বাহির হইল না। বৃদ্ধ দেওয়ানজীর কণ্ঠ আবেগে পূর্ণ হইয়া গেল। সেই স্নেহমুগ্ধ বৃদ্ধের জন্তু কাতর হইয়া সকলেই নিজের নিজের অশ্রু সংবরণ করিবার জন্তু চক্ষু মুছিতে লাগিলেন।

দেওয়ানজী অতি কষ্টে বাড়ী ফিরিয়া আসিয়া, সেই দিনই শয্যা গ্রহণ করিলেন। একেবারে সাত দিন অচেতন হইয়া পড়িয়া রহিলেন। তাহাতে সকলে মনে করিয়াছিল, বোধ হয়, বয়সের কয়দিনের এই অতিরিক্ত পরিশ্রমেই বৃদ্ধের চির-অটুট স্বাস্থ্য এইবার বৃষ্টি শেষ শয্যা গ্রহণ করিতে বাধ্য হইল। মায়ী সাত-অনীতে সংবাদ দিলে পর জ্ঞানবাবু আসিলেন। জ্ঞানবাবুকে একা আসিতে দেখিয়া, মায়ী কতকটা নিশ্চিন্ত হইয়াও নানা উদ্বেগে সদাশিববাবুর জন্তু অত্যন্ত কাতরতা প্রকাশ করিয়া জিজ্ঞাসা করিল—“বাবা কতদিনে এখানে আসিতে পারিবেন, কেমন আছেন, আমায় একা রাখিয়া কি করিয়া নিশ্চিন্ত আছেন ; তার উপরে এই দেওয়ান জেঠামশায়ের সংশয়পন্ন ব্যারাম।”

কতদিনে বাবা এখানে আসিতে পারিবেন, এই কথা বোধ হয় শতবার জিজ্ঞাসা করিয়াও মায়ীর মনে হইতেছিল, বৃষ্টি এ কথাটা ভাল করিয়া জিজ্ঞাসা করা হইল না। নানা প্রকারে আশ্বাস দিয়া জ্ঞানবাবু অবশেষে বলিলেন—“মা আমার আসায় কি তুমি কোন প্রকারে সম্বৃত্ত নও ? কেবল নিজের বাপের কথাই জিজ্ঞাসা করছ ? আমার কথা কি একেবারে ভুলে গেছ না ? সেই ছোটবেলায় যখন আমার কোলে বসে বলতে জেঠামশাই বাবা বড় ছষ্টু, তুমি খুব লক্ষ্মী, আমি তোমার কাছেই থাকবো, বাবার কাছে থাক না, বাবা আমায় কেবল কেবল বড় বকেন।”

আজ সেই ছোট আমার মা-টি, মস্ত বড় হ'য়ে কেবল বাপের কথাই বলছে, আর ছেলের কথা মনে নাই। কিন্তু মা, তোমার ছেলে তার মায়ের কথা ভুলতে পারে নি বলেই নিজের ঘরে নিয়ে যেতে বাস্তু হ'য়ে উঠেছে। তবে মা এ ভাবে এখন আর সেখানে নিয়ে যেতে আমার মন উঠেছে না—তাই দু'দিন পরে সাত-আনীতে বরণ ক'রে ঘরে তুলবো। আমি একা আজ নানা কারণে এখানে আসতে বাধা হয়েছি। সদাশিব সেখানেই থাক না কেন, তার জন্তু তোমার বাস্তু হ'বার কি আছে, আমরা ত রয়েছি। অবশ্য বাপকে না দেখে মেয়ের মন খারাপ হয়। তবে কি না, এইটুকু আসতে যদি তার শরীর আরও খারাপ হ'য়ে ওঠে, তাই ডাক্তারদের কথায় বাধা হ'য়ে তোমায় একটু কষ্ট দিতে বাধা হচ্ছি। তুমি নিশ্চিত থাক মা, তার জন্তু তোমার কোনও চিন্তা নাই। এখন দেওয়ানজী বাতে শীঘ্র শীঘ্র সেরে ওঠেন, তার জন্তু প্রাণ দিয়ে সেবা কর মা! দেওয়ানজীর একদিন সবই ছিল,—খুব বড় ঘরে—উচ্চবংশে ওর জন্ম, খুব উচ্চশিক্ষায় শিক্ষিত। স্ত্রী-পুত্র কন্যা সবই অকালে মরিয়া যাওয়ায়, দেশে আর মন স্থির রাখিতে না পারিয়া, ৫০ বৎসর পূর্বে তোমারই পূজ্যপাদ স্বর্গীয় ঠাকুরদাদা মহাশয়ের নিকট কৰ্ম প্রার্থনা করিয়া একদিন এখানে আসেন। সেইদিন হইতে সাধুভাবে কার্যা করিয়া, সামান্য কার্যা হইতে এত বড় সংসারের সর্বময় কর্তার পদ নিজের চেষ্টায় গ্রহণ করিয়াছেন। এমন নিৰ্মলচরিত্র—কর্তব্যপালনে এমন দৃঢ়নিশ্চয় মানুষ দেখা যায় না। এঁর গুণমুগ্ধ হইয়াই স্বর্গীয় কর্তামহাশয় এই সব অক্ষয় কীর্তির স্থাপনা করেন। স্কুল, টোল, চিকিৎসালয়, অনাথ-আতুর-সেবাশ্রম প্রভৃতি যাহা কিছু

দেখিতেছ, সবই এই দেওয়ানজীর মন-প্রাণ-শক্তি দিয়ে তৈরী। এ সব বস্তুর প্রকোপে প'ড়ে শ্রীহীন ব'লে মনে হচ্ছে। কিন্তু, এই বৃদ্ধ দেওয়ানজীকে যদি কোনও প্রকারে যমের সঙ্গে লড়াই ক'রে নাচাতে পার মা, তাহ'লে আবার এ সব যেমন ছিল তেমনই হ'য়ে উঠবে, এ কথা নিশ্চিত জেনো মা। তাই আমি ছুটে এসেছি - এঁকে দেখতে। এত বড় কস্মবীর, আদর্শ লোক এ দেশে আর দেখিনি। চিরদিনের মধ্যে কখনও একটা অশ্রয় ভুল এঁকে দিয়ে হ'তে কেউ কখনও দেখিনি। সামান্য আয় - এঁরই অধ্যবসায়ে, বস্ত্রে, চেষ্টায়, আত্ম এত বড় হয়েছে। তার চেয়ে বেশী কথা মা, তোমাকে বুক ক'রে সেই ছ'মাসের বেলা হ'তে এত বড় করেছেন। এত আদর, বহু তোমায় কেউ কর্তে পারেনি মা, ইনি যা করেছেন। তোমার জন্ম একজন শিক্ষয়িত্রী রাখবার কথা একদিন আমাদের মধ্যে পরামর্শ হ'চ্ছিল। সে কথা গুঁকে জানান ইচ্ছে করেই হয়নি। কারণ, মত দেবেন না ব'লেই আমাদের মনে ধারণা ছিল। যখন সেটা কার্যে পরিণত ক'রে জানান হ'ল, তখন উনি বলেন, - 'এই এত বড় বংশে মোটে একটা মাত্র মেয়ে, তাও যদি আবার প্রত্যেকেই নিজের নিজের মত ওর উপর চালিয়ে শিক্ষা দিতে বসেন, তাহ'লে বড় বিষময় ফল হবে। ওর জীবনটাই নষ্ট হ'য়ে যাবে। যা হবার হবেই, তবুও বলি - মেয়েকে মা হ'বার উপযুক্ত শিক্ষা দেওয়াই সকলের উচিত, অল্প শিক্ষায় তাদের পাতিত্য আসে। নারীর মর্যাদার সীমা মাতৃহে যতদূর বিকাশ পায় - অপর দিকে - ভোগ বিলাসের দিকে তাঁদের সে সম্মান ঠিক ততটা কমে যায়। এই বুঝে কাজ করলেই ভাল হয়।' সেইদিন থেকে উনি আর তোমার শিক্ষার সম্বন্ধে

কোন কথা অভিমান ক'রে বলেননি। তিনি নিজে যতটা তোমায় স্নেহের আবরণে রেখেছেন—চিরদিন যে ভাবে দেখেছেন—তার কণামাত্রও আমাদের দ্বারা সম্ভব হয়নি। দেওয়ানজীর এই জীবন-মরণ সন্ধিস্থানে একা তোমাকেই সর্বপ্রকারে সেবা কর্তে হ'বে—যেন কোনও প্রকারে উনি এতটুকু কষ্টও বুঝতে না পারেন। স্ত্রী, পুত্র, কন্যা; ভগিনী থাকিলে—সেমন ভাবে এর সেবা কর্ত, তোমাকেও তেমনি কর্তে হ'বে। এই সব কর্তনা-জ্ঞান তোমার আছেই—তুমিও প্রাণপণ করিয়া তাঁর সেবা কচ্ছে। ও করবেই, একথা জানা সত্ত্বেও আমি তোমায় বারবার ক'রে মনে পড়িয়ে দিচ্ছি মা! দেখ না, তোমার কর্তব্য যেন কোথাও অঙ্গহীন না হয়। সদাশিব এখানে না আসা পর্যন্ত আমিও সবদিন যে এখানে থাকতে পারবো, তাও ত বলতে পারি নি। সামনে পূজার কিস্তি। এবারে অনেক মহালে আদায় হবে না, বানের জলে ফসল নষ্ট হ'য়ে গেছে। পেটে না খেয়ে খাজনা দেবে কোথা হ'তে! কিন্তু রাজার খাজনা আমাদের ত দিতেই হবে; না হ'লে সব বিকিয়ে যাবে, এর উপায় কর্তেই হ'বে। সাত-আনী ও নারায়ণপুরের বৈষয়িক ব্যাপারে আমার একটুও সময় হবে না মা, যাতে সময়ে সময়ে এসে তোমাদের সাহায্য করতে পারি। খুব সাবধানে সবদিকে নজর দিয়ে, মান-সম্মত বজায় ক'রে থেকো মা। কখনও ধৈর্য হারিও না। মায়া, কে কে তোমার কাছে এখানে এখন আছেন মা!”

“ও পাড়ার মাসীমা, তার মেয়ে, আর বানের-জল—এঁরা দিনরাত এখানেই থাকেন। বানের-জল আর আমি দেওয়ান

জেঠামশায়ের কাছে সদাসর্বদা রয়েছি। আর গুঁরা সব এদিকের কাজ কর্ম দেখেন। কাছারীর লোকজন সব বাইরেই থাকে। বানের সময় যারা সব এসেছিল, তারা প্রায় সকলেই চলে গেছে।”

“বানের-জল আবার কার সঙ্গে পাতালে মা! সেকালে ত গঙ্গাজল পাতাতো। এ তোমার নতন পাতান সম্বন্ধ বলে মনে হচ্ছে। আমি কি এর আগে আর কখনও তাকে দেখিনি?”

মায়া হাসিতে হাসিতে বলিল—“না জেঠামশায়, কখনও তাকে দেখেন নাই। এই বানেই তার সঙ্গে আমার আলাপ হ’য়েছে। সে খুব ভাল, খুব লক্ষ্মী, খুব বুদ্ধিমতী। তারা বরাবর কল্কাভায় থাকতো, অনেকদিন আগে এ দেশেই বাড়ী ছিল। কোথায় নামটা আমার ঠিক মনে হচ্ছে না। আমারই মত মা-বাপের এক মেয়ে। মাস কতক হ’ল বানের-জলের বাপ মারা গেছেন। কার কাছে আর বিদেশে বিভূয়ে থাকবেন—তাই দেশে এসেছিলেন সাবেক বাড়ীতে বাস করতে। তাঁদের দেশে আসার পরেই এই বান আসে। বানের জলেই সব বাড়ী-ঘর প্রায় নষ্ট হ’য়ে গেছে। গুঁদের ওখানে আরও বেশী বান হয়েছিল। বানের ক’দিন মায়ে-ঝিয়ে ছাতে ব’সে উপোস দিয়ে কাটিয়েছিলেন। দেওয়ান জেঠামশায় আর—”

“কি বল্ছিলে—খাম্লে কেন মা!”

এমন সময় মায়ার বানের-জল সেই ঘরে আসিয়া উপস্থিত হইল। হাসিতে হাসিতে বলিল—“ওকে আর সে নাম কর্তে নাই, তাই বল্বে না জেঠামশায়! আপনি যখন মায়ার জেঠামশায় তখন আমারও ত জেঠামশায়?” এই বলিয়া অনিন্দ্যসুন্দরী অপরিচিতা ষোড়শী হাসিতে হাসিতে জ্ঞানানন্দবাবুকে প্রণাম

করিল। জ্ঞানানন্দবাবু আশীর্বাদ করিয়া বলিলেন—“তা বই কি মা, আমায় তুমি যদি ভক্তির চক্ষে এত বড় সম্মান—আমার পরিচয় না পেয়েও দিতে পার, তাহ’লে তোমার এই বুড়ো ছেলেও যে তোমায় মায়ের সম্মান, মেয়ের আদর না দিয়ে থাকে কি করে ? হ্যাঁ, তার পর কি হ’লো ! তুমিই তোমার পরিচয় দিয়ে আমায় নিশ্চিন্ত কর। তোমার সব কথা শোনার জন্তু আমার বড়ই আগ্রহ হচ্ছে।”

“জ্যেষ্ঠামশায়, আমার সব কথা জেনে আপনি নিশ্চয়ই খুব দুঃখ পাবেন। আমার সব কথা আমি আপনার সামনে দাড়িয়ে বলতেও পারব না। সময় মত মায়ার মুখে শুনবেন।”

“না মা, তোমার ছেলের কাছে সব কথা বলতে তুমি কোনও রকমে কাতর হ’য়ো না। যখন তোমায় মা ব’লেছি—তখনই যে তোমার সব সুখ দুঃখ আমার হ’য়ে গেছে।”

“আমার পিতার নাম হরনাথ চট্টোপাধ্যায়। জন্মাবধি কলিকাতাই আমাদের বাড়ী ব’লে জান্তাম। দেশের কোনও সংস্রবও আমাদের মধ্যে থাকে নাই। মা-বাবার মুখে মধ্যো মধ্যো শুনতাম, বর্দ্ধমানের সন্নিকটে ধনপোতা নামক গ্রামে আমাদের আদি বাড়ী—তা এখনও আছে। গত পাঁচ ছ’ বছর মাত্র দেখেছি যে, বাবা দেশের বাড়ী মেরামত করবার জন্তে মাঝে মাঝে টাকা পাঠাতেন। বাবা পাটের বাবসা ক’রে আমাদের জন্তে বিস্তর টাকা কড়ি রেখে গেছিলেন। কিন্তু, অভিভাবকহীন অবস্থায় মাত্র কর্মচারীর উপর নির্ভর ক’রে থাকলে টাকার যা সন্ধ্যাবহার হয়, সে রকমেও অনেক টাকা নষ্ট হ’য়েছে। নানা কারণে বাধা হ’য়ে, আমরা দেশের বাড়ীতেই বাস করবার জন্তু এসেছিলাম। গত চৈত্র মাসে বাবা স্বর্গারোহণ ক’রেছেন।

“এই চার মাসের মধ্যে আমাদের অনেক বিপদ গিয়েছে। বাবা বিশ্বাস ক’রে ঝাঁকে সঙ্গে নিয়ে কাজ কর্ত্ত শিখিয়েছিলেন— কারবারের সব ভার দিয়েছিলেন—এবং আমার—আমাদের একমাত্র অভিভাবক নির্দেশ ক’রে গিয়েছিলেন, তাঁরই ব্যবহারে এই ক’মাসে আমাদের প্রায় সঞ্চিত ধনের অর্ধেক নষ্ট হ’য়ে গেছে। কারবার হিসেবে যত না লোকমান হ’য়েছে—তাঁর শঠতায় তার চেয়ে অনেক বেশী ক্ষতি হ’য়েছে। তাই মা বিরক্ত হ’য়ে নামমাত্র মূল্যে বাবার আফিস বিক্রি ক’রে আমায় নিয়ে দেশে এলেন। আমি সব কথা আপনাকে বুঝিয়ে বলতে পারলাম না। সময়ে সময়ের মুখে সব শুন্তে পাবেন।”

“তোমার মা ঠাকুরগ এখন কোথায়?”

“তিনি কাল সকালে ধনপোতায় গেছেন। বানের মধ্যেই চলে আসা হ’য়েছিল—তার পর বাড়ী-ঘরের অবস্থা কি যে হল তা ত আর দেখা হয় নি। আমাদের পুরাতন চাকর, আর মায়ার দেওয়া দু’জন দরোরান মার সঙ্গে গেছে। সেখানের সব গোছগাছ হ’লে আমায় নিয়ে যাবেন। যে ক’দিন তা না হচ্ছে, দয়া ক’রে আমায় আপনাদের এখানেই সে ক’দিন থাকতে দিন।”

“তুমি আমায় কি কথা বলছ তা জান না মা! তুমি যে আমার কত বড়ের জিনিস, তাও তুমি জান না। যাক সে কথা পরে হ’বে। এত কথার মধ্যেও ত তোমার নামটি একবারও শোনালে না!”

“শ্রীমতী মহামায়া দেবী।”

“আর তোমার মায়ের নাম বিষ্ণুপ্রিয়া।”

“আপনি কি ক’রে জানলেন?”

“তোমার মা আমার মাতুল-কণ্ঠা । বিষ্ণুপ্রিয়ার যখন এক বৎসর বয়স তখন বড় মামা—তোমার দাদামহাশয় মারা যান । আমার মামার বাড়ী ছিল শ্রীরামপুরে । ছোট মামা তার আগে হ’তে রেঙ্গুনে । এই সময় হ’তেই মামীমা শিবপুরে বাপের বাড়ীতে বিষ্ণুপ্রিয়াকে নিয়ে থাকেন । লোকমুখে কখন কখন তোমাদের সংবাদ পেতাম । যখন বিষ্ণুপ্রিয়ার ধনপোতার বিবাহ হয়, তখন আমাদের কোনও সংবাদই মামীমা দেন নাই । এই সূত্রে মামীমার সঙ্গে মায়ের একটু মনোমালিন্য হ’য়েছিল । সেই হ’তেই বড় আর কেউ কারও সংবাদ নিতেন না । কলিকাতায় যখন আমি ও সদাশিব একসঙ্গে কলেজে পড়ি, তখন হরদাদাও—তোমার পিতা—আমাদের সঙ্গে পড়তেন । তোমার পিতা আমাদের ক্লাসের সকলের বড় ছিলেন ; আর সব কাজেরই প্রথম উদ্যোগী ছিলেন বলে—সকলেই তাঁকে দাদা বলে ডাকতেন । এক দেশে বাড়ী বলে আমাদের সঙ্গে তাঁর খুবই ঘনিষ্ঠতা হ’য়েছিল । আমরা যখন বি-এ পড়া শেষ ক’রে, দেশে চ’লে এসে বিষয় কন্ঠ দেখতে থাকি, তখন তিনি এম্-এ পড়ার জন্ত কলিকাতাতেই রহিয়া গেলেন । এম্-এ পাশ ক’রে হরদাদা শিবপুরেই বিষ্ণুপ্রিয়াকে বিবাহ করেন । হরদাদার পিতা পূর্বেই মারা যান । সংসারে—অভিভাবকের মধ্যে মাত্র মা । তাঁর মাকে পর্য্যন্ত সংবাদ দেননি । বিয়ের পর একেবারে বো নিয়ে দেশে আসেন । তাতে তাঁর মা তাঁর উপর অত্যন্ত দুঃখিত হ’য়ে কাশীবাস করেন । আর কখনও দেশে আসেন নি । এই সূত্রে হরদাদাও দেশের ময়া ত্যাগ করেন । বিষ্ণুপ্রিয়ার মামা তখন পাটের কারবার কর্তেন । তাঁর সঙ্গে হরদাদাও ব্যবসা আরম্ভ

করেন। ঐ পাটের ব্যবসাতেই হরদাদার খুব লাভ হয়। কলিকাতাতেই বাড়ী-ঘর করেছিলেন। দেশে কখনও আসতে শুনিনি। তোমার দুটি ভাই হয়েছিল না?”

“হ্যাঁ, আমার শনির দৃষ্টিতেই তারা একেবারে উড়ে গেছে। এ কথাও মার মুখে শুনেছি।”

“অল্পভোগী তারা,—নিজের কস্মফলে এসেছিল—আবার নিজেরাই চ’লে গেছে। এমন কত হচ্ছে। তার জন্তু নিজেকে ধিক্কার দিতে নেই মা। কলিকাতায় তুমি বেথুন কলেজে পড়তে না? কতদূর পর্য্যন্ত লেখাপড়া করেছ মা?”

“আপনি আমাদের সব খবরই রাখেন। অথচ আমি আপনাকে কখন দেখিনি। আপনি আমাদের বাড়ী কখনও ত মান্ নি!”

“তোমাদের বাড়ী যাইনি বটে, কিন্তু তোমার বাবার অফিসে মাঝে মাঝে যেতাম। শেষ বছর চার আর দেখা সাফাৎ একেবারে হয়নি। তারও একটা কারণ ছিল। বোধ হয় এ পর্য্যন্ত হরদাদা জানতেও পারেন নি যে, তিনি আমার ভগিনীপতি হন। তাই একটা অসঙ্গত প্রস্তাব ক’রে আমাকে একখানা পত্র দেন। সে পত্রের কথা তোমার মাও বোধ হয় জানেন। আমি পত্র-খানার উত্তর পর্য্যন্ত দিই নি। সেই থেকে হরদাদার সঙ্গে আর দেখাও করিনি। সেইজন্তু তাঁর বিশিষ্ট বন্ধু হ’য়েও আমি এখন এমন পর হ’য়ে গেছি। যাক্, যা হবার হয়েছে। ঘটনাচক্রে প’ড়ে তোমার সঙ্গে দেখা হ’য়ে গেল। তোমার মা এখানে এলেই আমার সংবাদ দিও। আমি একবার এসে দেখা করে যাব। এখন আর ধনপোতায় যাব না। তোমার মুখে বিষ্ণুপ্রিয়া সন

কথা নিশ্চয়ই শুনবে। স্বামীর বন্ধু বলেই হ'ক, আর শোণিত-সম্বন্ধে ভাই বলেই হ'ক, নিশ্চয়ই আমার যত কিছু দোষ তাদের কাছে হ'য়েছে, তা ক্ষমা করবেই। আমি এমন আশা করতে পারি ত মা ?”

“মাগা—মামা, আমার—আমাদেরই দোষে আমরা সব হারিয়ে ব'সে আছি। যা হবার তা ত হ'য়ে গেছে—সে নিয়ে আপন আলোচনা ক'রে কি হ'বে ? এই দুর্দিনের মধ্যে ভগবানই যখন আপনাদেরই নিকটে আমাদের পাঠিয়েছেন, তখন আর দুঃখ কি ? আপনাকে আমি আর কি বুঝাব মাগা ! আমাদেরও সব দোষ ক্ষমা করুন। আমার মনে হচ্ছে, এতদিনে দুঃখ গ্রহের ফের আমাদের কেটে গেল। ওঃ, মা কি খুসিই হবেন যে, এসব জানতে পেরে—তা আর বলবার নয়। আমার মনে হচ্ছে, এখনই ছুটে গিয়ে মাকে ডেকে আনি।”

“হ্যাঁ মা, এখানে কি ক'রে তোমাদের আসা হ'ল ? তখন মায়া তোমায় দেখে বলতে বলতে খেমে গেল।”

“না মাগা, আমায় দেখে ও খামেনি। মায়া, দেওয়ান মহাশয় আর—এই কথা বলেই তখন খেমে গেছিল। তার মানে ও ওর বরের নামটি কর্কে না ত !”

মায়া এই সময় সে করুণ ত্যাগ করিয়া বাহিরে যাইয়া, জ্ঞানবাবুর অলক্ষিতে মহামায়াকে একটি কিল দেখাইয়া হাসিতে হাসিতে চলিয়া গেল।

মহামায়া আবার বলিতে লাগিল—“বানের জল যেমন বাড়তে লাগল—আমরাও অমনি এক এক ধাপ ক'রে হুঁতলার ঘরে আসতে লাগলাম। দামোদরের বান যে এমন ব্যাপার তা কে

জানতো মামাবাবু! মাঝে-মাঝে কাগজে দেখতুম, 'দামোদরে
 ভীষণ বণ্ডা। কত লোকের বাড়ী-ঘর বানের জলে ভেসে যাওয়ায়
 লোকে গৃহশূন্য, দেশে অনাভাব। সাধারণের সাহায্য একান্ত
 আবশ্যিক।' তখন মনে হ'ত, যদি প্রায়ই এমন হয়, তবে সে
 দেশের লোকে সেখানে বাস করে কেন? যাতে বাড়ী-ঘর
 ভেসে না যায়, এমন ক'রে তারা বাস করে না কেন? কিন্তু এখন
 দেখছি, যাবে কোথায়? বিপদ ত এক রকমের নয়, এক দেশের
 মধ্যেও নয়। কলকাতার মত জায়গা হ'তে আমরা এক বিপদের
 বোঝা ঘাড়ে নিয়েই এখানে নিশ্চিত হ'তে এলাম। আর
 এখানেও দেখি, আরও এক বিপদ আমাদের সঙ্গে-সঙ্গে এসে
 হাজির। আমার মনে হয়, বিপদকে যারা যত ভয় করে, তাদের
 বিপদ ততই চেপে ধরে। আর যারা তাকে ডাকে—গ্রাহ্য করে
 না—কিছুতেই তার শাসন মানতে চায় না, তাদের হ'তে বিপদ
 তত দূরে চ'লে যায়। এই বানের সময় আমরা মা-মেয়েতে একটা
 মাত্র চাকর নিয়ে বিপদে প'ড়ে, ছ'তলার ঘরে ব'সে অনাহারে কত
 কেঁদেছি। শেষে মা বলেন, 'তোর কান্নার কি আছে? তুই
 কেন কাঁদচিস্। বেটাছেলেদের মত লেথাপড়া শিখেছিস্, সাহস
 কিংবা বুদ্ধি তাদের মত আয়ত্ত কর্তে পেরেছিস্ কি? আমি ত
 তোর মত হাউমাউ ক'রে কাঁদছি না। আমার চোখে জল আসছে
 কেন তা জানিস্—তোর কান্না দেখে। আর তোকে এত ক'রে
 মানুষ ক'রে মনে হয়েছিলো, তোর হ'তেই ছেলে-মেয়ের ছ'কাছই
 পাওয়া যাবে। এখন দেখছি, আমাদের ভস্মে ঘি ঢালা হয়েছে।
 বিলেতী পড়া পড়ে শেষ এই হ'ল যে, নিজের জীবনটা ব্যর্থ করতে
 বসেছিস্, আর আমাদেরও ব্যর্থ ক'রে দিলি। যা বাবু, আমার

সামনে থেকে একটু সরে যা ।’ মায়ের এই কথা শুনে আমি যেন নূতন একটা পথ দেখতে পেলাম । ধীরে-ধীরে ছাদে এসে চারিদিক চেয়ে দেখলাম, জনমানব কোথাও দেখা যায় না । কেবল চারিদিকে জল । তখন সেই ছাদে ঝড়ে-ভাঙ্গা ঘরের যত সব ভাঙ্গা দরজা ও কাঠ জড় ক’রে, একটা মস্ত বড় আগুন জ্বালিয়ে, পাশে চুপ ক’রে বসে রইলাম । আমি মনে এই ধারণা ক’রে আগুন জ্বালিয়ে দিলুম, যদি কেউ আলো দেখে আমাদের নিতে আসে । সমস্ত রাত্রি আলোটা একভাবে রাখবার জন্য আমি সেদিন একটুও ঘুমইনি । পরদিন সকাল বেলা দেওয়ানজী নৌকা ক’রে এখানে এসে কতকগুলো চাল, চিঁড়ে, গুড় আমায় দিয়ে ব’লে আসেন—‘মা, আজই তোমাদের এখান হ’তে নিয়ে যাব । এখনকার মত এই সব খেয়ে কোন রকমে একটু শান্ত হ’য়ে থাক । এ নৌকায় দু’জনের বেশী লোক যাবে না । আমরাই দু’জন আছি । বড় নৌকা নিয়ে, আজই আমরা আসব ।’ সেইদিন সন্ধ্যার কিছু পূর্বে দেওয়ানজী আর প্রণব-দাদা আমাদের এখানে নিয়ে আসেন ।”

মহামায়া এখানে এসেই মায়ার সঙ্গে যে স্থত্রে বানের-জল পাতায় তাহাও নিয়ে বিবৃত হইল—

মহামায়া এ বাড়ীতে পদার্পণ করিয়াই মায়াকে বলে, “ভাই আমার খুব পিপাসা পেয়েছে, একটু জল দাও ।” মায়ার কাছে জল চাওয়াতে, মায়া তাহার হাতে জল দিয়ে বলে, “এই লও ভাই, বানের জল, এতেই তোমার তৃষ্ণা দূর কর ।” মহামায়া তখন জল খেয়ে ঠাণ্ডা হ’য়ে মায়াকে বলে, “চোখের জল ক’দিন পেট পূরে খেয়েও তৃষ্ণা মেটেনি । সমুদ্রের মাঝে পড়ে, যেমন লোকে জল

জল ক'রে মরে—অথচ খেতে পায় না। আমিও তেমনি, বানের জলের মাঝে পড়ে, জল না খেতে পেয়ে, মর্মে ব'সেছিলাম। এখন তোমার হাতের গুণে বানের জলও মিষ্টি হয়েছে। আমার চোখের জলে যে বানের জল বইছে, তাও একদিন তোমারই মহত্বে, তোমারই হাতে পড়ে, যেন বানের জলের মতই মিষ্টি হয়। তুমি আজ হ'তে আমার 'বানের-জল'। আর বানের জলের মধ্যে তোমার সঙ্গে আমার আলাপ হয়েছে ব'লে, আমিও তোমার বানের-জল।”

১৩

বৃদ্ধ দেওয়ানজীর অসুখ ক্রমশঃই বৃদ্ধি পাইতে লাগিল। তাঁর জীবনের আশা সকলেই একপ্রকার ত্যাগ করিয়াছিলেন। মাত্র মায়া ও মহামায়া, তাহাদের দৃঢ় বিশ্বাসের উপর নির্ভর করিয়া, ভগবানের নিকট দেওয়ানজীর জীবন-ভিক্ষা করিতে করিতে, একই ভাবে সেই রোগীর শয্যায় দিন রাত সমানভাবে কাটাইতেছিল। দিন পনের পরে বৃদ্ধ কবিরাজ মহাশয় বলিলেন, “মা, তোমাদের শুশ্রূষার গুণে এবার দেওয়ানজী বেঁচে উঠেছেন। আর কোনও ভয় নাই। জ্ঞান হওয়ার পর বেশী কথা বলিতে নিষেধ ক'রো। তোমরাও এখানে, গুর কাণে ঘাতে শব্দ না যায়, এমন ভাবেই ইসারা ইঙ্গিতে সেবার কার্য করো। যখন জ্ঞান—প্রথম জ্ঞান হ'বে, তখনই আমায় সংবাদ দিও। এর পরে নে সব ঔষধ দিতে হ'বে, তার যোগাড় করি।” কবিরাজ মহাশয় তাহাদের হৃদয়ে নূতন আশার দীপ জ্বালাইয়া দিয়া চলিয়া গেলেন। ক্রমাগত পরিশ্রমে যে অবসাদ তাহাদের শান্ত করিয়া তুলিতেছিল, আজ কর্ম-সাকল্যে তাহাই নবশক্তির প্রেরণার মত আসিয়া,

আবার তাহাদিগকে নূতন করিয়া তুলিল। অবসাদের গ্লানি যেন মুহূর্ত্তে অধ্যবসায়ের শক্তিতে পরিণত হইয়া তাহাদের উপর অধিষ্ঠিত হইল। দেওয়ানজী দিনের পর দিন ক্রমশঃ আরোগ্যের পথে আসিতে লাগিলেন।

দেওয়ানজী জ্ঞান হইবার পর হইতে মায়াকে মহামায়া, আর মহামায়াকে মায়া বলিয়া ডাকিতে লাগিলেন। প্রথম প্রথম মনে হইয়াছিল, বোধ হয় অসুখের ঘোর এখনও সম্পূর্ণ কাটে নাই, তাই এরূপ ভ্রম হইতেছে। কিন্তু দু'পাঁচ দিন বাইবার পরেও যখন সে ভ্রম কাটিল না, তখন সকলেই মনে করিলেন—এই অসুখে দেওয়ানজীর মাথা একেবারে খারাপ হইয়া গিয়াছে।

দেওয়ানজীর যখন এইরূপ অবস্থা, তখন বিষ্ণুপ্রিয়া ধনপোতা হইতে ফিরিয়া আসিলেন। দেওয়ানজী পথ্য পাইলে পর, তিনি মহামায়াকে লইয়া ধনপোতায় যাইবেন, এমনই মনে-মনে স্থির করিয়াছিলেন। কিন্তু, দেওয়ানজীর এই ভ্রম দেখিয়া বুঝিতে পারিলেন, এরূপ অবস্থায় সত্বর যাওয়া তাঁহার পক্ষে কোনরূপেই সম্ভব হইবে না। মহামায়াকে দেখিতে না পাইয়া দেওয়ানজী আবার যদি অসুখে পড়েন, তাহা হইলে হয় ত আমাদের জীবন রক্ষকের প্রাণহন্বী হইতে হইবে।

জ্ঞানবাবু ইতিমধ্যে এখানে আসিয়া বিষ্ণুপ্রিয়ার সহিত সাক্ষাৎ করিয়াছিলেন। কবিরাজ মহাশয়ের নিকট দেওয়ানজীর সমস্ত বিবরণ শ্রবণ করিয়া বিষ্ণুপ্রিয়াকে বলিলেন, “দেওয়ানজীর অন্ন পথ্য পেতে এখনও একমাস দেৱী আছে। এর মধ্যে বোন, তোমাদের যাওয়া হ'বে না। তা ছাড়া, এই এত বড় ভ্রমটা যখন গুর হ'য়ে দাঁড়িয়েছে, তখন তার প্রতিকারের জন্তে কবিরাজ

মহাশয়ের কথামত আমাদের চলাও উচিত।” কবিরাজ মহাশয় বলিলেন, “শরীরে বেশ বল পেলে পর, দুর্বলতার জন্ত এখন যে দম, তা নষ্ট হ’য়ে যাবে। বেশী বয়সে একরূপ ভ্রম কারও কারও অল্প দিনের জন্তই হ’য়ে থাকে। সামনে এই মহাপূজার সময়, তুমি যদি এখানে না থাক, তবে এ বাড়ীর এতদিনের পূজা বুঝি বা বন্ধ হ’য়েই যায়। দেওয়ানজী ভাল থাকলে, আর কাকেও এ সব দেখতে হ’ত না। যখন এঁদের এই বিপদের মাঝে দৈবচক্রে এসে পড়েছ, তখন মায়ের পূজা যাতে সুশৃঙ্খলায় হয়, তার ব্যবস্থা করাষ্ট উচিত।”

বিষ্ণুপ্রিয়া বলিলেন, “আপনার যদি তাই ইচ্ছে হয়, তবে আর অণু কথা কি আছে। তাই হবে। কিন্তু দাদা, আমার মন বড়ই চঞ্চল হ’য়ে রয়েছে, এ মন নিয়ে কি ক’রে মায়ের পূজার আয়োজন করব। আমার আশা-উত্তম সবই একেবারে গেছে। হয় ত শত ক্রতীতে অপরাধের বোঝা আরও বেড়ে যাবে।”

জ্ঞানবাবু বলিলেন, “না বোন, তা হয় না। দেবতার কাজে একবার মনপ্রাণ ঢেলে দিতে পারলে—দেবশক্তি নিজেই যে তার ওপর দিয়ে সব কাজ করিয়ে লন। আমাদের ক্ষমতা কি যে মায়ের পূজার সম্পূর্ণ অনুষ্ঠান করতে পারি। মাতৃপূজায় সন্তানের অধিকার সব সময়েই আছে। কর্মের উপর দিয়ে মনের অবস্থা যখন যেমন তিনি করিয়ে দিয়েছেন, তখন তাঁর পূজা তেমনই হ’বে। তুমি, আমি শত কর্তৃত্ব ক’রেও যা হ’বার তার এতটুকুও অণুথা করতে পারি কি?”

“মায়ের উপর—দেবতার উপর এতটা প্রাণপোরা বিশ্বাস থাকলে, আজ আমার এ দশা হ’বে কেন দাদা!”

• “এখনও তুমি মন ঠিক করতে পারনি বোন! কেন দিদি, বৈধব্য কি তোমারই এই নূতন হ’য়েছে। এর আগে কি আর কেউ বিধবা হয়নি—না, এর পর আর হ’বে না। চিরদিনই এ সব হচ্ছে এবং হ’বে। ঝাঁর অভাবে মনে অশান্তি, তাঁর দিকে চেয়ে—তাঁকে ভেবে—তাঁর পরিণতি দেখে মনের মধ্যে তাঁর স্বরূপ ধ্যান করতে যদি না পার বোন,—তাহলে যে তোমার সারা-জীবনের কর্তব্যের ক্রটি থেকে যাবে। মানুষ কি কখন একে-বারে মরে যায়! কখনও ধ্বংস হয় না। তিনি নিত্য শাস্ত—অবিনাশী—সনাতন। মাত্র আধার—এই রক্তমাংসের জীর্ণ-শরীর ত্যাগ ক’রে অল্প নূতন আধারে আশ্রয় লন। আচার বা পুণ্যফলে সংস্কারহীন হ’য়ে, এই সনাতন পুরাণ পুরুষ পূর্ণসত্তার সঙ্গে এক হ’য়ে যান। আমাদের শাস্ত্রে বলেন, মানুষের দেহত্যাগ হইলেই ঈশ্বরত্ব প্রাপ্ত হয়। তাই আমরা ভগবৎ আরাধনায় আমাদের সব পেতে পারি। আর তিনিই যে সৰ্ব্বময়। তাঁকে পেলে স্বামী পুল সবই পাওয়া হবে। তাঁর সেবায় সকলেরই তৃপ্তি হয়। আর তাঁর সেবা না করে—শুধু মৃতের জন্ত মনের মধ্যে হা-হতাশ করলে যে মৃতের প্রতি অসম্মান ক’রে তাঁর পুণ্য নষ্ট ক’রে দেওয়া হয়। মৃতের সদগতির জন্ত—তৃপ্তির জন্ত আমরা চিরদিন ভগবানের মধ্যেই যেন তাঁকে ডাকতে পারি। আর সে সেবা—সে ডাক চিরদিনই যথা-স্থানে পৌঁছায়ই।—আর তাহাতেই আমাদের শান্তি ও পরমানন্দ।”

“দাদা, সব সময় মনের দুর্বলতায় এ ধারণা থাকে না। তাই আমাদের এত দুর্দশা। মনে বুকেও—জেনেও দুঃখের ভারে এই সব ধারণা যেন কোথায় ডুবে যায়; আর তাতেই যেন সব সময়ে মনের ময়লা আরও সংশয়ে বেড়ে ওঠে।”

“এ হ'য়েই থাকে, তার জন্ত হতাশ হবার কোনও কারণ নেই বোন! অর্জুনের বিশ্বরূপ দর্শনের পরেও সংসারে মোহ এসেছিল। ষাট হাজার বৎসর তপস্বী করেও পবিত্র যুগের দিনে মহর্ষি ব্রহ্মর্ষিদেরও মনের চাকল্যে সব পুণ্য নষ্ট হয়েছিল। এ ত মানুষের মধ্যে—দেবতাদের মধ্যেও এর চেয়ে বড় বড় ভুল হ'য়েছিল—বড় বড় পাতিত্য এসেছিল। এই ভুল, মনের এই দুর্বলতা চিরদিনই আছে এবং থাকিবেই। তা ব'লে আমরা হতাশ হ'য়ে আমাদের কল্যাণ হ'তে যেন কখনও দূরে চ'লে না যাই। দিনান্তে যতটুকু সময় পারি, নিশ্চাস নেবার মত অল্প সময়টুকুও যেন সেই অনাদি অনন্ত সনাতন পুরুষের যে কোন এক মূর্তি চিন্তা ক'রে আমাদের জন্মজীবন সফল কর্তে পারি।”

মহামায়া এই সময় আসিয়া একখানি পত্র জ্ঞানবাবুর হাতে দিয়া বলিল, “দেখুন মামা, একজন মেয়েমানুষ এই পত্রখানা আমার হাতে দিয়ে, হাতমুখ নেড়ে কি সব ইসারা ক'রে ব'লে চ'লে গেল। তার সে হাবভাব একটুও বুঝতে পারলাম না। আমি কত রকম ক'রে তাকে বসতে বললাম, তাও সে যেন বুঝতে না পেরে চ'লে গেল। মায়ার নামে চিঠি। মায়ী পূজার ঘরে আছে। আমি আমার কোতূহল চেপে রাখতে না পেরে পত্রখানা পড়েছি। প'ড়ে মনে হ'ল, যখন আমার হাতেই এ পত্রখানা এসে পড়েছে, তখন বোধ হয়, বিধাতার ইচ্ছা নয় যে মায়ী এ পত্র ঠিক এ ভাবেই এখনই পায়। আপনি দেখুন দেখি, এ পত্রখানা কার হাতের লেখা ব'লে আপনাব মনে হয়।”

জ্ঞানবাবু পত্রখানা বেশ ক'রে দেখে বলেন, “পত্রের লেখা

কার তা বলতে পারছি না। তবে সহিটা যে সদাশিবের তাতে আর কোনও সন্দেহ নাই।”

সেই পত্রের চারি পৃষ্ঠাই একবার তীক্ষ্ণ-দৃষ্টিতে দেখিয়া বলিলেন, “যে লেখা আশৈশব দেখে আসছি, তাতে ভুল হবার কোনও কারণ নেই। এ সহি সদাশিবেরই। কিন্তু আর আমি চেপে রাখতে পারি না মা! দেওয়ানজী সে কালের শক্তি নিয়েও যখন এই ব্যাপারে মাথা খারাপ ক’রে বসলেন, তখন আমারও সে অবস্থা এই কবে আসে দেখ।”

“কি বললেন মামা, আমি কিছুই বুঝতে পারছি না।”

“এখন পারবে না মা, পরে সব শুনবে। পত্রখানা তুমি মায়াকে দিয়ে এস। বিষ্ণু, তুমি দিদি আমার সঙ্গে দেওয়ানজীর ঘরে চল। আমার মাথাটা যেন একটু ধরেছে। এখন বেশী কথা কইলে মাথাটা আরও বেশী ধ’রে যাবে।”

মহামায়া ঠাকুর বাড়ীতে আসিয়া দেখিল—মায়া পূজা শেষ করিয়া ঠাকুর ঘর হইতে চরণামৃত লইয়া বাহির হইয়া আসিতেছে। মহামায়ার হাতে পত্র দেখিয়া জিজ্ঞাসা করিল—“কার পত্র দিদি! কে দিয়েছে?”

মহামায়া বলিল—“তোমার পত্র। তোমার পিতাঠাকুর দিয়েছেন।”

“বাবা আমায় পত্র দিয়েছেন! কে নিয়ে এল?”

“চিনি না তাকে।”

“জ্যেষ্ঠামহাশয়ও তাকে চেনেন নি।”

“একজন অজানা বোবা কালা মেয়েমানুষ আমারই হাতে পত্র দিয়ে তখনই চ’লে গেছে।”

“বেশ লোক ত সে। আচ্ছা, এখন চল দিদি, দেওয়ান জেঠা-
নহাশয়কে চরণায়ুত খাইয়ে দিয়ে, সেইখানেই বাবার পত্র পড়া
যাবে।”

১৪

জ্ঞানবাবু দেওয়ানজীর ঘরে আসিয়া দেখিলেন, তিনি বালিশে
ঠেস্ দিয়া বেশ সুস্থের মতই নিজে নিজে বসিয়া রহিয়াছেন।
আর নিজের মনেই যুহু যুহু হাসিতেছেন। আজ এত সকালে
দেওয়ানজী জ্ঞানবাবুকে দেখিয়া, আরও হাসিতে হাসিতে বলিলেন,
“সাত-আনীর বাবুর চোখে ধূলো দিয়ে, একটা লোক আমাদের
বাড়ীর ভেতর এসে, একখানা পত্র দেবার অছিলে ক’রে ভেতরের
পথ-ঘাট সব ছেনে গেল।”

“আপনি কি ক’রে জানলেন? এর মধ্যে এ কথা কে
আপনাকে ব’লে গেল? মহানায়ী কি এ ঘরে এখন এসেছিল?”

“বাবা! এত প্রণের উত্তর একসঙ্গে দেবার শক্তি এখন
আমার নাই। যাক্, এখনও সে লোকটা এ বাড়ীর সীমানা
ছেড়ে বাহিরে যায় নি। যেমন ক’রে হ’ক্ তাকে আঙুলে রাখুন।
না হ’লে বিপদ আরও বেড়ে যাবে।”

“যে এসেছিল, সে মেয়ে মানুষ, তাকে ধ’রে রেখে কি হ’বে?”

“অস্থ শরীরে বেশী বকাবকি ক’রে বোঝান আমারও পক্ষে
সম্ভব হবে না। বাবু! এখন দয়া ক’রে আমার কথাটা রাখুন।
এখনই সব রহস্য প্রকাশ পাবে। সে মেয়েমানুষ হ’তেই পারে না।”

জ্ঞানবাবু তখনি বাহিরে গিয়া দেওয়ানকে হুকুম দিলেন,
“সদর খিড়কীর চরজা একদম বন্ধ রাখ। আমি আবার হুকুম

না দেওয়া পর্যন্ত যেন একজন লোকও—কি মেয়ে কি পুরুষ, কেহই যেন বাহিরে যাইতে না পারে।”

জমীদার বাড়ীর শিক্ষিত দরওয়ান তখনই হুঁসিয়ার হইল। যথাকর্তব্য সাধনে বাবুর হুকুম মাথায় করিয়া লইয়াছে জানাইবার জন্য সেলাম করিয়া চলিয়া গেল।

জ্ঞানবাবু বা'র মহলের প্রত্যেক লোককেই চিনিতেন। তন্ন তন্ন করিয়াও শেষে কাহাকেও দেখিতে না পাইয়া, দেওয়ানজী'র ঘরে ফিরিয়া আসিয়া বলিলেন, “বা'র দিকে কাহাকেও পাওয়া গেল না। ভিতর দিকে যদি থাকে ত বলা যায় না।”

“বুঝেছি, আপনি পারবেন না। মাঝাকে একবার ডেকে দিন ত! সে একবার ভেতর-বার সব দিকটা দেখে আসুক, মহামায়াও সঙ্গে যাক। কি জানি হঠাৎ যদি কেউ অপমানই করে বসে।”

এমন সময় মায়া ও মহামায়া সে ঘরে আসিয়া উপস্থিত হইল। মায়া দেওয়ানজীর মুখে চরণামৃত ঢালিয়া, হাতটি তাঁহার বক্ষে একবার বুলাইয়া দিয়া, প্রণাম করিয়া দেওয়ানজীকে জিজ্ঞাসা করিল, “আজ কেমন আছেন, জেঠামশায়?”

দেওয়ানজী বলিলেন, “আজ না খুব ভাল আছি। এ ঘরের সব কটা জানালা কপাট একবার খুলে দিলে ভাল হ'ত। এখানে ব'সে ব'সে বাড়ীর ভিতরের চারদিকের পথ ও খালি জায়গা সবই দেখতে পাওয়া যায়।”

একজন প্রবীণ ভূতা আদেশ অপেক্ষায় দাঁড়াইয়াছিল। আদেশ শুনিয়া ঘরে আসিয়া অনেক দিনের বন্ধ করা সব কপাট জানালা খুলিয়া দিল। এই অষ্টকোণ ঘরখানির চারিদিকে অনেক জানালা

ও কপাট থাকা সত্ত্বেও চারি কোণে চারিটি খুব বড় বড় জানালা ছিল।

বাতায়ন পথ মুক্ত হইলে পর, দেওয়ানজী সেই খানসামার দিকে চাহিয়া বলিলেন, “নদেরচাঁদ, ঘরের চারিদিকে যে সব আয়না খাটানো রয়েছে, এ সব কেন আর পরিষ্কার করিস্ না। তোদের সব হ’য়েছে কি? মনে করেছিস, বুঝি বুড়ো এবার আর বাচবে না। তোদের যার উপর যে কাজের ভার দেওয়া আছে, তা ঠিক ঠিক যদি না হ’য়ে থাকে, তাহ’লে তোদের কি শাস্তি দেওয়া উচিত বল্ দেখি। যার বাড়ী, তিনি যখন তোদের বিশ্বাস ক’রে সব রক্ষা করবার ভার দিয়ে নিশ্চিন্ত হয়েছেন, তখন তোদের এত বড় বিশ্বাসঘাতকতা করবার সাহস কোথা থেকে এল? আজ সকলকেই সাবধান ক’রে দাও, যেন কাল কারও কোনও কাজের দ্রুতী দেখতে না পাই। কাল সব জিনিসই আমি নিজের চোখে দেখে বেড়াব।”

নতশিরে যথাকর্তব্য সমাধা করিয়া নদেরচাঁদ অপর আদেশের অপেক্ষায় বাহিরে যাইয়া উৎকর্ণ হইয়া রহিল; এবং সম্মুখে যাহাকে দেখিতে পাইল, তাহাকেই ইঙ্গিতে ত্রিকাল বৃদ্ধের আদেশ জানাইয়া দিল। জমীদার বাড়ীর মধ্যে মুহূর্তে যেন কাজের সাদা পড়িয়া গেল। ~~সব~~ সব নির্ঝাক্। কাহারও কণ্ঠের শব্দ কাহারও কর্ণে গেল না। বস্ত্র পর হইতে সকলেই অগ্ন অগ্ন কাজে ব্যস্ত ছিল। তারপরই দেওয়ানজীর অসুখে লোকজন সর্বদা ব্যস্ত ছিল। এখন তাহাদের সে সব হাঙ্গামা নাই বটে, কিন্তু আলস্য আছে ত!

দেওয়ানজী বাহিরের দিকে চাহিয়া বলিলেন, “অনেকদিন

এমন আলো, এমন বাতাস দেখি নাই। তাই, আজ যেন আমার কাছে সব নূতন ব'লে মনে হচ্ছে। দূরের নজরটা যেন অসুখে পড়ে অনেকটা কমে গেছে। পূর্বে যতদূর পর্যন্ত বেশ পরিষ্কার দেখতে পেতাম, এখন আর ততদূর দৃষ্টি যেতেই চাচ্ছে না। এখন যেন সব ইন্দ্রিয়শক্তিই তাদের কাজে আমার চারদিকে হাত জোড় ক'রে দাঁড়িয়েছে। আর আমি তাদের অনুরোধ করে বলছি— আরও দিনকতক না থাকলে থাকি কি ক'রে, আমার জন্ম-জন্মান্তরের সাথী, তোমরা আমার মায়া কাটাতে চাইলেও আমি পারি না। আমার মন বলিতেছে, ওগো মহাশয়গণ, তোমাদের মায়া কাটাইতে পারিব না। এত জন্মের আলাপ তোমাদের সঙ্গে—একটা কিছু সার্থকতার উপহার না দিয়া শুধু শুধু প্রত্যেক বার্নিকের সময়ই যে এমন করে চলে যাবে, তা হবে না। আমার মনের বার্নিকা না হ'লেও তোমরা যে জোর ক'রে আমার শরীরকে বৃদ্ধ ক'রে দিয়ে চ'লে যাবে তা হচ্ছে না। এবারে যদিই এভাবে যাও, তবে এই উপকারটুকু ক'রে যাও, যাতে ক'রে তোমাদের সব কাজ একেবারে শেষ হ'য়ে যায়। হে চক্ষু! তুমি দেখার সেরা দেখিয়ে যাও—যা দেখে আর কিছু দেখবার সাধ থাকবে না, যা হ'তে তুমি আমি দু'জনেই সার্থক হ'য়ে যাব। হে কর্ণ! তুমি শোনার সেরা শুনিয়ে যাও, যা ~~হ'তে~~ তোমার আমার কাজ একেবারে শেষ হ'য়ে যায়। হে পঙ্কেত্রিয়! হে চতুর্বিংশতি তন্ত্র, হে আমার শরীর ধর্ম! তোমাদের শতকোটি প্রণিপাত ক'রে বলছি, এমন স্থানে পৌঁছিয়ে দিয়ে যাও, যেখানে তোমাদেরও সমাধি ও শান্তি আছে, আমারও আছে; কাহারও গত্যাত নাই—সুখ-দুঃখ নাই—কেবল আনন্দ-প্রমাদ!

অশীতিপর বৃদ্ধ দেওয়ানজীর শরীর ও বাক্য যেন আবেগভরে কল্পিত হইয়া উঠিল। বক্ষোপরি দীর্ঘ শ্বেত শ্মশ্রুর নিম্ন হইতে যজ্ঞোপবীত তুলিয়া, দুই হস্তে ধরিয়া প্রণাম করিতে করিতে অতি দীর্ঘে বলিতে লাগিলেন,—

“ব্রহ্মানন্দং পরমসুখদং কেবলং জ্ঞানমর্ষিঃ
 চন্দ্রাতীতং গগনসদৃশং তত্ত্বমশ্রাদিলক্ষ্যং ।
 একং নিত্যং বিমলমচলং সর্বদা সাক্ষিভূতং,
 ভাবাতীতং ত্রিগুণরহিতং সদৃশং তং নমামি ॥”

১৩

কক্ষমধ্যে প্রত্যেক দর্পণখানির উপর একবার দৃষ্টিনিষ্কোপ করিয়া, দেওয়ানজী একখানির প্রতি অঙ্গুলি সঙ্কেত করিয়া বলিলেন, “দেখুন দেখি বাবু, ঐ আয়নাটায় কার ছায়া পড়েছে। কে যেন ঐ ঠাকুর মন্দিরের আড়ালে দাঁড়িয়ে রয়েছে। আর মাঝে মাঝে ভেতর বাড়ীর দিকে চেয়ে চেয়ে কি দেখছে। আর হাতে ওটা কি রয়েছে বেশ নজর হচ্ছে না?”

জ্ঞানবাবু দেওয়ানজীর কথামত নির্দিষ্ট দর্পণের সম্মুখে গিয়া দেখিয়া বলিতে লাগিলেন, “একজন লোক একখানা কাগজ হাতে দাঁড়িয়ে রয়েছে, আর মাঝে মাঝে চারিদিকে চেয়ে কি দেখছে, আর লিখে।”

দেওয়ানজী বলিলেন, “নদেরচাঁদ, শীঘ্র বামনকে ইসারায় ডাক, বিপদের কপাট বন্ধ করে দে। মায়াকে ফিরে আসতে বল।”

নদেরচাঁদ প্রথম আদেশ পাইয়াই ছোট দর্পণ লইয়া তাহার উপর সূর্য্যরশ্মি প্রতিফলিত করিয়া পরিচারকদের বিশ্রামাগারের

একটি নির্দিষ্ট কক্ষে সেই কৃত্রিম রশ্মি বারকতক ছলাইয়া দিতেই, একজন বামন বাহির হইয়া পাগলের মত উচ্চকণ্ঠে হাসিয়া উঠিল।

দ্বিতীয় আদেশের কার্যা করিতে নদেরচাঁদ একটি কপাটের কাছে আসিয়া, তাহার চৌকাঠ উঠাইতে যথাসাধ্য চেষ্টা করিয়াও সক্ষম হইল না।

তাহা দেখিয়া দেওয়ানজী হাসিতে হাসিতে বলিলেন, “যেমন কর্ম তেমনি ফল, পরিষ্কার করা হয় না, তাই ভারি হ'য়ে গেছে। নদেরচাঁদ খুব কাঁকি দিয়েছ বাবা,—দাঁও, আর যে ক'দিন দিতে পার। তোর হ'য়ে এসেছে। বয়সের সঙ্গে তোর ভীমরতি হয়েছে। কি ছিলি আর কি হলি। যা, নজর ছাড়া হ'য়ে স'রে যা।”

এই বৃদ্ধের গঞ্জনা সহ্য করিতে না পারিয়া, দয়াপরবশ হইয়া জ্ঞানবাবু সেই চৌকাঠ তুলিয়া জিজ্ঞাসা করিলেন, “ওঃ, কি ভারী এটা—ও বৃদ্ধো মানুষ পারবে কেন? এখন এটা কি করতে হবে বলুন।”

“একহাত উঁচু ক'রে তুলে মাটীতে ঠুকে দিন।”

জ্ঞানবাবু কথামত কার্যা করিয়া একটিমাত্র ঘণ্টাধ্বনি শুনিতে পাইলেন।

নদেরচাঁদ তৃতীয় আদেশ পালন করিবার জন্ত বারান্দায় যাইয়া ছোট পেটা-ঘড়ি দুই-তিনবার বাজাইয়া দিল।

অল্পক্ষণ পরে মায়া আসিয়া দেওয়ানজীর কাছে দাঁড়াইল।

দেওয়ানজী তাহাকে দেখিয়া বলিয়া উঠিল, “সে লোকটাকে দেখতে পাওয়া গেছে। একেবারে পত্র লিখে থানায় পাঠিয়ে দিয়েই নিশ্চিন্ত হওয়া যাক।”

মায়া বলিল, “ঐ লোকটা বাবার চিঠি নিয়ে এসেছিল।

মহামায়া দিদিকে বোধ হয় আমি মনে ক'রে বাবার পত্রখানি দিয়েছিল। ওর কি অপরাধ যে খানায় পাঠিয়ে দেবেন ?”

দেওয়ানজী বলিলেন, “তোমার বাবার চিঠি! ঐ লোকটা এনেছে! কৈ, আমি তা ত জানি না! বাবু কি লিখেছেন, পত্রখানা পড়িয়ে শোনাও ত ?”

“আমি ঠাকুর-ঘর হ'তে বার হ'য়ে দেখি, দিদি আমার পত্রখানা নিয়ে বাইরে অপেক্ষা করছেন। আমি তখন আপনাকে চরণামৃত খাওয়াতে আসছিলাম। আমি এখনও চিঠি পড়িনি, সে চিঠিখানা এখনও দিদির হাতেই আছে। দিদিকে ডাকি।”

মায়া বাহিরে ঘাইয়া একজন ঝিকে বলিল, “দিদিকে শাঁঘ এখানে ডেকে দে।”

মহামায়া আসিয়া দেওয়ানজীর নিকট দাড়াইয়া বলিল, “ঐ লোকটাই আমার হাতে পত্র দিয়েছিল। যখন হাতমুখে কতরকম ইমারা ক'রে এই পত্রখানা দিলে, তখন আমার মনে হয়েছিল, লোকটা হয় ত বোবা এবং কালা। আমার কোন কথার জবাব দিলে না। যেন শুন্তেই পেলো না। এখন দেখছি তা নয়, ওর উদ্দেশ্য অন্তরকম। তখন মেয়েমানুষ বলেই মনে হয়েছিল— এখন দেখছি আবার অন্তরকম।”

দেওয়ানজী বলিলেন—“আরও কত রকম দেখতে পাবে। এখন পত্রখানা একবার পড় দেখি,—শুনি, ওর চাল কি রকম।”

এই প্রকার কথার মধ্যে পূর্ব আহৃত বামন দেওয়ানজীর সম্মুখে আসিয়া সাষ্টাঙ্গ প্রণাম করিয়া, জোড় হাত করিয়া দাড়াইয়া রহিল।

দেওয়ানজী একখানি আয়নায় নবাগত পত্র-বাহকের
প্রতিবিশ্ব দেখাইয়া বলিলেন—“উহাকে এখানে আনিতে হইবে।”

বামন প্রণাম করিয়া প্রস্থান করিলে পর, মহামায়া পত্রখানি
মায়ার হাতে দিয়া বলিল—“তোমার পত্র তুমিই পড়।”

মায়া পত্রখানি মনে মনে পড়িলেও, পত্রের মর্ম তাহার মূখ
চোখের উপর দিয়া এভাবে প্রকাশ হইয়া পড়িতে লাগিল যে,
বহুদর্শী দেওয়ানজী ও জ্ঞানবাবুর তাহা বুঝিতে বিন্দুমাত্রও অসুবিধা
হইল না।

মায়া পত্রপাঠ শেষ করিয়া মহামায়ার হাতে দিয়া বলিল, “দিদি,
তুমিই এ পত্রখানা প’ড়ে এঁদের শোনাও।”

দেওয়ানজী বলিলেন, “তাই শোনাও ত মা ! পড়,—এখনই
আবার বামন চাঁদ ধরে নিয়ে আসবে।” বলিয়াই সকলকে
হাসাইবার ব্যর্থ চেষ্টায় নিজেই হাসিয়া উঠিলেন।

মহামায়া পত্রখানি পড়িলেন :—

“শ্রীশ্রীবাসুদেবায় নমঃ

“কল্যাণীয়াসু—

“মা, মায়া, বানের রাত্রে শেষে যখন ভৈরবকে সঙ্গে নিয়ে
নৌকায় বাহির হই, তখন মনে করি নাই যে, দয়াময় বিপদের উপর
আরও বিপদে ফেলিবেন। বাক্, তাঁর দেওয়া শাসন মাথা পেতে
নেওয়া ভিন্ন আমাদের কোনও উপায় নাই। নৌকায় আমরা
যখন সাত-আনীর দাদার বাড়ীতে যাইতেছিলাম, তখন পথের
মধ্যে নয়-আনীর নিকটেই দেববাবুর বড় নৌকার লোকজনদের
সহিত আমাদের সাক্ষাৎ হয়। শুনিলাম, দেববাবুর আদেশমত

সাধারণের সাহায্যের জন্তই নৌকাখানি চারিদিকে ঘুরিয়া বেড়াইতেছে। আমরা প্রায় সাত-আনীর বাড়ীর নিকট আসিয়াছি, এমন সময় অন্ধকারে একখানি বড় নৌকার ধাক্কায় নৌকাখানি একেবারে উণ্টে যায়। জলে পড়ে গিয়ে আমি অজ্ঞান হ'য়ে গিয়েছিলাম। ভৈরবকেও খুব আঘাত লেগেছিল। সে এখনও বন্ধমানের হাঁসপাতালে আছে, তাহার সংবাদ লইও। সেখানে যথাযথ বন্দোবস্ত করবার জন্ত দেওয়ানজীকে বলিও। আমি এখনও বেশ সুস্থ হইতে পারি নাই। আমার পক্ষে বার-পরিবর্তনই একান্ত আবশ্যিক বলে ডাক্তার মহাশয়গণ পরামর্শ দিচ্ছেন। যা হ'ক, আরও দিন কতক থেকে, তোমার বিবাহের পরেই, বেশী দিনের জন্ত পশ্চিমে যাবার বন্দোবস্ত করব। আমার শরীরের অবস্থা এখনও স্থানান্তরে যাবার উপযোগী হয় নাই বলে, আমি তোমাকে এখানে আসবার জন্ত পত্র দিচ্ছিলাম। কিন্তু এ বাড়ীর কারণে মত নয় যে, বিবাহের পূর্বে তোমার এখানে আসা হয়। হিন্দুর শুভদৃষ্টি বিবাহের প্রধান অঙ্গ।

“এঁদের যত্ন, শ্রদ্ধা ও ভক্তিতে আমি সুখেই আছি। তোমার চিন্তার কোনও কারণ নাই। দেওয়ান দাদার কি অসুখ হয়েছে? এখন কেমন আছেন? কতদিন থেকে অসুখ, সব কথা জানতে চাই। আশ্বিনের খাজনা দিতে আর একমাস মাত্র সময় আছে। এ সবের কে কি কচ্ছে? কেই বা মহল দেখছে? এর মধ্যে যতগুলো পত্র দিয়েছি, তার একখানারও উত্তর পাই নাই। তোমরা পত্র পেয়েছিলে ত? এদের ওপর চিরদিনই আমার খুবই মন ধারণা ছিল। কিন্তু এদের প্রত্যক্ষ ব্যবহারে আমার সে ভুল ভেঙ্গে গেছে। আমি এখানেই তোমার বিয়ে দিতাম

স্বীকৃত হ'য়েছি। দেওয়ান দাদা বেশ সেরে উঠলে পর, এ পত্রখানা তাঁকে দেখাবে। অগ্রহায়ণের প্রথম লগ্নেই আমি তোমার বিয়ে সেরে ফেলতে চাই। শুভকর্মে দেৱী কর্তে নাই। তা ছাড়া, তাতে অনেক বাধা। আজ মা তোমার বিয়ের কথা তোমাকেই আমায় লিখতে হচ্ছে—এতে তুমি লজ্জিতা হয়ো না। তোমায় পেয়ে পর্য্যন্ত আমি ভগবানের নিকট প্রার্থনা ক'রে এসেছি যে, পুত্র-কন্যার অভাব তোমায় দিয়েই পূরণ ক'রে দেন। আমার এই রোগ-শয্যার পাশে আজ যে তোমার অভাব পূরণ করছে, সেই আমার জামাতার স্থান অধিকার ক'রে আমার পুত্রের অভাব পূরণ করবে। লোকে পুত্র দিয়ে কন্যা পায়—আর কন্যা দিয়ে পুত্র পায়। আমি দুইই একসঙ্গে পাব। কারণ, আমার কন্যাকে পরের ঘরে যেতে হ'বে না। জামাতা আমার ঘরেই যাবেন। এই অস্থখে পড়ে দৈবচক্রে এখানে এসে যে এসব যোগাযোগ হ'ল, এতে আমি ভগবানকে শত সহস্র ধন্যবাদ না দিয়ে থাকতে পারছি না।

“খাজনার টাকা যদি কোনও প্রকারে মহল হ'তে না ওঠে, ও দেওয়ান দাদার শরীর এর মধ্যে সেরে না ওঠে, তবে আমাকে জানালৈ এখান হ'তেই এঁরা সব ব্যবস্থা ক'রে দিতে পারেন। একথা এঁরাই তোমাকে জানাতে ব'লেচেন ব'লে লিখে দিলাম। আমি সব বিষয়েই নিশ্চিত আছি। কেবল উৎকণ্ঠিত হ'ছি তোমায় না দেখে, আর দেওয়ান দাদা ভাল নাই শুনে। পত্রে তোমাদের কুশল দিয়ে আমায় নিশ্চিত ক'রো। পত্র-বাহকের হাতেই পত্র দিও। কোনও কারণেই যেন এঁর অমর্যাদা না হয়। এঁর নিকটে আমি অনেক বিষয়ে উপকৃত।

সময়ে সাক্ষাতে সব কথাই বলব। আশীর্বাদ জেনো, দেওয়ান দাদাকে প্রণাম দিয়ো। ইতি—

সন ১৩২০ সাল, ৭ই ভাদ্র।

{ আশীর্বাদক—
শ্রীসদাশিব বন্দ্যোপাধ্যায়।

পত্র পাঠ শেষ হইলে নদেরচাঁদ ঘরে আসিয়া বলিল,—“বামন দেখা করতে চায়।”

“একটু পরে আস্তে বলছি। মায়া, মহামায়া তোমরা সব অণু ঘরে যাও, পরে আমি ডাকছি।”

জ্ঞানবাবু এ পর্যান্ত কোন কথাই বলেন নাই। যেন হিঁয়ালির মত সব দেখিয়া শুনিয়া যাইতেছিলেন। মায়া প্রভৃতি সব চলিয়া গেলে পর, দেওয়ানজীকে বলিলেন—“আমার আর এখানে থাকবার দরকার কি? বন্ধুত্বের খাতিরে যতটুকু দেখা শোনা করা গেছে, তাতেও বৃষ্টি আমার অনধিকার চর্চা করা হয়েছে। দেওয়ানজী, আজ বিশ্বব্রহ্মাণ্ডের উপর আমার সন্দেহ হচ্ছে। পৃথিবীর উপর থেকে যেন চক্ষু-লজ্জার পর্দা আর ধর্মের দোহাইয়ে বাধন এক-সঙ্গে উঠে গেছে মনে হচ্ছে। সদাশিব কোথায় থেকে আমার এমন শক্তভেদী বাণ মার্ছে? যার একমাত্র কণ্ঠ্যকে রক্ষা করবার জন্তু—যার বিষয় রক্ষার জন্তু—যার মান-সম্মম রক্ষার জন্তু—নিজের দিকে একবারও চাহিবার সময় পর্য্যন্ত পাইনি, আজ সেই আমার ভাবী পুত্রবধুর উপর—তার একমাত্র কণ্ঠ্যের মর্যাদার উপর—ধর্মের উপর যথেষ্টাচার ব্যবহার করতে প্রস্তুত হ'য়েছে। সদাশিব কি এতদিনে এই বুঝেছে যে, আমি তার বিষয়ের লোভে তার মেয়েকে—আমার ঘরে নিয়ে যাচ্ছি। না, এ হাতে পারে

না, আমি তাকে শেষ পর্যন্ত ধর্মের দিক দিয়ে বুঝিয়ে দেখাব। তারপর আপনার নিকট—বৃদ্ধ ব্রাহ্মণের নিকট—আমাকে সে প্রতিজ্ঞাবদ্ধ করিয়েছে, তার বিচার আপনাকে দিয়ে করাব। এই ব্যাপার আমি সহজে হ'তে দেব না।”

“জ্ঞানানন্দবাবু, আপনি যখন আমাকে এঁদের কর্মচারীর পদ হ'তে চ্যুত ক'রে, ব্রাহ্মণের আসনে বসিয়ে এর বিচার ভার দেবেন, তখন আমি কি বলবো জানি না। কিন্তু এই বৃদ্ধ ব্রাহ্মণ যা বলছে, দয়া ক'রে সে কথাটা বেশ ক'রে মন দিয়ে শুনুন—আর মনে ক'রে রাখুন। কতটা পিতৃদত্তা হ'লেও, দান একবারই করা যায়। যখন সে বাক্‌দান হ'য়ে গেছে, তখন আর উপায় নাই। যাক্ সে কথা এখন। বিবাহ-বাসরে এ সবের আলোচনা—তর্ক করা যাবে। কিন্তু এখন ভেবে দেখুন, এতদিন যে মিথ্যের জাল দিয়ে মায়ার চোখ ঢেকে রাখা গেছিলো, সেটা বোধ হয় বা খুলে যায়। এখন উপায় কি? যাক্, ভগবান্ যা করেন মঙ্গলের জন্ত। এতদিনে বেশ বোঝা গেল যে, সদাশিব বেঁচে আছে—আর ভাল আছে। আর আছে—দেবনারায়ণের জালে আবদ্ধ হ'য়ে। জ্ঞানবাবু, এ পত্রখানা কৃত্রিম নয় ত? আমি ঠিক বুঝে উঠতে পারছি না। পত্রখানা কই দেখি? নদেরচাঁদ, মায়ার কাছ থেকে পত্রখানা নিয়ে আয়। আজ্ঞা, লোকটাকে ডেকে শোনা যাক্ না, কি বলে।”

“বেশ ত, আন্বার আদেশ দিন। আপনার বামন ত চাঁদ ধরে আন্চে। দেখা যাক্ না, চাঁদের সঙ্গে আকাশ, বাতাস, জ্যোৎস্না কতটা এসেছে। আর তাতে আমাদের মনের ঘন কালো জায়গাটার কতটা আলো দিয়ে যেতে পারে।”

“যেখানে জ্ঞানের আলো দিবারাত্রই সমান ভাবে জ্বলে, সেখানে ত কোন আলোরই দরকার হয় না। যারা জ্ঞানালোকের আশা করেন, তাঁরা অপর আলো চান না জ্ঞানানন্দবাবু! তাঁরা বরং জ্ঞানালোকের আশায় জন্ম-জন্মান্তর কাটিয়ে দিতে পারেন; তবু সে অভাব মিটতে অত্র কোনও আলোই চান না। তাঁরা মনে করেন, বৃহৎ অতৃপ্ত আশাও শ্রেষ্ঠ, ক্ষুদ্র তৃপ্ত আশার চেয়ে। তবে যদি জ্ঞানানন্দ তার এ সনাতন অবস্থা স্বেচ্ছায় ত্যাগ ক’রে মায়ায় মায়ায় প’ড়ে—অভিমানের কালো চশমা নিজেই প’রে বসেন, তাহ’লে বন্দী সদাশিবের প্রেরিত চন্দ্রালোকের দরকার হ’তে পারে।”

১৬

বামন সেই পত্র-বাহককে জ্ঞানবাবু ও দেওয়ানজীর সম্মুখে আনিয়া উপস্থিত করিল। শ্বেতশ্রু আবৃত বক্ষ, সুন্দর মূর্তি, লোল-চর্ম্ম বৃদ্ধ ব্রাহ্মণকে দেখিয়া নবাগত প্রণাম করিয়া দাঁড়াইয়া রহিল। দেওয়ানজী একবার অতি তীক্ষ্ণ-দৃষ্টিতে সেই নবাগতের দিকে চাহিয়া, তাহার আপাদমস্তক নিরীক্ষণ করিলেন। তখন সেই দুইটি চক্ষুর জ্যোতিঃ দেখিয়া বামন আপনার মুখ হস্তাবৃত করিয়া একটু পিছাইয়া গেল। দেওয়ানজীর সে তীক্ষ্ণ-দৃষ্টির সহিত পত্রবাহকের দৃষ্টি বিনিময় হইতেই সে কাঁপিয়া উঠিল, এবং নিম্ন-দৃষ্টিতে চাহিয়া থাকিয়াও সে মনে করিতেছিল—বুঝি এমনই তীক্ষ্ণ-দৃষ্টিতে সে-কালের মুনি-ঋষিরা ভস্ম করিতেন। যোড়হাত করিয়া সেই ভয়াতুর আর্তকণ্ঠে বলিয়া উঠিল—“আমার এ অসমসাহসিকতার জন্ত আমাকে ক্ষমা করুন।”

দেওয়ানজী গম্ভীর কণ্ঠে বলিয়া উঠিলেন—“ক্ষমা ! তার সঙ্গে আমার কোনও পরিচয়ই নাই। অপরাধীকে চিরদিনই বিচারের হস্তে তুলিয়া দেওয়া যাহাদের চিরন্তন প্রথা, তাহাদের নিকট ক্ষমা !”

“আপনার দয়ার উপরেই আজ আমার ও আমার পোষ্যবর্গের জীবন নির্ভর করছে। আমার দোষের বিচার আপনিই করুন,— অপরাধের শাস্তি আপনিই দিন—আর সে বিচার—সে শাস্তি দেখে, সকলেই শিক্ষা করুক—ধর্মের বিচার ব্রহ্মাণ্ডের সব বিচারের সেরা বিচার। তার গতি অতি সুন্দর—অথচ সর্ব-প্রত্যক্ষদর্শী।”

“আর যদি তুমি তোমার ধর্মবুদ্ধি বিসর্জন দিয়ে এ কাজে হাত দিয়ে থাক, তাহলে তোমার ধর্মের ভাণ জগতের সমক্ষে যে তোমাকে ধার্মিক বলে প্রমাণ করবে না, তার প্রমাণ ?”

“পিতৃ-মাতৃ শোণিত। সঙ্গদোষে যেটা আজ করতে সাহস করেছি, সেটা আমারই উপার্জিত। কিন্তু, আমার জন্ম—আমার জাতি—আমার বংশ—আমার অনায়ত্ত্ব। স্বেচ্ছায় উপার্জিত দুঃস্থিত্তির সঙ্গে তার কোন সংস্ববই নাই। আমার প্রাক্তন, সুকৃতি দুঃস্থিত্তি আজ আমায় যে অবস্থায় ফেলেছে, তাতেও যদি আমার পরিবর্তন না হয়, তাহলে আমার মৃত্যুই মঙ্গল। ঐ পত্র আর আপনার ইঙ্গিত এক হ'য়ে আইনের মুখে ফেলে আমাকে একেবারে ধ্বংসের মুখে পাঠাতে পারে। এখানে আস্বার আগে মোটেই আমার সে ধারণা হয় নাই। কিন্তু এখন বুঝছি, আমার সে ধারণা সম্পূর্ণ ভুল। ধর্ম যাকে রক্ষা করে, তাকে কেউ নষ্ট করতে পারে না। আজ আপনার ক্ষমায়—আপনার দয়ায় আমার

চিরদিনের অভ্যস্ত কুবুদ্ধি যদি সুবুদ্ধিতে পরিণত না হয়, তাহলে আর আমার কোনও গতি নাই।”

“তুমি তোমার কাজের জন্য অনুতপ্ত ?”

“আমার মন এর পূর্বে কখনও কোনও কাজে এরূপ অবস্থা প্রাপ্ত হয় নাই। আজ প্রথম আত্মগ্লানিতে আমার হৃদয় পরিপূর্ণ। এ আত্মগ্লানিই যদি অনুতাপ হয়, তবে আমি অনুতপ্ত।”

“কি উদ্দেশ্য নিয়ে এখানে এসেছিলে ? কার প্ররোচনায় এসেছিলে ? এ চিঠি কার ?”

“এর বিস্তৃত বিবরণ আমি আপনাকে আছোপাস্ত বুলিয়ে শোনাতে চাই। এর মধ্যে আমার বতটুকু রুষ্টিতা হবে, তার জন্যও আমি পূর্বেই ক্ষমা চেয়ে রাখছি।—

“আমার পনের বছর বয়সের সময় মা বাপ দুই-ই মারা যান। সম্পূর্ণ অভিভাবকশূন্য অবস্থায় আমি কল্কাতায় পড়বার জন্মে যাই। এফ্-এ পাশ করার পরই, সঙ্গদোষে, আমি উচ্চ জালতার পথে প্রথম পাদক্ষেপের পূর্বেই, কিছুদিনের জন্মে কল্কাতা ত্যাগ করতে বাধ্য হই। তখনও আমার মনের জোর একেবারে নষ্ট হয় নাই। এ রকম অবস্থায় মানুষে একভাবে চরিত্র অক্ষুণ্ণ রাখতে পারে কি না তা ভগবানই জানেন।

“কিছুদিন মনের সঙ্গে লড়াই করবার পর, আমি দেশেই বিবাহ করি। আমার পৈতৃক জমীজমা, আর সুখ্যাতির সঙ্গে এফ্-এ পাশের খ্যাতি আমাকে খুব বড়লোকেরই জামাই ক’রে দেয়। বিবাহের পর আমার স্বামীর মহাশয়ের অনুগ্রহে পুনরায় কল্কাতায় বি-এ পড়বার জন্মে আসি। সেই সময় নয়-আনীর দেবনারায়ণবাবুর সঙ্গে কলেজের মধ্যেই আমার প্রথম আলাপ হয়।

সেই আলাপের ক্রমোন্নতিতে আজ আমার এই অবস্থা। দেবনারায়ণবাবুর একটা খুব বড় বড় অভ্যাস, যে দিকে তার ঝোক চাপে, তার চরম সীমায় না পৌঁছে ছাড়ে না। তাতে তার জীবন-মরণ একদিক—আর ইচ্ছা পূরণ অণুদিক। এ রকম জেদী লোকের পাল্লায় পড়ে—মতে মত দিয়ে, আমার জীবনে আমি দু'টি ভয়ানক কাজ ক'রেছি। একটির পরিণাম—এক বড় বংশের কুমারী মেয়ের জীবনকে না সধবা—না বিধবা—না কুমারী এই অবস্থায় কাটাতে বাধ্য করেছি। আর একটি সম্ভ্রান্ত বংশের নিরীহ ভদ্রলোককে গোপনে রেখে, অতুল ঐশ্বর্যের সঙ্গে তাকে কণ্ঠা দান করাতে বাধ্য করতে, সিংহের গুহায় শৃগালের মত প্রবেশ করেছি। এখনও জানি না তার পরিণতি কোথায়!

“কল্কাভায় বৌ-বাজারে, ধনপোতার হরনাথবাবুর বাড়ী। তাঁর একমাত্র উচ্চশিক্ষিতা কণ্ঠার সঙ্গে দেবনারায়ণবাবুর বিবাহের প্রথম কথা হয়। আমি কখনও হরনাথবাবুর বাড়ীতে যাই নি। তাঁর পাটের আফিসে কর্ম চেষ্টার জন্ম প্রথম যাই। সেই সূত্রেই আমি তাঁর সঙ্গে বিশেষ পরিচিত হই। তাঁর আফিসে একটি বড় কাজও কিছুদিনের জন্ম করি। দেবনারায়ণবাবু কখনও কখনও আমার সঙ্গে দেখা করবার জন্ম পাটের আফিসে আসতেন। হরনাথবাবু আমার মুখে দেবনারায়ণবাবুর সমস্ত পরিচয় পেয়ে নিজের জামাতা করতে ইচ্ছা করেন। আমিই এ প্রস্তাবের সমর্থক হ'য়ে দেবনারায়ণবাবুকে কৌশলে হরনাথবাবুর বাড়ী পাঠাই। অবিবাহিতা কণ্ঠার বিবাহের জন্ম হরনাথবাবু এর পূর্বে তাঁর এক বন্ধুকে তাঁর পুত্রের সঙ্গে বিবাহ দিতে প্রথম

অনুরোধ করেন। তাঁর চিরদিনই ধারণা ছিল যে, বন্ধু সে অনুরোধ কখনও পূরণ না করে থাকতে পারবেন না। কিন্তু দৈবচক্রে সেই অনুরোধের পর হ'তেই তাঁর বন্ধুর সঙ্গে আর কখনও দেখা সাক্ষাৎ হয়নি। এই মনোক্ষোভেই, বন্ধুর প্রতিদ্বন্দ্বী দেবনারায়ণের মনের অবস্থা বুঝতে পেরেই, কত্যা দান করতে তিনি দেশাচারের উপরেও কর্তৃত্ব করেছিলেন। হরনাথবাবু প্রায়ই দেবনারায়ণবাবুকে বাড়ীতে নিমন্ত্রণ করে নিয়ে যেতেন। এই সূত্রেই হরনাথবাবুর পরিবারবর্গের সঙ্গে দেবনারায়ণবাবুর ঘনিষ্ঠতা গুবই বেড়ে যায়। হরনাথবাবুর কত্যা মায়া কি মহামায়া বেথুন কলেজে পড়তো। মায়ার পড়ার খুব আগ্রহ ছিল, এ কথা আমি হরনাথবাবুর নিকট মাঝে মাঝে শুন্তাম। দেবনারায়ণবাবু যখন বি-এ পাশ করলেন, সে সময় আমিই একদিন হরনাথবাবুর নিকট এই প্রস্তাব করি যে, বর কত্যা উভয়েই যখন শিক্ষিত, তখন এখন হ'তে সাম্না সাম্নি থাকায় দোষ কি? তাতে বরং মায়ার মন দেবনারায়ণবাবু নিজের মত করে গড়ে তুলতে পারবেন। মায়ার সাম্নেই পরীক্ষা, তারও পড়ার বিশেষ সুরিধা হবে। তখন আর হরনাথবাবু তাঁকে অপর বাসায় থাকতে না দিয়ে, নিজের বাড়ীতে নিয়ে এলেন। মায়ার পড়ার সুরিধা হবে বলেই তিনি যেন এ প্রকার ব্যবস্থা করলেন। এর পূর্বেই বিবাহের কথাবার্তা পাকা হ'য়েছিল।

“মায়ার পরীক্ষার পরই বিবাহ হ'বে, যখন এই প্রকার সমস্তই ঠিক হ'য়ে গেল, তখন ভাবী অভিভাবক ও উত্তরাধিকারী রূপেই দেবনারায়ণবাবু হরনাথবাবুর আফিসে কাজ কর্ম শিখতে লাগলেন। এদিকে উদ্ধত যৌবনের সাম্নে দেববাবু ও মহামায়া

উভয়েরই প্রীতি বেশ বেড়ে উঠে, প্রেমে পরিণত হ'তে লাগল। উভয়েই যে শিক্ষায় শিক্ষিত, তারই আদর্শ সামনে নিয়ে, আজ বায়স্কোপ - কাল থিয়েটার এই ক'রে বেড়াতে লাগলেন। ভাবী দম্পতিযুগলের মনের অবস্থা যখন এই প্রকার, তখন তাঁরা সকলে একেবারেই ভুলে গেছিলেন যে, আমিই তাদের এই সুদিনের— এই শুভ-মিলনের প্রথম হেতু। তাঁদের এই ভুল শুধরে দেবার জন্য, আর আমার নিকট চির কৃতজ্ঞ ক'রে রাখবার জন্য, আমার চোখে তখন যে শনির দৃষ্টি ফুটে বেরিয়েছিল, সেই তাদের সর্বনাশ ক'রেছিল। কার্যসূত্রে যতটা হ'য়ে গেল, ততটা আমার ইচ্ছে থাকে নাই। কিন্তু আমরা যে অপরিণামদর্শী। কাজেই, তাদের এই থিয়েটার, বায়স্কোপ ও নিত্য সান্ধ্য-ভ্রমণের একটু উচ্ছৃঙ্খলতা উভয়ের মধ্যেই এসেছিল। সেটা হরনাথবাবু প্রীতির চক্ষে দেখিলেও, দেশ, কাল এবং সমাজের ভয়ে, যতটুকু সাবধানে উচিত—সে আদর্শ কোনও প্রকারে নষ্ট করা উচিত হয় না বলে আমিই একদিন বুঝিয়ে দিয়েছিলাম। হরনাথবাবুও সরলতার উপর একদিন দেববাবুকে এই সব কথা ব'লেছিলেন। তার ফলে—দেববাবু একেবারে তাঁদের সম্পর্ক ভাগ ক'রে দেশে চলে আসেন। দেববাবু চলে আসার পর হ'তেই, সেই সুখী পরিবারের মধ্যে এমন একটা বিষাদের কালিমা পড়ে গেল যে, তা আর মুছে ফেলবার কোন উপায়ই করা গেল না। অতি অল্পদিনেই দেববাবু আফিসের কাজে খুবই কৃতিত্ব দেখিয়েছিলেন। হরনাথবাবু গুণমুগ্ধ হ'য়েই আফিসের সব ভার দেববাবুর হাতে দিয়েছিলেন। বুদ্ধি বিবেচনায় এবং কার্য ক্ষমতায় তাঁর সমকক্ষ লোক খুবই কম দেখা যায়। তবে

অপরিণামদর্শিতার জন্ত যখন যে খেয়াল তাঁর উপর কর্তৃত্ব ক'রে বসে, তখন তিনি সেই খেয়ালের বশে মানুষের বাইরে চলে যেতে দ্বিধা বোধ করেন না। যখন হরনাথবাবুর শরীর অত্যন্ত খারাপ, তখন আফিসে মোটেই আসতে পারতেন না। এমন সময় হঠাৎ দেববাবু চলে আসায়, আফিসের কাজ প্রায় বন্ধ হ'য়ে এসেছিল। তার উপর, আমাদের মত সব কটা হতভাগা একজোট হ'য়ে, হরনাথবাবুর কাঁচা পয়সা যে যত পারল লুটে নিয়ে দেশে গেল। আমিও তার মধ্যে একজন। বোধ হয় বা প্রধানই। দেশে এসে শুনি, দেববাবু এক জমীদারের সুন্দরী কন্যাকে বিবাহ করবার জন্ত ফেপে উঠেছেন। দেশের অনেকে তাঁকে এ কাজ হ'তে নিরস্ত হ'তে অযাচিত উপদেশ দিয়ে বিশেষ লাঞ্চিত হ'য়েছে। এমন সময় হঠাৎ একদিন দেববাবুর সঙ্গে বন্ধিমানের আমার দেখা হয়। সেই সময় তিনি বলেন, আমিই তাঁর বিবাহের কথায় প্রথম ঘটকের কার্যো কৃতকার্য হ'তে না পারায়, আজও তিনি অবিবাহিত আছেন। সে জন্ত এই বিবাহের—সদাশিববাবুর কন্যার সহিত দেববাবুর বিবাহের কথা পাকাপাকি ক'রতে যথাসাধ্য চেষ্টিত হতে অনুরোধ করেন। অবশ্য ছলে হ'উক, বলে হ'উক, কোশলে হ'উক, এ বিবাহ দিতে পারিলে তিনি আমাকে হাজার টাকার সম্পত্তি দিবেন। সে সব লেখা পড়াও হয়ে গিয়েছে। নানা বাপারে পড়ে, আর পুনঃ পুনঃ অগ্নায়ের ক্রটি সংশোধন করতে বাধ্য হ'য়ে, অধর্মের বেনো জলে আমার ঘরো জল—পৈতৃক-সম্পত্তি সব ভেসে গেছে। এখন আমার কাছা-বাছা অনেকগুলি। তাই, অভাবের মুখে পড়ে, হিতাহিত জ্ঞান-শূন্য হ'য়ে, আপনাদের ক্ষমতার কথা শুনেও, এ কাজে হাত দিয়ে-

ছিলাম। আজ তার পরিণাম এই।” বলিয়া সেই পত্রবাহক আবেগরুদ্ধ কণ্ঠে অক্ষুট ক্রন্দন করিয়া উঠিল।

দেওয়ানজী বলিলেন—“প্রবল অনুতাপের পর কর্মক্রটি যদি পূরণ করতে যথাসাধ্য চেষ্টা করা যায়, তাহা হইলে পাপের ভার কতকটা নেমে যেতে পারে। একটা সুখী পরিবারের মধ্যে একবার ধূমকেতুর শক্তি জাগিয়ে, আর একটা সম্ভ্রান্ত ভদ্রলোককে এ ভাবে গোপন ক’রে রাখায়, কি যে অনিষ্ট হয়েছে ও হচ্ছে, তা যদি বুঝতে, তাহ’লে আর এমন হ’বে কেন? যাক্, এখন যদি আইনের আশ্রয় নিয়ে দাঁড়ান যায়—তা হ’লে আমাদের কার্য এখনি উদ্ধার হ’বে; কিন্তু, তাতে আর একটা নূতন বিপদের সূত্রপাত করা হ’বে। সে বিপদের পরিণামে দেববাবু কারাদণ্ড—আর হরনাথবাবুর কন্যার চিরজীবন অসার ক’রে তোলা হবে। জ্ঞানবাবু এখন কি পরামর্শ দেন?”

জ্ঞানবাবু বলিলেন—“সদাশিব এখন কোথায় আছে, কেমন আছে—এ কথা ত এখনও ঠিক জানতে পারা গেল না।”

নবাগত বলিল—“বানের রাত্রে অন্ধকারে তাঁর নৌকা উন্টে যায়। এতেও যে দেববাবুর হাত থাকে নি, তা মনে করবেন না। তাতেই তিনি অজ্ঞান হ’য়ে পড়েন। সেই অবস্থায় তাঁকে নয়-অনীতে নিয়ে গিয়ে চিকিৎসা করান হয়। তাঁর সঙ্গে লোকটা, বরাবর নয়-অনীতে নিয়ে যাবার জন্তু আপত্তি ক’রেছিল, এবং সদাশিববাবুকে সাত-অনীতে নিয়ে পৌঁছে দিতে অনুরোধ ক’রেছিল। সে লোকটার নাম বোধ হচ্ছে ভৈরব। সেও নৌকা হ’তে পড়ে যায় বটে, কিন্তু তত জখম হয় নি। যখন সে ক্ষেপে উঠে নয়-অনীতে সদাশিববাবুকে নিয়ে যাবার জন্তু পথের মাঝে

সম্পূর্ণরূপে বাধা দিয়ে দাঁড়ালো, তখন একসঙ্গে দশজন লোকে তাকে ধরে রাখতে পারে নি। কিন্তু সেই সময় দেববাবু ও আমি এসে পড়ে তার উপর এমন নৃশংসের মত শক্তি জানিয়ে দিলুম যে, তাতেই ভৈরবের বা হাতখানা একেবারে ভেঙ্গে যায়। মাসাবধি নয়-অনীতেই চিকিৎসাধীন ছিল। দিন কতক আগে আবার ক্ষেপে উঠে, সেখান হতে বার হ'য়ে আসবার জন্য যথাসাধ্য চেষ্টা ক'রেছিল। তার সঙ্গে লড়াই ক'রে জন দশেক ভোজপুরী দরওয়ান একেবারে চির-জীবনের জন্য অকর্মণ্য হয়ে গেছে,— কারও হাত, কারও পা, কারও চোক, কারও কাণ একেবারে নষ্ট হয়ে গেছে। যখন এই ব্যাপার হ'তে থাকে, তখন রাত্রি বানটা-একটা। দেববাবুর লোক কোন গতিকেই তাকে ধরে রাখতে পারে না; সে বেরিয়ে পড়ে। শেষে দেববাবু এই সংবাদ জানতে পেরে, তখনই ঘোড়া ছুটিয়ে এসে, নারায়ণপুরের সীমানায় তাকে গুলি করেন। কিন্তু সে লোকটার অদ্ভুত ক্ষমতা ও বুদ্ধিতে সে জীবনে নষ্ট হয় নি। এখনও বেঁচে আছে,— বর্ধমান রাজ-হাস-পাতালেই আছে। তবে তাকে ডাকাতির দলভুক্ত ব'লে ধরিয়ে দেওয়া হয়েছে। আর সদাশিববাবুকে বিশেষ যত্নেই নয়-অনীতে রাখা হয়েছে। কোন বাড়ীতে যে কখন তাঁকে রাখা হচ্ছে, তা দেববাবুই জানেন, আর কেউ জানেন না। তবে তাঁকে খুবই যত্নে রাখা হয়েছে। আর তাঁর মনস্ত্বষ্টির জন্য দেববাবু নিজে হাতে তাঁর সেবা-শুশ্রূষা করছেন, এটা আমি জানি। সদাশিববাবুর চিকিৎসার জন্য কল্কাতা হ'তে ডাক্তার আসছেন। তবে তাঁদের টাকা দিয়ে এমন ভাবে দেববাবু বাধা করেছেন যে, তাঁরা এ কথা কখনও কোনও লোকের কাছেই প্রকাশ করবেন না।

সোণার খাঁচায়—হীরের দাঁড়ে বসিয়ে, ঝরণার কাছে রেখে
 খাঁচার পাখীকে যতই আদর যত্ন করা যাক না কেন—তাব
 মুখরোচক—সে সময়ে যা সে ভালবাসে—সবই দেওয়া হ'ক না
 কেন, সে তার উড়বার শক্তি হারিয়েও যেমন প্রকৃতির রাজ্যে
 আস্তে চেষ্টা করে, আর নিজের বিষাদ-সঙ্গীত গেয়ে গেয়ে কাঁদে,
 তেমনই অবস্থায় সদাশিববাবু পড়েছেন। ডাক্তারদের দিয়ে তাঁকে
 মাঝে মাঝে শোনান হচ্ছে 'এ অবস্থায় যেন কোন মতে স্থানান্তরিত
 করা না হয়। তাহ'লে আর জীবনের আশা থাকবে না।'
 ছলে, বলে যে তাঁকে এমন ভাবে আটকে রাখা হয়েছে—তা তিনি
 এখনও বুঝতে পারেন নি। তাই তিনি দেববাবুর উপর অসন্তুষ্ট
 হন নাই। প্রতিদিনই তাঁকে এখানকার সংবাদ যথাযথ জানান
 হয়েছে, আর আমিই সে সংবাদও এখান থেকে বহন করে নিয়ে
 গেছি। এই সংবাদ সংগ্রহের জন্য আমি কখনও প্রজা, ফেরি-
 ওয়ালা, ফকীর, নাগা, সাধারণ সন্ন্যাসী, বৈরাগী, কাবুলী, জ্যোতিষি
 পর্গান্ত হইনি।

“তাঁকে আরও একটা মর্মান্তিক কৃত্রিম সংবাদে একপ্রকার
 অভিভূত ক'রে রেখে দেওয়া হয়েছে। সাত-আনীর জ্ঞানবাবুর
 ছলে প্রণবকৃষ্ণ চরিত্রহীন। তিনি একথা কোনও প্রকারেই
 বিশ্বাস করেন নাই। এখনও যে তাঁর দৃঢ়বিশ্বাস হয়েছে বলে
 মনে হয় না। তবে এমন কতকগুলো প্রমাণ প্রয়োগ তাঁর সামনে
 দাঁড় করান হয়েছিল, যাতে ক'রে মানুষ মাত্রেরই একটা ভুল
 ধারণা না হয়ে থাকতে পারে না। একদিন একটা প্রজাকে
 শিথিয়ে আনা হ'ল, সে যেন দেববাবুর নিকট এই বলে বিচার
 প্রার্থনা করছে, যে, তাঁর একমাত্র সুন্দরী বিধবা কন্যার উপর

প্রণববাবু অত্যাচার ক'রতে এসেছিলেন। ভগবানের ইচ্ছায় কোন মতে এবার তার ধর্ম রক্ষা হয়েছে বটে, কিন্তু বড় লোকের কুৎসিত দৃষ্টি হ'তে কতক্ষণ নিজেদের রক্ষা করা যেতে পারে। এর বিচার না করলে সে দেশত্যাগী হ'তে বাধ্য হবে। আবার কোন দিন বা আরও ভীষণ কল্পনাকে সাজিয়ে গুছিয়ে, প্রণববাবুর উপর বিদ্বেষ সৃষ্টি করবার জন্তু সদাশিববাবুর সামনে দাঁড় করান হ'ত। যখন এ সবের বিচার হ'ত, তখন যে সদাশিববাবুকে জানিয়ে-গুনিয়ে হ'ত, সে কথা বলাই বাহুল্য। এই সব নানা কারণে তাঁর মন হুঁচিন্তায় জীবন্ত হ'য়ে আছে যে, তা আর মুখে বলা যায় না। এদিকে যেমন প্রণববাবুর নিন্দায় তাঁর কাণ ভারি করে দেওয়া হ'ত, তেমনি অপরদিকে দান খয়রাত ক'রে সংকার্যো মনপ্রাণ সাঁপে দিয়ে দেববাবু প্রতি মুহূর্তেই তাঁকে গুণমুগ্ধ ক'রে তুলতে চেষ্টা করতেন। সদাশিববাবুকে নিজের মহত্ব দেখাবার জন্তু বাস্তবিকই দেববাবু অনেক ভাল কাজ ক'রেছেন। এই বানের সময় তিনি সদাব্রত খুলে দিয়েছিলেন।

আবার, আপনার সহায়তায় ও আদর্শে স্বৈচ্ছাসেবকগণের মহাপ্রাণতার সঙ্গে মিশে প্রণববাবু প্রভৃতি যে কাজ করেছেন, সে সংবাদ বাঙ্গালার প্রত্যেক সংবাদপত্রেই প্রকাশিত হয়েছে। যেদিন সদাশিববাবু সে সংবাদ প্রত্যেক সংবাদপত্রের মধ্য দেখলেন, সেদিন সকলকেই ডেকে ডেকে তিনি গুনিয়েছিলেন, আর আনন্দে যেন নেচে উঠেছিলেন। সে রকম আনন্দিত হ'তে এর আগে আমি আর কাকেও কখনও দেখি নাই। এই পত্রখানা একজন লোককে দিয়ে লিখিয়ে এখানে আনা হয়েছে। এর আগা-গোড়াই কৃত্রিম। মায়া'র মন পরীক্ষা করাই এ পত্রের

উদ্দেশ্য। কিন্তু, মানুষে যা মনে করে, সব সময় তা ভগবান হ'তে
 "দেন না। দিলে বোধ হয় মানুষে মনে করতো যে, তারাই
 সর্বশক্তিমান্ ভগবান্।"

১৭

অস্তগত সূর্যের সোণালি আভাময় রক্তরাগে পশ্চিম আকাশ
 উজ্জল হইয়া উঠিয়াছে। সন্ধ্যার আকাশে সাদা-সাদা মেঘের
 শ্রেণী মৃদু-বাতাসের সঙ্গে চারিদিকে ঘুরিয়া বেড়াইতেছে।
 হাওয়ার তেজ না থাকাতে চারিদিকের জড় প্রকৃতি যেন স্তব্ধ
 হইয়া দাঁড়াইয়া আছে। সারা দিনের রৌদ্র-তাপে দগ্ধ ছাদের
 উপর দেওয়ানজী প্রকৃতির এই ভাবের সঙ্গে মিশিয়াই গাঢ় চিন্তায়
 মগ্ন। কপালে বিন্দু-বিন্দু স্বেদজল দেখা দিয়াছে। সন্ধ্যার সময়ে
 মহামায়া ছাদে আসিয়া বলিল, "জেঠামশাই! আফ্রিকের আসন
 এখানেই দেব কি?"

"না মা, পূজার ঘরেই আজ থেকে আফ্রিক করবে। এখন
 ত একটু বল পেয়েছি। চলাবুলো একটু আবার অভ্যাস করা
 যাক, দু'দিন পরে সবই ত হাতে তুলে নিতে হ'বে। বসিয়ে কে
 খেতে দেবে মা!"

"জেঠামশাই, সারা জীবনটা খেটেও কি আপনার বসে খাবার
 সংস্থান হয়নি?"

"নিছক বসে কি মানুষ খেতে পারে মা! শরীর মন একটা
 না একটা নিয়ে থাকবেই। হাতে কিছু কাজ যদি না থাকে, তবে
 মনের মাঝে তখন মহা বিপ্লব বেধে উঠবেই। এটা হচ্ছে আমাদের
 শরীর মনের চিরদিনের সংস্কার বা অভ্যাস। মনকে নিষ্ক্রিয়

করতে পারলেই সব শেষ হয়ে যাবে মা ! তা হয় কই । তাইতে মা বসে খাওয়া চলে না । সে সংস্থান যার হয়েছে, সে যে জীবন-মুক্ত হয়ে গেছে মা ! বসে খাওয়া সংসারের মধ্যে হতে পারে কি ? যতক্ষণ আমার নিজের সুখ-দুঃখ বুঝতে পারছি, ততক্ষণ আমাকে কর্তব্যের খাতিরে সর্বসাধারণের সুখ-দুঃখ, অভাব অভিযোগ মেনে চলতে হবে । নিজের অভাব পূরণ করতে সমস্ত শক্তিকে বয়স ক'রে কাজে লাগাতে হয়, তেমনই তোমা অপরের জন্তু করতে হবে । তা না হ'লে, আমাদের যিনি সৃষ্টির সেবা জীব ক'রে এখানে পাঠিয়েছেন, তাঁর মহৎ উদ্দেশ্যের উপর কর্তৃত্ব করা হবে মা ! কর্তব্যের মাহাত্ম্য বাড়াতেই তিনি পূর্ণ নিষ্ক্রিয় হয়েও, নিজে এই কল্পভূমিতে রক্তমাংসের শরীর নিয়ে এক এক যুগে এক এক অবতার হ'য়ে আদর্শ কর্ম ক'রে গেছেন । আদি যুগ হ'তে মানুষ নিজেদের কর্মের ভুলে যে সব অত্যাচার গড়ে তোলে, তারই শক্তি যখন সারা বিশ্বের উপর ছড়িয়ে পড়ে—সব নাশ করতে উত্তম হয়, তখন তিনি আর না এসে থাকতে পারেন না । তাই আমাদের উচিত হচ্ছে, নিজের নিজের কর্মের মধ্যে কোন গ্লানির সৃষ্টি না করা । এর জন্তুই আমাদের ধর্মের শাসন—সমাজ শাসন, দেশাচার, লোকাচার প্রভৃতি মেনে চলতে হবে । তা না চলতে পার, পাপের বোঝা মাথায় ক'রে, জন্ম-জন্মান্তর ইচ্ছামুখে ঘুরে-ঘুরে মর । সারাজীবন যে কাজ করেছি, তারই পরীক্ষা দিতে এবার আমাকে এই শেষ জীবনে নূতন ক'রে কর্মে প্রবৃত্ত হ'তে হবে । এখানে মুখের পরীক্ষা চলে না মা, কাজের সাফল্যে পরীক্ষা দিতে হবে । আবার শোন, যদি সে ফলের আকাঙ্ক্ষা নিজে কর, তবে তোমার সব পণ্ড হ'য়ে যাবে । সাফল্যের শেষ ভূমি তোমাকে

ভগবানের নামে অর্পণ করতে হবে। এ বড় কঠিন অথচ সরল পথ মা! মনে-প্রাণে এক করে চল—কোথাও গোল নেই দেখবে। আর যদি ঐ ছোটো জিনিস দুদিকে চলে—তবেই বিপদ। এই যেমন ধর মিথো ব্যবহার খুব কঠিন, কেন না, তার আঙুপিছু অনেক হিসেব রেখে চলতে হবে। এক মিথ্যা হতে সহস্র মিথ্যা প্রসব করবেই—তার জন্তু তোমাকে সব সময়েই তৈরী থাকতে হবে। আর দেখ, সত্যের ব্যবহার কত সরল, তার হিসাব নেই—সে সব সময়েই এক। সবদিকেই সরল। সে যেন পূর্বাপর সম্বন্ধ-রহিত, অথচ পূর্ণ সমবায়-সূত্রে বদ্ধ। এই দেখ মা, দেবনারায়ণ কত বড় মিথ্যার জাল তৈরী করতে, কত মিথ্যের সৃষ্টি ক’রে বসেছে। আর এখানে সত্যের বাতাসে কেমন ছিড়ে যাচ্ছে। ছেলেমানুষ সব পরিণাম ভেবে দেখতে জানে না। পরিণাম ভেবে কেন—এক একটা কার্যের পরিণতি দেখেও সাবধান হয় না। এত বড় মাথাটা মন্দ দিকে চালিয়ে ঝাঁকের উপর চলেছে। এত বড় শক্তির অপব্যয় করতে দেখে কি চুপ ক’রে থাকা যায় মা? যাদের অল্পে সারা জীবনটা আনন্দের সঙ্গে কাটান গেল—আজ তাদের এ-সব কি বিপদ বল দেখি। এক সঙ্গে চারটা বড় বাড়ী, বড় বংশ নষ্ট হয়ে যাবে—আর চুপ ক’রে তাই বসে দেখা যায় কি মা! যা হবার তা হবেই, তবুও আমাদের কর্তব্যের খাতিরে একবার পুরুষকারকে খাটিয়ে নিতে হবে কি। দেখা যাক, শেষ কি হ’য়ে দাড়ায়।”

“এই অসুখ শরীরে আর আপনার কোন ব্যাপারে গিয়ে কাজ নেই। যা হয় হ’ক। মামাবাবুকে পাঠিয়ে দিন, তিনি পুলিশের সাহায্য নিয়ে কাকামশায়কে সেখান হ’তে নিয়ে আসুন।”

“যতটা সহজ মনে কচ্ছ মা, তা নয়। যখন এই লোকই জানে না যে, সদাশিববাবু কোথায় কখন থাকেন, তখন পুলিশের চোখে যে ধূলো দিতে পারবে না, এ ধারণা করো না। ধন, প্রভুত্ব, যৌবন, আর অবিবেকতা—চারটা একসঙ্গে জুটে যে অনর্থ কচ্ছে, তাদের মন্দশক্তির প্রথম আবেগে সবই ভেসে যাবে। এদের সব স্পৃহা ফেরাতে হলে, বেশ চতুরতা আবশ্যিক, যাকে বলে, “শঠে শাঠ্যং সমাচরেৎ”। পুলিশের হাতে দিলে হয় ত কার্যোদ্ধার হবে। সেখানের নিশ্চয় বিচারে ক্ষমা নেই। বিচারের হাতে পড়ে অপরাধের শাস্তি হওয়াই সব ক্ষেত্রে সমান ভাবে উচিত হয় না। অনেক ক্ষেত্রে অপরাধের ক্ষমায় জীবনটা নতুন পথে এনে এত ভাল করে গড়ে নেওয়া যায় যে, অপর কিছুতে তা হয় না। আর তাদের মত লোকের কাছে থেকে অনেক ভাল কাজ সহজে আদায় করে নেওয়া যায়। ক্ষমা করতে যতদিন না পারবে মা, ততদিন মনের মধ্যে ময়লা বাড়তে থাকবে। মনের তেজে খুব বড় হয়ে থেকো, কোন শক্তির কখনও অপচয় করো না। কিন্তু ভুলের ক্ষমা করাটা যেন স্বভাবের সঙ্গে মিশে থাকে, তা না হলে আমাদের মনুষ্যত্বটা এক প্রতিহিংসার ছবি হয়ে দাঁড়াবে। যিনি যত বড়, তার শক্তি যত বেশী, তাঁর ক্ষমাগুণ তত বেশী। পৃথিবীর নিকট সহগুণ আর বশিষ্ঠের নিকট ক্ষমাগুণ শিখতে হয় মা! শত পুত্রের বিনাশেও বশিষ্ঠ বিশ্বামিত্রকে ক্ষমা করতে কাতর হননি। অথচ, তেত্রিশ কোটি দেবতায় বিশ্বামিত্রকে যা দিতে পারেননি, সেই শক্তিই—সেই ব্রহ্মণ্য শক্তিই বশিষ্ঠই দিয়েছিলেন। ব্রাহ্মণের তেজ যেমন প্রকৃতিদত্ত, তেমনিই ক্ষমাগুণও স্বাভাবিক। অভিমানে তার

অমর্যাদা করে, কেন মা নিজের পথ হতে দূরে চলে যাব। মা, ছেলের কাছে মনের কোন কথাই চেপে রেখ না। তোমারই কথার উপর সব নির্ভর করছে। তোমারই মুখ চেয়ে তার সব দোষ আমি ক্ষমা করছি। এখন তুমি তোমার কর্তব্য ঠিক কর নাও মা। তুমি যদি মনে-প্রাণে এক করে তাকে ক্ষমা করতে না পার, তাহলে তোমার নারীজীবনটা যে ব্যর্থ হয়ে যাবে। একদিনের জন্তুও কি তাকে তুমি স্বামী বলে ভাব নি ?

কুমারী-জীবনে, পিতামাতার আদেশে-ইঙ্গিতে, শুভ কি অশুভ মুহূর্তে, মনের মধ্যে যাহাকে স্বামিড্বে বরণ করিয়া লইয়াছে, আজ সে কি করিয়া বলিবে যে, এমন লোককে সে তাহার জীবনের ক্রবতারা করিয়া লইয়া সংসারের পথে চলিতে পারিবে না।

সে একথা কখনও ভাবে নাই যে, এমন প্রশ্ন তাহার উপর কেহ কখনও করিবে। যতদিন সে দেবনারায়ণের সাহচর্য্যে ছিল, কখনও ভাবে নাই যে, এরূপ একটা প্রতিবন্ধকতা তাহাদের মধ্যে দাঁড়াইতে পারিবে। যেদিন সে শুনিয়াছে ‘ইনিই তোমার ভাবী স্বামী’—সেই দিন হইতে সে তাহার কায়, মন, বাক্য ও বাবহারকে তাহারই অনুরূপ করিয়া গড়িয়া তুলিতে যথাসাধা চেষ্টা করিয়াছে। সে বিশিষ্ট শিক্ষিতা বলিয়াই নিজেকে জানে, এবং সকলেই একথা তাহাকে এতদিন ধরিয়া বলিয়া আসিতেছে। তাহার সারাজীবনে সে উচ্চ শিক্ষার এরূপ পরীক্ষার ক্ষেত্রে কখনও পড়ে নাই। আজ এই বৃদ্ধ, যাহাকে সে বিশ্বের মধ্যে সর্বশ্রেষ্ঠ আসনে বসাইতেও কুণ্ঠিত নহে, তাহার নিকট কি পরীক্ষা দিবে। এ যে তাহার জীবন-মরণের মধ্যে অতি ভীষণ অগ্নি পরীক্ষার প্রথম সূচনা। এ কথা সে অনেকবার নিজের মনে বিচার করিয়া দেখিলেও,

অপরের সমক্ষে সে কথা বলে কি করিয়া? সে যে কত ক্ষেত্রে নারীর মহিমময়ী চরিত্র দেখিয়া নিজের নারীজন্মকে ধন্য মনে করিয়াছে। পুরাণে, কাব্যে, নাটকে, উপন্যাসে এইরূপ কত নারীর সমস্তাময় জীবন দেখিয়াছে, আর তাহাদের জীবনের সঙ্গে, কর্মের সঙ্গে, নিজের জীবন ও কর্ম মিলাইয়া লইতে, এই কয়মাস ধরিয়া কত চেষ্টা করিয়াছে। বিশেষ সতীকুলরানী সাবিত্রী চরিত্রে বাহা দেখিয়াছে, তাহাই মনের মধ্যে অতি পবিত্রতার সহিত আঁকিয়া লইয়াছে। সকল প্রলোভনকে পায়ে ঠেলিয়া নিজের নারী চরিত্র অক্ষুণ্ণ রাখিয়া, জীবনপাত করিবে বলিয়া দৃঢ়প্রতিজ্ঞ হইয়াছে; তাই মায়ের শত উপরোধ, অনুরোধ উপেক্ষা করিয়া চিরদিনের জন্ত কলিকাতার মায়া ত্যাগ করিয়া দেশে আসিয়াছে। সেই যে একদিন মায়ের মুখের উপর বলিয়াছিল, 'বিবাহের মন্ত্র কয়টা পড়া হয় নাই বলিয়াই কি আমার মনের দাগ মুছিয়া দিতে পারিবে।' সতীর গর্ভে জন্মিয়া সে এ কথা বলিতে কুণ্ঠিত হইবে কেন? এমনই সমস্তাময় প্রেমের মধ্যে পড়িয়া, সভার মধ্যে পিতার প্রেমের উত্তরে সতী-শিরোমণি সাবিত্রী একদিন বলিয়াছিলেন—

“পিতঃ—

সকৃদংশো নিপততি সকৃৎ কণ্ঠা প্রদীয়তে ।

সকৃদাহ দদানীতি ত্রীণ্যেতানি সকৃৎ সকৃৎ ॥

দীর্ঘায়ুরথবান্নায়ুঃ সপ্তগো নিপুণোহপি বা ;

সকৃৎতো ময়া ভর্তা ন দ্বিতীয়ং বৃণোম্যহম্ ॥

মনসা নিশ্চয়ং কুহা ততো বাচাভিধীয়তে ।

ক্রিয়তে কুর্শ্বণা পশ্চাৎ প্রমাণং সে মনস্ততঃ ॥

• [সাবিত্রী কহিয়াছিলেন, 'দ্রব্যের অংশ একবারমাত্র নিপতিত হয় ; কন্যাকে একবার মাত্র দান করে ; দিলাম এ বাক্য একবারই বলে । হে পিতঃ, এই তিন কার্য এক একবারই অনুষ্ঠিত হয় । অতএব তিনি দীর্ঘায়ই হউন, অথবা অল্পায়ই হউন,—সগুণই হউন বা নিগুণই হউন,—আমি যখন একবার তাঁহাকে পতিত্ব বরণ করিয়াছি, তখন তিনিই আমার পতি । আমি কদাপি আর কাহাকেও বরণ করিব না । দেখুন, কস্ম প্রথম মন দ্বারা নিশ্চিত, তৎপর বাক্যদ্বারা অভিহিত ও তৎপশ্চাৎ কাৰ্য্য দ্বারা সম্পাদিত হয় ; অতএব আমার মতে মনই প্রমাণ'] ।”

সেও ত সেই আৰ্য্যকুলে সেই আৰ্য্য শোণিতে—সতীর গভে জন্মিয়াছে, সেও কেন না উচ্চকণ্ঠে ঐ কথাই প্রতিধ্বনি করিবে ? যেখানে ধর্ম লইয়া কথা—সেখানে কেন সে সঙ্কোচ করিয়া, নিজের জীবনকে একেবারে শূন্য করিয়া, রসাতলে পাঠাইবে ? মনের মধ্যে শত সহস্র শক্তিকে জাগাইয়া সেও বলিয়া উঠিল—“স্বামী বলে মনের মধ্যে ভেবেছিলাম বলেই, আজ একথা বলতে পারছি ; নতুবা, এ সম্বন্ধে আমার কোন কথা বলা সম্ভব হ'ত না জেঠামশায় । স্বামীই নারীর দেবতা ; কিন্তু দেবতারও দেবতা আছেন । তিনি—যে তাঁর পায়ে অপরাধ করে—তাঁকে ভুলে থাকবেন, এটা আমি স্বী হ'য়ে দেখতে চাই না । তা আমি বলি, যাতে এত বড় ভুল ভেঙ্গে যায়, যাতে দেবতার নিৰ্ম্মাল্যের মত তাঁর মন ও চরিত্র পবিত্র হয়, তার উপায় আমাদের করতেই হ'বে । তাতে আমার এ জীবন কেন—ছ'চার জন্মও যদি ব্যর্থ হয়ে যায় ত যাবে ! এ ত এই জন্মেই শেষ হ'য়ে যায় না,—যেতে পারে না ।”

১৮

নারায়ণপুরের খাজনা রাজবাড়ীতে দিবার জন্ত জ্ঞানবাবু প্রণবকৃষ্ণকে পত্র দেন। আর সাত-আনীৰ খাজনাও যেন শেষ দিন পর্য্যন্ত দেওয়া হয়, সে কথাও লিখিয়া দেন। প্রণবকৃষ্ণ বথাসময়ে পত্র পাইয়া, রাজবাড়ীতে খাজনা দিয়া তাহার রসিদ নারায়ণপুরে পাঠাইয়াছেন। যেদিন সেই রসিদখানি লইয়া লোক আসিল, সেদিন জ্ঞানবাবু দেওয়ানজীকে রসিদখানি দিয়া বলিলেন—“রাজবাড়ীর খাজনার রসিদ দপ্তরেই জমা করিয়ে দিই।”

দেওয়ানজী বলিলেন—“না, এ কথা এখন কাকেও জানিয়ে কাজ নেই। ওটা আপনার নিকট রেখে দিন। পরে টাকা দিয়ে ওটা নেওয়া যাবে। আর দেখাই যাক্ না, দেববাবুর কত দৌড়? তিনিও ত খাজনা দেবেন বলে একটা চাল চেলে রেখেছেন। আমার মনে হচ্ছে, দেববাবুর নিজের মহলের টাকা এবারে সব যোগাড় হয়ে উঠবে না। তাঁর দিকেও ত বানের জলে সব পচে গেছে। প্রজারা খাজনা দেবে কোথা থেকে? তাঁর নগদ টাকায় এখন হাত দেবার ক্ষমতা নেই। চল্লিশ বৎসর বয়সের পরে তাঁর সে টাকায় হাত দেবার ক্ষমতা আসবে বলে, তাঁর পিতাঠাকুর উইল করে গেছেন। স্বর্গীয় কর্ত্তা মহাশয়ের নিকট আমি একথা শুনেছিলাম। তিনিও তাতে সাক্ষী ছিলেন। যা কিছু হাতে ছিল, তাতেই সদাশিববাবুর মন কিন্তে খুব দান ধররাৎ করেছে। এখন যা আছে, তাতে এ রকম বাবুয়ানায় বেশী দিন যাবে না বলেই মনে হচ্ছে। যাক্, নয়-আনীৰ মহলের জন্ত তত ভাবনার কোনও কারণ নেই। মহামায়ার

মার কাছ থেকে টাকা নিয়ে, ওটা মহামায়ার নামেই কিনে রাখলেই হবে। তবে এ সংবাদ কোন প্রকারে দেববাবু জানতে না পারেন যে, মহামায়া তাই কিনে নিয়েছে। যদি কোনরূপে প্রকাশ হয়ে পড়ে, তবে যেন মায়াই কিনেছে, এমনই সংবাদ সাধারণে জানতে পারে। একবার এমন করেই দেখা যাক, তাকে ঠিক পথে আনতে পারা যায় কি না।”

“এত বড় ব্যাপারে কি সে নিশ্চিত হয়ে থাকবে?”

“না থাকাই উচিত। তবে যে রকম খবর পাচ্ছি, তাতে তাঁর উপর এখন শনির দৃষ্টি পড়েছে,—এতে কোন ভুল নাই। এই সঙ্কট সময়ে তিনি সব পুরানো লোকদের জবাব দিয়ে, নূতন লোক বাহাল ক’রেছেন। তাও আবার কেমন সব লোক পছন্দ হয়েছে জানেন, যারা কখনও এ কাজ করেন নি, আর যারা তাঁর তোষামোদকারী বালাবন্ধু। এই শুনতে পাচ্ছি, তাঁর মহলের মধ্যে খুব অত্যাচার হওয়াতে প্রজারা সব ক্ষেপে উঠেছে,—তারা একজোট হয়ে পূজার মুখেই খাজনা বন্ধ করে দেবে! কতক জায়গায় খাজনা দেবার মত প্রজাদের অবস্থা নাই। অত্যাচার কমাতে, দেবনারায়ণকে সুপথে আনতেই, ভগবান্ সব এমন করে তুলছেন, তাতে আর কোন সন্দেহই নাই।”

“এ দিকের ব্যবস্থা এরূপ হলেও ত সদাশিবের উদ্ধারের উপায় হ’ল না। বড় বিপদ হ’ল। নিজেদের সামর্থ্যও কুলান হচ্ছে না, অথচ, রাজার সাহায্যও নেবার উপায় নাই; তাহ’লেই আর একটা জীবন ব্যর্থ হয়ে যাবে। কি যে করা যায়, বুঝে উঠা দায়। কি হবে, কেমন করে সদাশিবকে উদ্ধার করা যাবে! আমি যেন ক্রমশঃ হতাশ হ’য়ে পড়ছি।”

“মায়া কি এ সম্বন্ধে কোন কথা বলেছে ?”

“বলে নি, কিন্তু এই ক’দিনে সে যেন আধখানা হয়ে গেছে। মূখ চোখ বসে গেছে। মাথার একরাশ চুল রুক্ষ হয়ে যেন তাঁর মনের মতই উড়ে উড়ে বেড়াচ্ছে। সব সময়েই মনে হচ্ছে যেন, এখনি কাঁদছিল। কথাবার্তা একদম বন্ধ করে, সর্বদা গুম্ হয়ে বসে, আকাশ পাতাল কি যেন ভাবছে। আমাদের সাড়া পেয়েই চমকে উঠছে। আমার মনে হচ্ছে, যেন সে আমাদের দেখাতে চায়, তার কোনও চুংখ হয় নাই।”

“জ্ঞানবাবু, আপনি কেন্দে ফেলেন যে! আশুন, আশুন, —এখনি এরা এসে পড়বে। হয় ত আরও একটা অশুভ ঘটনা হয়েছে মনে করে—চীৎকার করে উঠবে। মায়া যে এখনও চুপ করে আছে, সেই আমাদের খুব ভাগ্যি। সে আমার সামনে আর সেদিন হ’তে আসে নি। আমি মায়ার মন বোঝবার জন্মই বলে দিয়েছি, এই পত্রখানার একটা উত্তর দিতে হবে। সে দু’দিন সময় চেয়ে মহামায়াকে দিয়ে বলেছে—‘সব পাগলের খেয়াল মিটাইবার মত আমার মনের অবস্থা নাই। তবে, বাবার পত্রের উত্তর না দিলে দোষ হবে; তাঁর প্রতি অমর্যাদা করা হবে বলেই, আমি একটা উত্তর দিব।’ দেখা যাক কি লিখে, আমার বৃকের বোঝাটা মা নামিয়ে দেন। আজই পত্র নিয়ে লোক যাবার কথা আছে।”

“কে যাবে ?”

“যে লোকটা এসেছিল, তার খুব জ্বর হয়ে পড়ে আছে। তা ছাড়া, তাকে এখন কিছুদিন এই বাড়ীর মধ্যে নজরবন্দী করে রাখতে হবে; তাই অপর লোক দিয়ে পাঠাব। একজন

জমীদারের বাড়ী হতে অপর জমীদারের বাড়ী পত্র যাবে ;— বিশেষ, বাপের চিঠির উত্তর পাঠাচ্ছে মেয়ে, তাতে ত কোন অভিসন্ধি থাকতে পারে না। তবে, যে পত্র দিচ্ছে, তার মত নিয়েই এ ব্যবস্থা করা যাবে। দেখা যাক, সেই বা কি বলে।” এই বলিয়া দেওয়ানজী “মায়া,—মায়া, ও মায়া,” বলিয়া বার কতক ডাকিতেই, স্বপ্নাভরণা, শুভ্রবসনা, ঈষৎ ক্ষীণাক্ষী, কৈশোর-যৌবনের মধ্যবর্তিনী মায়া তাঁহাদের সম্মুখে আসিয়া দাঁড়াইল। তখন তাহাকে দেখিয়া মনে হইল, শঙ্কা, কুণ্ঠা, দ্বিধা বা দৈন্তের মালিন্য-শূন্য দেবীমূর্তি আসিয়া তাঁহাদের সম্মুখে দাঁড়াইয়াছে। দেওয়ানজী সামনের একটা কাগজের উপর লক্ষ্য রাখিয়া, যেন মায়াকে দেখেন নাই এমনি ভাবে মায়ার দিকে অন্তমনস্কের মত হাত বাড়াইয়া দিয়া বলিলেন—“তোমার বাপের চিঠির উত্তরটা দাও ত মা ! সেটা আজই পাঠিয়ে দিই। পত্র পেতে যত দেরী হচ্ছে, তিনি তত ভাবছেন। সে লোকটার জ্বর হয়ে পড়েছে, কাকেই বা পাঠান যায় বল দেখি মা ?”

মায়া দ্বিধাশূন্য হৃদয়ে নিঃসঙ্কোচে বলিল—“পত্রখানা ওঘরে আছে, আনছি।”

পাশের ঘর হইতে একখানি খামে-পোরা পত্র আনিয়া দেওয়ানজীর হাতে দিয়া বলিল—“জেঠামশাই, আপনারা এ পত্র-খানা দেখে দেবেন। যদি সব কথাই উত্তর দেওয়া না হয়ে থাকে, বা কিছু ভুল হয়ে থাকে।”

“আচ্ছা মা, আমরা দেখে দেবো। কিন্তু কার হাত দিয়ে পত্রখানা পাঠাই, বল দেখি মা ?”

“এ কথা কেন বলছেন, বুঝতেই পারছি না। সেখান-

কার কোনও গোপন সংবাদ যদি আমাদের জানতেই হয়, তবে সে ভার এ পত্রবাহকের উপর না দেওয়াই উচিত। আমার কাছ থেকে বাবার পত্রের উত্তর নিয়ে যাবে, তার মধ্যে কোনও ছল-চতুরতা থাকে, এ আমার মোটেই ইচ্ছে নয়। আমার মনে হয়, তাহ'লে বাবার অমর্যাদা করা হবে। দেওয়ান সঙ্গে নিয়ে, সরকার মশাই গিয়ে বাবার হাতে পত্রখানা দিয়ে আসবেন। আমার চিঠি আমাদের লোক ভিন্ন অপর লোকের হাত দিয়ে বাবার হাতে পৌঁছে, এটা আমার ইচ্ছে নয়। আমার ইচ্ছে, বলাটা এ আমার খুবই ভুল হচ্ছে ; আপনারা যেমন ভাল বিবেচনা করেন, তাই করুন।” বলিয়া মায়া শুষ্ক মুখে হাসিবার বারেকমাত্র চেষ্টা করিয়া, সেখান হইতে চলিয়া গেল।

দেওয়ানজী ও জ্ঞানবাবু পরস্পরে অনুরুদ্ধ হইয়া এক একবার পত্রখানি পড়িলেন। পত্র পাঠান্তে জ্ঞানবাবু দেওয়ানজীর মুখের দিকে চাহিয়া দেখিলেন, অশ্রু-প্রবাহ বৃদ্ধের দুই গাণ্ড বাহিয়া, শ্বেত শ্মশ্রুর উপর দিয়া, পৃথিবীর তপ্ত বক্ষ যেন শীতল করিতে অতি দ্রুত নামিতেছে। সে সময় পত্রের কথা আলোচনা করিবার শত ইচ্ছা মনের মধ্যে দমন করিয়া, জ্ঞানবাবু দেওয়ানজীকে যেন অগ্ৰমণা করিবার জ্ঞ, মায়ার ইঙ্গিতমত নয়-আনীতে পত্রখানি পাঠাইবার ব্যবস্থা করিতে দেওয়ানজীকে অনুরোধ করিতে লাগিলেন।

যথা সময়ে দেওয়ানজীর আদেশ পাঠিয়া, পত্র লইয়া, সরকার মহাশয় একজন দেওয়ান সঙ্গে নয়-আনী চলিয়া গেলেন।

দেববাবুর অনুগ্রহে ও আতিথেয় সরকার মহাশয় তৃপ্ত হইয়া,

সদাশিববাবুর সহিত সাক্ষাৎ করিয়া মায়ার পত্র দিলেন । রোগশয্যাশায়ী সদাশিববাবু অসীম আগ্রহে তৎক্ষণাৎ সেই পত্রখানি পড়িয়া ফেলিলেন । পত্রপাঠ শেষ করিয়াও তিনি অপলক বিস্ফারিত চক্ষুতে স্তম্ভিতের ন্যায়, পত্রের উপর একদৃষ্টিতে চাহিয়া রহিলেন । সদাশিববাবুর এরূপ উত্তেজনা দেখিয়া একজন ডাক্তার তখন সরকার মহাশয়কে বলিলেন—“অতিরিক্ত মানসিক উত্তেজনা বা চিন্তা, কি বাক্যালাপ রোগীর পক্ষে বিশেষ অনিষ্টকর । এখন আপনি বাহিরে যান ।” কাজেই, সরকার মহাশয় মনের মধ্যে রোগীর সম্বন্ধে যাহাই ধারণা করিয়া লউন না কেন, চিকিৎসক-প্রবরের কথাই শিরোধার্য্য করিতে বাধ্য হইলেন, এবং দেববাবুর ইচ্ছিতে বাহিরে আসিলেন । কিন্তু তিনি বাহিরে আসিয়া শুনিতে পাইলেন, সদাশিববাবু উত্তেজিত কণ্ঠে বলিতেছেন, “কার চোখে আর কত দিন ধূলো দেবে ডাক্তার । দেবনারায়ণের পয়সায় মনুষ্যদ্বিটা একেবারে মাটির দরে বেচে দিচ্ছ ? দাও ;—এর বিচার একদিন হবেই হবে । আর দেবনারায়ণ, তুমি এত বড় বংশের ছেলে হয়ে—এমন উচ্চ-শিক্ষিত হয়ে, এমন উচ্চ মন নিয়ে, কেবল সঙ্গ-দোষে সব ভাসিয়ে দিচ্ছ বাবা ! আমার দেওয়া পত্র অন্তরূপ করে আমার মেয়ের কাছে পাঠিয়ে, তার মনে একটা মন্দের কাল ছবি এঁকে দিতে যাওয়ার সাহস তুমি কার কাছ থেকে পেয়েছ ? আগুন নিয়ে খেলা করতে গিয়ে নিজের মানসভ্রম সব পুড়িয়ে ফেল না ; ছেলেমানুষ তুমি, জান না, এসব খেলবার জিনিস মনে করো না । আমার মেয়ের অমর্যাদা কর্তে প্রয়াস পেয়েছ বলে আজ আমি এ কথা তোমায় বলছি না । আমার বলা উচিত বলেই

বলছি। কখনও কোনও সময়ে নারীর মর্যাদার উপর হাত দিও না। বিশ্বের সব পাপের প্রায়শ্চিত্ত আছে, সব দোষের ক্ষমা আছে, কেবল এই সতীধর্মের উপর তাচ্ছিল্যে যে পাপ, তার প্রায়শ্চিত্ত নেই—তার ক্ষমা নেই। মানুষ ত ছার, স্বয়ং ভগবান্কেও এই সতীর অভিসম্পাতে পশুর আকার ধরতে হয়েছিল, আত্মবিস্মৃত হয়ে হাহাকার করে ত্রিভুবন ঘুরে বেড়াতে হয়েছিল। দেবতার দলকে ঘোড়ার ঘাস কাটিয়েও রাবণের বংশনাশ হয় নাই। কিম্ব সতীর অঙ্গে হস্তক্ষেপ কর্তে সাহসী হয়েই হয়েছিল। সীতাকে ছলে, বলে, কৌশলে যেমন লঙ্কায় এনেছিল, তেমনি সেই পাপের তাপেই সবংশে ভস্ম হয়ে গেল। দুর্ঘ্যোধনেরও এই দশা। ব্রহ্মাকেও এই পাপের প্রায়শ্চিত্ত করবার জন্য নিজের জ্ঞানমুণ্ড শিবের হাতে বলি দিতে হয়েছিল। তাই পঞ্চমুণ্ড ব্রহ্মা অনন্তকালের জন্য চতুর্দ্বন্দ্ব হয়ে গেছেন। দেবনারায়ণ, সাবধান হও—হয় ত এখনও সংসঙ্গে তোমার ফেরবার উপায় হতে পারে; কিম্ব একবার যদি পাপের এই শেষ ধাপে পা দাও, তাহলে আর কোন উপায়ই থাকবে না। একেবারে গড়িয়ে শেষ স্তরে নিয়ে, সব হারিয়ে বসবে। এখানের সব কুমিকীটের মঙ্গ ভ্যাগ কর। যত সব নরাকারে পশু এখানে এসে একজোটে হয়ে এত বড় একটা বনেদী বংশের ছেলেকে—বংশের শেষ সম্বলকে—পৈতৃক জল-পিণ্ডের প্রত্যাশার শেষ সম্বলকে একেবারে উচ্ছেদ করে দিতে বসেছে। কি ভয়ানক পরিণাম এর! ভগবান্কে ধন্যবাদ যে, আমার একমাত্র কন্যা মায়ী, সে আজ তার বাপকেও শিক্ষা দিতে কুণ্ঠিত হয় নি। তাঁর দয়ায় সে, যে মনের জোর নিয়ে আমায় পত্র দিয়েছে, এমনই মনের জোর তার যেন চিরদিন থাকে। শুধু

তার কেন, প্রত্যেক নারীর মধ্যে এমন শক্তি যেন বিশেষ ভাবেই পরিষ্কৃত হয়। নতুবা, এই উদ্ধত যুগের অসংযমী দলের মধ্যে আমাদের মায়ের জাতির সম্মান থাকে না যে মা। বিশ্বেশ্বরী মা আমার, আর একবার—এই ভারতের মধ্যে তেত্রিশ কোটি দেববৃন্দের মুখ দিয়ে সারা বিশ্ব-ব্রহ্মাণ্ডের প্রাণমন-মাতান তোমার স্বরূপ স্তব শুনিয়া দাও মা!—

বিদ্যাঃ সমস্তাস্তব দেবি ভেদাঃ, দ্বিয়ঃ সমস্তাঃ সকলা জগৎসু ।

দ্বৈকয়া পূরিত-মম্বয়েতৎ, কা তে স্তুতিঃ স্তব্যাপরাপরোক্তি ॥

সৰ্বভূতায়দা দেবী স্বৰ্গমুক্তি প্রদায়িনী ।

ত্বং স্তুতা স্তুতয়ে কা বা ভবন্তু পরমোক্তয়ঃ ॥

সৰ্বশ্চ বুদ্ধিরূপেণ জনশ্চ হৃদি সংস্থিতে ।

স্বৰ্গাপবৰ্গদে দেবি নারায়ণি নমোঃ স্তুতে ॥”

১৯

শত-বিলাস-সম্ভারে পরিপূর্ণ একটি হলঘরে প্রবেশ করিয়া দেবনারায়ণ বাবু দুইজন অতি বিশ্বস্ত কর্মচারীকে আদেশ দিলেন, “আমি না ডাকা পর্যন্ত যেন কেহ আমাকে এখানে বিরক্ত করিতে না আসে। বিশ্ব-ব্রহ্মাণ্ড রসাতলে যাইলেও আমার এ আদেশের অগ্রথা হইবে না। যিনি এ আদেশ অগ্রথা করিতে সাহসী হইবেন, তিনি যেন মৃত্যুর জগ্ন প্রস্তুত হইয়া আসেন।”

দেবনারায়ণবাবুকে হয় ত অনেকে না জানিতে পারেন, কিন্তু তাঁহার অথগু প্রতাপকে অনেকে প্রত্যক্ষরূপে দেখিয়াছেন—যাদের সে সৌভাগ্য হয় নাই, তাঁরা অন্ততঃ শুনিয়াও স্তম্ভিত হইয়া আছেন। ধনগর্বে উন্নত দেবনারায়ণবাবু দেশে আসিয়া

অবধি যে সব অদ্ভুত অদ্ভুত কার্য করিয়া নিজের আধিপত্যের উপর কঠোর শাসন-পদ্ধতি প্রয়োগ করিয়াছেন, তাহাতে লোকে ভীত, স্তম্ভিত, সঙ্কস্ত হইয়া, কোন গতিকে মনপ্রাণ বাঁচাইয়া, বহু-কালের পৈতৃক বাস্তব মায়া কাটাইতে না পারিয়া, অর্ধমৃত হইয়া আছেন মাত্র। অবশেষে উৎপীড়িত প্রজারা একজোট হইয়া ফেপিয়া উঠিয়া আশ্বিন কিস্তির খাজনা একেবারে বন্ধ করিয়া দিরাছে। আর সময় নাই, কালই খাজনা রাজবাড়ীতে পাঠাইতে হইবে, নতুবা সব নীলামে চড়িবে। ঘড়ি পিটিয়া এক--তাই--তিন ডাকিয়াই সে ডাক একেবারে বন্ধ হইয়া যাইবে। কাহার ভাগ্যলক্ষ্মী তখন কাহাকে আশ্রয় করিবেন, তাহা কে জানে? এই ভাবনা না ভাবিয়া—ইহার প্রতিকার না করিয়া, রূপমুগ্ধ মন লইয়া সদাশিববাবুর কণ্ঠার পত্রখানা গোপনে আত্মসাৎ করিয়া আনিয়া, সন্মুখের টেবিলের উপর রাখিয়া, দেবনারায়ণ একখানা চেয়ার টানিয়া লইয়া ঝুঁকিয়া পড়িয়া, পড়িতে লাগিলেন,—

শ্রীশ্রীকালীমাতা সহায়।

শ্রীচরণেষু—

বাবা, আপনার আশীর্বাদী পত্রখানি পাইয়া সকল সনাচার জ্ঞাত হইলাম। আপনার কোনও পত্রই আমি এর পূর্বে পাই নাই। আপনার পত্র পাইয়া যেদিন উত্তর দিতে আমার আলস্য আসিবে, সেদিন যেন আমি আর এ পৃথিবীতে না থাকি। আমার এতদিন ধারণা ছিল, আপনি সাত-আনীতে জেঠামহাশয়ের বাড়ীতেই আছেন; এবং এই প্রকারই এখানকার সকলে আমাকে জানাইয়াছিলেন। আমার সে ধারণা যে ভুল, আপনার পত্র

পাইয়া তবে বুঝিতে পারিলাম। আরও বুঝিতে পারিলাম—
 স্নেহান্বিত হইয়া মানুষ এমন ভুল হয় ত অনেকই করিয়া বসে। এ
 ভুল সংশোধন করিতে হইলে, ভগবানের অসীম দয়া প্রার্থনা
 করা ভিন্ন আমাদের অন্য উপায় নাই। যদিই থাকে—তবে
 আপনি আজ পর্যন্ত আমাকে সে শিক্ষা দেন নাই। শুধু আমাকে
 কেন—বিশ্বের কোন পতিব্রতা নারীকে কেহ কখনও সে
 শিক্ষা দিতে সাহস পায় নাই। আপনার রোগ-শয্যার পাশে
 থাকিয়া আমি যে আপনার সেবা করিতে পারিলাম না, তাহা
 স্নেহান্বিততার কারণে, কি অধিকতর কর্তব্যের খাতিরে, তাহা ঠিক
 বুঝিয়া উঠিতে পারিতেছি না। দেওয়ান জেঠামশায় এখানে
 অত্যন্ত পীড়িত হইয়াছিলেন,—ডাক্তার, কবিরাজ সকলেই জীবনের
 আশা ত্যাগ করিয়াছিলেন। তাঁহাকে লইয়া আমরা এতদূর বাস্তু
 ছিলাম যে, তাঁহার সেবা ব্যতীত আর কোন কথাই তখন মনে
 হইত না। বন্ধুর রাত্রি হইতেই আপনার অসুখ এবং আপনি
 সাত-আনীতেই আছেন, এ কথা জানিয়া-শুনিয়াও আমার মনে
 হইত, এখন আপনার সেবার যতটা আবশ্যিক, আমি হয় ত
 এখানে ততটা করিতে সক্ষম হইব না বলিয়াই, ভগবান্ দয়া
 করিয়া আপনাকে সাত-আনীতে রাখিয়াছেন। কারণ, আমার
 বিশ্বাস—আমার ধারণা—আমা অপেক্ষাও আপনার অধিক স্নেহের
 লোক, আমারই মন, প্রাণ, শক্তি প্রয়োগ করিয়া, একনিষ্ঠ
 ভক্তির সহিত আপনার সেবা করিতেছেন। অতি শৈশবে মার
 মুখে, পরে বড় হইয়া আপনার মুখে ও জেঠামশায়ের মুখে,
 কতদিন ধরিয়া কত কার্যের মধ্যে—কত-কতবার শুনিয়া
 আসিতেছি যে, একদিন সেখানের ঘর-বাড়ী, লোকজন সবই

আমার হইবে, আর মাত্র আমি তাঁহাদের হইব। আবাল্যের এ ধারণার উপর এতটা দৃঢ় বিশ্বাস কেন না আসিবে! কিন্তু আজ দেখিতেছি,—আমি এখন আর নিতান্ত বালিকা নাই—বিপদের মধ্যে পড়িয়া এই কয়দিনেই আমি অনেক সন্তানের মাতা হইয়া পড়িয়াছি। এখানে আমার একটি অতি বৃদ্ধ সন্তান রোগ-শয্যা পড়িয়া, ‘মা, মা,’ বলিয়া ডাকিতেছেন, আর সেখানে বাবা আপনি, অতি শিশু-ছেলের মত অগ্রায়ের আব্দার পূরণ করিবার জন্ত, আপনার মার মুখেই যেন ঘোমটা টানিয়া দিয়া, খিল-খিল করিয়া হাসিয়া উঠিতেছেন। বাবা, আপনিই ত একদিন আপনার কুমারী কন্যার অন্তরে, বিনা বিচারে তাহার ভাবী স্বামীর স্বভাব-সুন্দর নিশ্চল চরিত্র-চিত্র অঙ্কিত করিয়া দিয়াছেন, এবং আপনার সে কন্যাকেই বিশ্বমাতার অসীম রূপার প্রার্থী করিয়া, সারা বিশ্বকে সন্তানের চক্ষু দেখিতে ও সন্তানের স্নেহ-বন্ধ দিতে শিক্ষা দিয়াছেন। আমার শরীরে আমারই মা ঠাকুরমার রক্ত প্রবাহিত হইতেছে বলিয়া, আমি সর্বান্তঃকরণে আমার সন্তানের শত দোষ মার্জনা করিতে শিখিয়াছি। সন্তানের মাতৃ-দর্শনের ইচ্ছা হইলে দেশ, কাল, পাত্র বিচার না করিয়া এখানে আসিতে পারে। মাতৃ-মন্দিরে আসিতে কোন সন্তানই কখনও যেন কোন প্রকারে দ্বিধাবোধ না করে। সন্তানকে কোড়ে তুলিয়া লইবার জন্ত মাতার উত্তম হস্ত সর্বদা প্রসারিত রহিয়াছে।

আপনার স্নেহের কণা—শ্রীমায়াদেবী।

পত্র পাঠ শেষ হইলে, দেববাবু জলন্ত আগুনের শিখার গায় চকুর তেজ বাহির করিয়া, সেই অধীত পত্রের দিকে একদৃষ্টে চাহিয়া রহিলেন। কিছুক্ষণ চাহিয়া থাকিয়া, মনের মধ্যে

শিহরিয়া উঠিলেন। আর মনে করিতে লাগিলেন, যেন পত্রখানা কথ্য কহিয়া তাঁহাকে বাঙ্গ করিতেছে—আর প্রতি অক্ষরের ঔজ্জ্বল্যে শত চক্ষু বাহির হইয়া তাঁহাকে দগ্ধ করিতে উত্তত হইয়াছে। অমনই ভয়-বিস্ময়ে অভিভূত দেববাবু হঠাৎ চেয়ার জাগ করিয়া পাশের ঘরে যাইয়া, তাঁর মায়ের তৈল-চিত্রের নিম্নে গিয়া ছানু পাতিয়া বসিয়া পড়িলেন। সেই প্রকার অভিভূত অবস্থায় কতক্ষণ কাটিয়া গেল, মনের মধ্যে মূহুর্তে কত কথা জাগিয়া উঠিল, কিছুই বুঝিতে না পারিয়া ‘মা, মা’ বলিয়া কাঁদিয়া উঠিলেন। কতকাল পরে যেন পাষণ গলিয়া গেল। কাঁদিয়া কাঁদিয়া বক্ষের গুরুভার দ্বিত করিয়া, দেববাবু স্বর্গীয় পিতৃ-মাতৃ পদে অসংখ্য প্রণাম করিয়া প্রাণে নূতন শক্তি সঞ্চয়ের চেষ্টা করিতে লাগিলেন।

একদিন একরাত্রি মনের মধ্যে নানা চিন্তা পোষণ করিয়া, শেষে এই সিদ্ধান্তে উপনীত হইলেন যে, সদাশিববাবু স্বেচ্ছায় যদি কন্যাদান করেন, তবেই বিবাহ করিব; নতুবা, চিরদিন অবিবাহিত থাকিয়া, দেশের ও দেশের উপকারে জীবনপাত করিব। খেয়ালের বশে যে অন্তায় করিয়া বসিয়াছি, তাহার আর উপায় কি? আজই সদাশিববাবুকে নারায়ণপুরে পাঠাইয়া দিব। দেববাবু অভিভাবকহীন হইয়া অবধি, যখন যাহা খেয়ালে আসিয়াছে, তাহাই করিয়াছেন। আজও সেই খাম-খেয়ালী বুদ্ধি পরিচালিত হইয়াই, কর্মচারীদিগকে ডাকাইয়া সদাশিববাবুকে সসম্মানে নারায়ণপুরে রাখিয়া আসিতে আদেশ দিলেন।

বিদায়কালে নিজে যাইয়া সদাশিববাবুর নিকট ক্ষমা প্রার্থনা করিলেন। সদাশিববাবুও অশেষ প্রকারে সৌজন্য জানাইয়া, আশীর্ব্বাদ করিয়া, নারায়ণপুর অভিমুখে যাত্রা করিলেন।

সেই দিনই অপরাহ্নে সদাশিববাবু, সরকার মহাশয় ও দরওয়ান নারায়ণপুরে পৌঁছিলেন। আর সন্ধ্যার সময় নয়-আনীতে সংবাদ আসিল যে, দেববাবুর নূতন ম্যানেজার বাবু রাজবাড়ীর খাজনা যোগাড় করিয়া না দেওয়াতে, নয়-আনীর সমস্ত মহল বিক্রী হইয়া গিয়াছে। কে একজন স্ত্রীলোকের নামে সেই সমস্ত মহল ডাকিয়া লইয়াছে। অনেক চেষ্টা করিয়াও সে নামটা ঠিক জানিতে পারা যায় নাই।

২০

নারায়ণপুরে আসিয়া সদাশিববাবু দেখিলেন, দেওয়ানজী সুস্থ হইয়া কাজ-কর্মের নূতন ব্যবস্থা করিতেছেন। মায়ী জ্ঞানবাবুর সহিত কলিকাতা গিয়াছে। জ্ঞানবাবুর শরীর বড় খারাপ। দেশে এ বৎসর ম্যালেরিয়ার প্রকোপ অত্যন্ত। শরীর খারাপ বলিয়াও বটে, আর কতকটা দেবনারায়ণবাবুর ভয়েও বটে, তাঁহারা দেওয়ানজীর পরামর্শমত কলিকাতায় গিয়াছেন। কলিকাতায় জ্ঞানবাবুর ভগিনীপতি, ভগিনী ও ভাগিনেয় সুধীর যে বাটীতে আছেন, জ্ঞানবাবু মায়াকে লইয়া সেখানে গিয়াছেন। দেওয়ানজীর পরামর্শে সদাশিববাবুও পরদিন কলিকাতায় যাইবেন স্থির করিলেন। মহামায়ী ও তাহার মা বিষ্ণুপ্রিয়া দেওয়ানজীর অনুরোধে বাধ্য হইয়া নারায়ণপুরেই আছেন। নূতন মহল খরিদ হইয়াছে, তাহার ব্যবস্থা এখান হইতেই হইতেছে। সমস্ত মহল দখলে আনিতে ও আদায়-পত্র করিতে সময় যাইবে বলিয়া, তাঁহারা এখন আর বাড়ী যাইবেন না। সদাশিববাবুও তাঁহাদিগকে এখানে থাকিতে বিশেষ প্রকারে অনুরোধে আবদ্ধ করিয়া, সংসারের যাক্তীয় ভার দিয়া যেন নিশ্চিন্ত হইলেন।

সদাশিববাবু কলিকাতায় চলিয়া যাইলে পর, দেওয়ানজী মহামায়াকে ডাকিয়া বলিলেন,—“মা, রোগ-শয্যায় অনেক অনাচার হয়েছে, আমার চাক্ষুয়ণ প্রায়শ্চিত্তের ব্যবস্থা করিয়া দাও। আগামী কল্য শুভদিনে এ কার্য সারিয়া লইতে হইবে।”

“মায়া এখানে ফিরে এলে পর এসব করলে হ'ত জেঠামশায়!”

“না মা, তোমার আদর-যত্নে আমার কোনও অসুবিধা হবে না। আর কিই-বা ধুমধাম হবে যে, ঘট ক'রে সকলকে এ কথা জানাতে হবে। তোমার যা ইচ্ছে তাই ক'রে আমার এ কাজটার উদ্যোগ করে দাও মা! আমি এ কাজ সেরেই একবার দেববাবুর বাড়ী যাব মনে করেছি। সেখান হ'তে মহলের কাগজ-পত্রগুলো যদি যোগাড় ক'রে উঠতে পারি।”

“না জেঠামশায়, তা হবে না। তাঁর কোন সাহায্যই আমাদের নিতে হবে না। আপনি দেখে শুনে, লোকজন দিয়ে ক'রে নিন।”

“এখনও মনের মধ্যে অভিমান রেখেছ মা! এটা ভাল হচ্ছে না। তুমি যদি মা, আমার বাধা থাকাটা অপমান মনে কর, তা হ'লে আমি আর কোনও কথাই ক'ব না।”

“না জেঠামশায়, মনের মধ্যে যাই থাক্, আপনার সন্তোষের জন্য আমি সব করতে প্রস্তুত হয়েছি। জীবনে কখনও আপনার অবাধা হব না। আপনার কথায় আমি সবই করতে পারি। আপনি তা পরীক্ষা করে দেখতে পারেন।”

“মা, আমার সে বিশ্বাস আছে বলেই ত, আমি আজ সব ছেড়ে শুধু তোমার সাহায্যে এ কাজে হাত দিয়েছি। জ্ঞানবাবু, সদাশিববাবু, মায়া এঁরা এখন নিজেদের নিয়ে ব্যস্ত হয়ে উঠেছেন বলেই আমি তাঁদের কলিকাতায় যাবার পরামর্শ দিয়েছি। মায়ার বিয়ে

দিলেই কি আমার সব কাজ শেষ হয়ে যাবে ? আমার অন্নদাতার কাজটি উদ্ধার ক'রে চূপ ক'রে থাকলেই কি আমার মনুষ্যত্ব বেড়ে যাবে ? আমার মায়ের কাজও করা চাই। না হলে যে মাল্লের ছেলে পর হয়ে যাবে মা !”

এমন সময় বিষ্ণুপ্রিয়া সেখানে আসিয়া বলিলেন—“বেলা হ'য়ে গেছে, আপনি থাকেন আসুন ! দিনকতক একটু রোগীর নিয়ম মেনে চলুন, তা না হ'লে, শীঘ্র শরীর সারবে না যে !” অনুযোগের সুরে এই কয়টা কথা বলিয়াই মহামায়াকে সেখানে দেখিয়াই রাগে জলিয়া উঠিয়া বলিতে লাগিলেন,—“তোমার কোন বুদ্ধি নাই, মানুষের উপর যত্ন নাই। দিন-রাত বাজে তর্ক ক'রে ক'রে তোমার মাথা খারাপ হ'য়ে গেছে। তুই দিনকতক নজর ছাড়া হ'য়ে সরে যা মহামায়া ! তোকে দেখে আমার যেন কেমন একটা অশান্তি হয়েছে। হতভাগা ধাড়ী মেয়ে লেখাপড়ার দেমাকেই গেলেন আর কি ! মেয়েমানুষ ক'রে ভগবান পাঠিয়েছেন, মেয়েমানুষের মত থাক, মেয়েমানুষের যা কাজ তাই কর। তা না ক'রে, সময় নেই অসময় নেই ক্রমাগত তর্ক, বকাবকি এই নিয়েই আছি। সব সময় সকলের কথায় কি করে উত্তর দিস ! একটু লজ্জা হয় না ! বড়-মানুষের মুখের উপর কথা কথা তোমার একটা রোগ হ'য়ে গেছে। এই যে একটা বুড়ো মানুষ বেলা দুপুর পর্য্যন্ত মুখে একবিন্দু জল না দিয়ে রয়েছে, সেদিকে লক্ষ্য রেখে চলা কি তোদের লেখাপড়ায় তোদিকে শেখায় নি। তখনই আমি বলেছিলাম যে, ‘বাবু তৈরী হতে কলেজে পাঠিয়ে মেয়ের মাথা খেও না। যাতে মা হ'তে পারে, এমন বিদ্যে সেখানে নেই। সংসারের মধ্যে মেয়েমানুষের শেখবার সব আছে, কেন

একটা মন্দের ছাপ নিয়ে আমাদের জ্বালাতন করবে, আর নিজেও জ্বালাতন হবে।' শেষে ঠিক তাই হয়ে দাঁড়াল। সর্বগ্রাসী সব খেলোও পেট ভরে নি। আবার এখানে এসে কাকে খাই, কাকে খাই ক'রে বেড়াচ্ছে। যেখানে যখন পা দিচ্ছি, সেইখানে তোর জন্তেই যত কিছু মন্দ সব হচ্ছে। এসব দেখেও নিজের উপর দিক্কার আসছে না। যা, যা, নজর-ছাড়া হ'য়ে সরে যা।" বলিয়া নিজেই কাঁদিতে কাঁদিতে সেখান হইতে চলিয়া গেলেন। আর যাহার উপর এত বাক্যবাণ বর্ষিত হইল, সে নিৰ্ভিকার চিত্তে বসিয়া রহিল।

দেওয়ানজী বলিলেন—“মহানায়ী, মাকে বলা আজ আমায় উপবাস থাকতে হবে, কাল চান্দ্রায়ণ করে, ঠাকুরের প্রসাদ পাব। মাকে খেতে বলে এস। তুমি খেয়ে এস। আমারই দোষে তুমি এত-গুলো কথা শুনলে। সকালে ব'লে দিলে আর এমনটা হ'ত না।”

“না জেঠামশায়, মায়ের অমন বকা অভ্যাস হ'য়ে গেছে, আমারও শুনে শুনে সব সয়ে গেছে। ছেড়ে দিন ও-সকল কথা। মাঝে মাঝে মায়ের মন ধারাপ হলেই, মা অমন ক'রে বকেন। আপনার মাটি কেমন রাগী, কেমন মায়ের মেয়ে আজ দেখলেন ত জেঠামশায়। মায়ের মুখে এমনই বকুনি খেয়ে হাসিমুখে উড়িয়ে দিতে পারবেন ত ?”

২১

দেবনারায়ণবাবু দেশের মায়ী কাটাঁইয়া একেবারে সুদূর পশ্চিমে যাইয়া বাস করিবেন বলিয়া চারিদিকে জনরব উঠিয়াছে। তাঁহার বাড়ীতেও সেই প্রকার ব্যবস্থা হইতেছে। এখনও যাহা

কিছু আছে, তাহার বন্দোবস্ত করিবার জন্ত যতটুকু বিলম্ব। একদিকে লগেজপত্র বাধিয়া সারি সারি সাজান হইতেছে, অপর দিকে দেশের গণমাণ্ড ছই চারিজন বসিয়া, এত বড় বর্নেদী বংশ একেবারে নষ্ট হইয়া না যায়, তাহারই ব্যবস্থা করিবার জন্ত দেববাবুকে অনেক প্রকারে বিচারে, তর্কে, অনুরোধে, উপরোধে বুঝাইতেছেন। কিন্তু দেববাবু অটল-অচল হইয়া সকল কথা শুনিয়া যাইতেছেন। কাহারও কোন কথার প্রতিবাদ করিতেছেন না। এমন সময় মুণ্ডিত মস্তক অতি বৃদ্ধ এক ব্যক্তি দেববাবুর সম্মুখে আসিয়া জোড় হাত করিয়া বলিলেন—“বাবু, আমায় ভিক্ষা দিন।”

সকলের দৃষ্টি হইতে আপনাকে বাঁচাইবার জন্ত ভিক্ষুক একটু ঘুরিয়া দাঁড়াইয়া, দেববাবুর সম্মুখে একটি হাত পাতিয়া দাঁড়াইয়া রহিল।

অলক্ষণ এইভাবে দাঁড়াইয়া কাটিয়া গেল। দাতা কিছুই বলেন না—কিছুই দেন না; দেখিয়া ভিক্ষুক আবার বলিল—“বাবু, অনেক বাড়ী ঘুরে ভিক্ষে যোগাড় করবার শক্তি নাই ব’লে আপনার নিকট এসেছি, আমায় ভিক্ষা দিন। আপনি গরীবের মা বাপ। ভিক্ষা দিন বাবু—আপনি রাজা হবেন।”

দেববাবু বলিলেন—“আর ও-আশীর্বাদে কাজ নাই। ভিক্ষুকের আশীর্বাদের জোরে রাজা হ’তে আমার মোটে ইচ্ছা নাই। সদর দরজায় যাহা ভিক্ষা দিতেছে, তাই নিয়ে সরে পড়। পরকে রাজা হ’বার আশীর্বাদ করতে পার—আর নিজে রাজা হ’বার বর দেবতার নিকট প্রার্থনা করতে পার না—যাও, যাও, বিরক্ত ক’রো না।”

ভিক্ষুক এবার ফিরিয়া দাঁড়াইয়া বলিল,—“রাজা হব কি বাবু, রাজ্যরক্ষার বুদ্ধি নেই যে। রাজাই ত ছিলাম, বুদ্ধির দোষে আজ এই ভিক্ষুক হয়েছি,—এমন অনেকেই হয়ে থাকে বাবু। রাগ করবেন না বাবু! মুষ্টি-ভিক্ষায় এ পেট ভরে না বলেই ত আপনার কাছে হাত পেতেছি, দয়া ক’রে ভিক্ষা দিন, বড় দেবী হয়ে যাচ্ছে।”

এবার ভিক্ষুকের নির্ভীক কণ্ঠস্বরের মধ্যে এত বড় কথা শুনিয়া সকলেই চাফিয়া দেখিল।

“কে তুমি ভিক্ষুক? কখনও কেহ ত এমন কথা আমায় বলে নাই! এস ভিক্ষুক—এস আমার রাজা—এস আমার গুরু, আমার সব দর্প চূর্ণ ক’রে তোমারই মত ভিক্ষুক ক’রে দাও।” বলিতে বলিতে দেবনারায়ণবাবু উঠিয়া সেই ভিক্ষুকের পায়ের ধূলা মাথায় লইলেন। ভিক্ষুকও আনন্দ-অশ্রুতে অভিবিক্ত করিয়া তাঁহাকে আলিঙ্গনপাশে বদ্ধ করিয়া সহজ কণ্ঠে বলিল,—

“দেবনারায়ণবাবু, আজকের দান কখনও ফিরিয়ে নেবেন না ত?”

দেববাবু এবারে ভিক্ষুকের সহজ কণ্ঠ শুনিয়া চীৎকার করিয়া বলিয়া উঠিলেন—“দেওয়ানজী,—নারায়ণপুরের দেওয়ানজী! আপনি ভিক্ষুক?”

“দোষ কি দেববাবু, দেওয়ান হ’য়ে যা করতে পারি নি, আজ ভিক্ষুক হয়ে তা সফলই হ’ল ত? এ ভিক্ষায় যে আমার কত তৃপ্তি—কত আনন্দ—কত লাভ হ’ল, তা বুঝিয়ে বলবার মত আমার মনের অবস্থা নেই,—আমি এমন আনন্দিত হয়েছি। সময়ে সে সব বুঝিয়ে বলব। এখন যা কিছু হচ্ছে, সব বন্ধ করে দিন। এখন আর পশ্চিমে যাওয়া হবে না। বিষয়েরও এমনভাবে ব্যবস্থা

করতে দিতে আমি পারি না। এরূপ বলায় কিছু দোষ হচ্ছে না ত ? কারণ, আপনি যখন আমার ভিক্ষালক—তখন আপনার যা কিছু সবই ত আমার। বলুন—বলুন দেববাবু! বড্ড ধেরী হ'য়ে যাচ্ছে। আমার বড্ড ক্ষিদে পেয়েছে। ভিক্ষালক দানে আমার অনেক দিনের ক্ষিদে মিটিয়ে নিতে হবে। বলুন, বলুন—দেবী ক'রে আর বুড়ো মানুষকে কেন কষ্ট দেবেন।”

“তাই হোক, আপনার পথেই আমাকে টেনে নিন। আমারই বা ভিক্ষকের দশা পেতে আর বাকি কি ? কিন্তু আপনি কি ভ্রুংখে এমন হলেন দেওয়ানজী।”

“সে কি দেববাবু, পক্ষাশের পরই বনে যাওয়া উচিত ছিল—তা ত হয়নি। এখন একাশি বছরের বুড়ো আত্মীয়-স্বজন, বান্ধব, পুত্র, পৌত্র পরিত্যক্ত জীবনেও যদি বানপ্রস্থ অবলম্বন না করি, তবে আর কবে করবো।”

নানা কারণে নারায়ণপুরে ফিরিতে দেবী হইতে লাগিল বলিয়া দেওয়ানজী দেববাবুর অজ্ঞাতে মহামায়াকে একখানি পত্র লিখিয়া পাঠাইলেন। “মা, আমি ততদিন পর্য্যন্ত ফিরিয়া না যাই, ততদিন পর্য্যন্ত আমার ঘরেই দিবারাত্রি সাবধানে থাকিবে। আয়নার উপর নজর রাখিয়া সমস্ত দেখিবে। নূতন কোন লোক আসিলে তাহার পরিচর্যার ভার নদেরচাঁদের হাতে দিবে। কেহ সাক্ষাৎ করিতে চাহিলে, বামনকে পাশের ঘরে রাখিয়া, কোন ঝিকে সঙ্গে লইয়া, পর্দার আড়ালে থাকিয়া ঝির দ্বারা কথার জবাব দিও। কেহ অতিথি বলিয়া পরিচয় দিলে তাহার মৰ্য্যাদা

সর্বতোভাবে অক্ষুণ্ণ রাখিয়া, সাক্ষাৎ প্রত্যক্ষে কথাবার্তা কহিয়া তাহার সন্তোষ সাধন করিও। যেন কোনও প্রকারে তাহার অমর্যাদা না হয়। নিজের কৌমার্য্য-ধর্ম্ম সর্বদা সর্ব-প্রকারে অক্ষুণ্ণ রাখিয়া, এসব যথাযথ ভাবে সম্পন্ন করিতে যদি তোমার জীবন দিতে হয়, তাহাতেও পশ্চাদ্‌পদ হইও না। মা, তোমার এই বৃদ্ধ সন্তানের মুখ চাহিয়া তাহার মাতৃনামের সার্থকতা করিও। এর বেশী আশীর্বাদ আমি জানি না।”

দেওয়ানজী দুই তিন দিনেই দেববাবুর সহিত এমন মেলামেশা করিয়া ফেলিলেন যে, দেববাবুর মনের কোন কথাই জানিতে আর বাকি রহিল না। তখন বুদ্ধিতে পারিলেন—সর্বস্বান্ত হইয়াও, এখনও মনের চাঞ্চল্য যায় নাই। একটু চতুরতা অবলম্বন ব্যতীত ইহার মনের বিকার সারানও কঠিন বুদ্ধিয়া একদিন দেববাবুকে বলিলেন, “সদাশিববাবু আমার উপর সন্দেহ করেছেন যে, আমি আপনার সঙ্গে একযোগ হয়েই তাঁকে এতদিন এখানে থাকতে বাধ্য করেছি। এই ধিকারেই আমি তাঁর সংস্রব ত্যাগ ক’রে আপনার নিকটে এসে দেখাতে চাই যে, আমি দেববাবুর সঙ্গে যোগ দিলে অসাধাসাধন করতে পারি। আমার কূটনীতি আর আপনার শক্তি এই দুটো একসঙ্গে দাঁড়ালে সাত-আনী আর নারায়ণপুরের মধ্যে বিবাদের একটানা শ্রোতের নদী বহিয়ে দিতে একটুও দেবী হয় না। তাঁদের বড় অহঙ্কার যে, তাঁদের মধ্যে বড় বিচ্ছেদ কখন কেউ এনে দিতে পারে নি—পারবে না। শত দোষেও ক্ষমা করতে তাঁরা পরম্পরে সক্ষম। কিন্তু যে বিষয়ের লোভে জ্ঞানবাবু, সদাশিববাবুর খোসামোদ ক’রে বেড়াচ্ছেন, সেটা কার হাতে, তা এখনও জ্ঞানেন না; তাই

এত বাড় বেড়ে গেছে। বিষয়ের অন্ধি-সন্ধি জানতে এখন অনেক দেরী। তাই বলছি, দেববাবু, এই সুযোগে আপনি আপনার সব গুছিয়ে নিন। আমার এতদিনের পাকা দাড়ি—পাকা চুল কেন ফেলতে হয়েছে জানেন? তারা মনে করেছে যে আমি বিশ্বাসঘাতক। এই বিশ্বাসঘাতককে অপমান ক'রতে তারা আমার মাথা মুড়িয়ে ঘোল ঢেলে দিতে চেয়েছিল। এত বড় অপমান হওয়ার আগেই আমি আমার বহু পুরাতন আদরের দাড়ি চুল ফেলে দিয়ে সেখান হ'তে চাক্রায়ণ করে, সদাশিববাবু ও জ্ঞানবাবুর অজ্ঞাতে এখানে চলে এসেছি। কিন্তু, আমার মন এমন পাগল যে, এত অপমান হবার আশঙ্কা থাকলেও মহামায়ার জন্ত মনটা কেমন কেঁদে উঠছে। তাকে ছেড়ে আমি স্বর্গে যেতেও যেন পারছি না। এ কি মায়ী দেববাবু, তা কি ক'রে আপনাকে বোঝাব? আহা বেচারী আমার, কত বড় অভিমান নিয়ে আবার এক কথা শতবার ব'লে ব'লে আমাকে কি মায়ী যে ফেলেছে, তা আর কি বলবো দেববাবু! যেদিন আপনার মহল কেনার জন্ত, তার মায়ের সঞ্চিত টাকা চাই, সে দিন আমার মায়ী কি বলেছিল শুনবেন দেববাবু! বললে, 'রাজার খাজনাটা পাঠিয়ে দিন, আর ষাঁর মহল তাঁকে ব'লে পাঠান, সুবিধামত যেন টাকাটা আমাদের ফিরিয়ে দেন।' আমি স্তম্ভিত হ'য়ে গিয়ে জিজ্ঞাসা ক'রেছিলাম, 'তোমার কথা আমি বুঝতে পারছি না মা।' তাতে সে বললে, 'জ্যেঠামশায়, আমি ঠিকই বলেছি। এ সব টাকাকড়ি এতদিন তাঁরই হ'ত, লোকে তা জানে না বলেই মনে করবে যে, সব নিলামে বিক্রী হ'য়ে গেল। এত বড় অপবাদটা তাঁর হ'ক, তা আমার ইচ্ছে নয়।' তখন জ্ঞানবাবুর পরামর্শেই আমি

মহামায়ার নামেই আপনার মহলগুলো কিনে দিয়েছি। তা ষাঁই হোক, এখনও ফেরাবার একটা মাত্র উপায় আছে। আপনি যদি সম্মত হন, তাহ'লে একবার চেষ্টা ক'রে দেখা যায়।”

দেববাবু অনেকক্ষণ পর্য্যন্ত গাঢ় চিন্তা করিয়া শেষে বলিলেন, “পঁচিশ হাজার টাকা দিয়ে মহল ফিরিয়ে নেবার অর্থ আমার কোথায় দেওয়ানজী! তা ছাড়া, আপনিই ত বলেছেন, রাজা হওয়া সহজ, রাজা রক্ষা করাই কঠিন। এ কথাটার আমার মনে এমন বা দিয়েছে যে, আমি সারা জীবনের ভুল বৃত্তে পেরেছি। আর উপায় আছে ব'লে আমার মনে হয় না। তবে যদি ঞায়মত কোনও উপায়ে তা হয়, তাতে আমার অমত নেই। কোন প্রকারে আমি এ বিষয়ে অন্তায়ের সাহায্য নিতে পারবো না। বা অন্তায় করেছি, তারই পরিণামে ইহজীবন ত ভস্মে পরিণত হ'ল। পাপ বাড়িয়ে পরজীবনটাও নষ্ট করতে আমার আর সাহস হয় না।”

“আমায় এত নীচ মনে করবেন না দেববাবু! আজীবন যে কাজে হাত দিয়েছি, তাতেই কৃতকার্য হয়েছি। কেন কৃতকার্য হয়েছি জানেন, কখন মন্দ করিনি ব'লে। আর কাজের খাতিরে যে দিক দিয়ে গেলে লোকের মন্দ না হয়, সেই দিক দিয়ে গেছি ব'লে। লোকের মন্দ কখনও করিনি, কখনও করবো না, ভালর জন্ত যথাসাধ্য চেষ্টা ক'রে এসেছি—আর তাই করবো। সারা জীবনের কর্ম এই এক সুরে বেঁধে নিয়েছি। অন্তরূপ হ'য়ে থাকে ত বলতে পারি নি। গত জীবনের প্রথম সূচনা হ'তে আজ পর্য্যন্ত চেয়ে যতটা দেখতে পাচ্ছি—তাতে কোথাও অভূপির মানি নেই। আপনার কাজে হাত দিয়ে যদি তা হয় ত হবে,

তার জন্ত আমি তৈরী হ'য়ে থাকবো। এত বড় সুদীর্ঘ জীবনে একটা কলঙ্কের রেখাপাতে আমায় আর কত দুঃখ দেবে দেববাবু! যাতে এই এত বড় বংশের কীর্তি লোপের চেয়েও বেশী গ্লানি আসতে পারবে। একটা গোরবের আলো চিরদিনের জন্তে নিভে যাবে, আর আমরা দাঁড়িয়ে দাঁড়িয়ে তাই দেখবো। একটুও চেষ্টা ক'রে দেখবো না, যে, আমরা সেটা বজায় রাখতে পারি কি না?”

“মহতের ইচ্ছাই পূর্ণ হোক—আমি নিমিত্ত মাত্র হ'য়ে, আপনার সব আদেশ বিনা বিচারে পালন করতে প্রস্তুত।”

২২

সূর্য্যদেব কার্ত্তিকের প্রথর রৌদ্রে প্রকৃতির শ্যামলতার উপর ক্লম্ববর্ণের তুলি বুলাইতে বুলাইতে যেন শান্ত হইয়া পড়িয়া পশ্চিমের আকাশে অঙ্গ ঢালিয়া নিদ্রার ক্রোড়ে যাইবার জন্ত ধীর মন্তর গমনে সুদূর গগনপ্রান্তে চলিয়াছেন।

তখন সন্ধ্যার অন্ধকার কাহারও দৃষ্টির উপর নিজের সমাক শক্তি দেখায় নাই। সবে মাত্র গৃহস্থের বধুগণ শঙ্কা লইয়া অতি নিভৃত কক্ষে দাঁড়াইয়া, লজ্জা-রাগ-রঞ্জিত মুখে তাহা বাজাইতে আরম্ভ করিয়াছেন। দেবালয়ের আরত্রিকের প্রথম বাণ বাজিয়া উঠিয়াছে, এমন সময়ে দেববাবু লজ্জার রক্তিম আভা মুখে মাথিয়া তাঁর চির উদ্ধত শিরকে নত করিয়া নারায়ণপুরের সদর কাছারীতে আসিয়া দাঁড়াইলেন।

সদর কাছারীর সকল কর্মচারীই তখন নিজের নিজের কাজ মারিয়া বিশ্রামাঙ্গাপে সময় অতিবাহিত করিতেছিলেন। দেব-

বাবুকে হঠাৎ সন্ধ্যার প্রাকালে একাকী উপস্থিত হইতে দেখিয়া, অভ্যর্থনা করিবার জন্ত বিশ্বয়ের সহিত সকলেই উঠিয়া দাঁড়াইলেন। যথাযোগ্য সম্মান দেখাইতে কোন পক্ষেরই ক্রটি হইল না। সদর নায়েব মহাশয় বাড়ীর ভিতরের চাকর নদেরচাঁদকে ডাকাইয়া ভিতরে সংবাদ দিবার জন্ত বলিয়া দিলেন—“নদেরচাঁদ, মায়েদের নিকট সংবাদ দাও, নয়-আনীর শ্রীযুক্ত বাবু মহাশয় বিশেষ কার্যের জন্ত আসিয়াছেন।”

বহু প্রাচীন প্রথায় শিক্ষিত নদেরচাঁদ শির নত করিয়া মস্তকে দক্ষিণ হস্ত ঠেকাইয়া চলিয়া গেল।

দেববাবু আসন গ্রহণ করিলে পর, সদরের প্রধান প্রধান দুই চারিজন কর্মচারী আসন গ্রহণ করিলেন ও অপর সকলকে বলিয়া দিলেন—“আপনারা ইচ্ছা করিলে এখন নিজের কাজে ঘাইতে পারেন।”

সন্ধ্যার আরতি থামিয়া গেল। নদেরচাঁদ ভিতর হইতে আসিয়া সদর নায়েব মহাশয়কে বলিল, “বাবুকে লইয়া আপনি খাস-কামরায় যেতে পারেন। বাবুর আজ এখানে অবস্থান হবে কি না, ও বাবুর সঙ্গে কয়জন লোক আছে, সে সংবাদ দেবার জন্ত দিদিমণি বলে দিয়েছেন।”

দেববাবু বলিলেন—“আমি একাই আছি। কাজের কথা সারিয়াই চলিয়া যাইব।”

নায়েব মহাশয় হাসিতে হাসিতে বলিলেন—“দয়া ক’রে আজ আমাদের আতিথ্য গ্রহণ করুন। রাত্রে একা আর ফিরে গিয়ে কাজ নাই। সকালে যাবার ব্যবস্থা করলে বিশেষ ক্ষতি হবে কি?”

দেববাবু বলিলেন—“কার্যোদ্ধার যদি হয়, তখন থাকার ব্যবস্থা

করা যাবে। না হ'লে আপনাদের এত বড় বাড়ী থেকে না হয় আমার মত একটা সামান্য অতিথি বিমুখ হ'য়েই ফিরে যাবে।”

নায়েব মহাশয় বলিলেন—“পঁচিশ বছর এখানে কাজ করছি, তার মধ্যে ত বাবু, কাকেও ক্ষুধ হয়ে ফিরে যেতে দেখিনি। চিরদিন যা হ'য়ে আসছে, আজও তাই হবে—আমার এই বিশ্বাস। আজ আর আপনার যাওয়া হবে না। নদেরচাঁদ, বাবুর মুখে যা শুন্লে তাই বাড়ীতে বল গে।”

কাছারীবাড়ীর পার্শ্বে ই অন্তর-বাড়ীর সহিত সংলগ্ন দ্বিতলের উপর খাস-কামরা। নায়েব মহাশয়ের সঙ্গে দেববাবু সেই কক্ষে প্রবেশ করিয়া দেখিলেন, একদিকে বিস্তৃত ঢালু বিছানা পাতা রহিয়াছে। অপরদিকে একটি আসনের সম্মুখে একখানি গরদের কাপড় ও সন্ধ্যা-আহ্নিকের সমস্ত আয়োজন করা রহিয়াছে। সন্ধ্যা-আহ্নিকের আসনের পার্শ্বে অপর একখানি আসনও বিস্তৃত রহিয়াছে। তাহার সম্মুখে কিছুই নাই। কক্ষটির চারিদিকে চাহিয়া দেখিলেই মনে হয় যেন ইহা একটি প্রকাণ্ড লাইব্রেরী। চারিপার্শ্বেই বড় বড় আলমারি-ভরা বই। আলমারির মাথার উপর একটানা কাঠের তক্তার উপর সাজাইয়া সাজাইয়া যত সব মহলের কাগজ-পত্রের দপ্তর রহিয়াছে। প্রত্যেক দপ্তরের উপর হইতে একটি একটি মোটা কাগজের টিকিট ঝুলিতেছে; তাহাতে মহলের নাম, খাতার নম্বর, সন, তারিখ দেওয়া রহিয়াছে। দেববাবু চারিদিক ঘুরিয়া আসিয়া বিছানার উপর বসিলেন। নায়েব মহাশয়ও তাঁহার পার্শ্বে বসিলেন। কিছুক্ষণ এইভাবে কাটিয়া গেল, কেহুই কোন কথা কহিলেন না। অবশেষে নায়েব

মহাশয় বলিলেন—“জামা কাপড় ছাড়িয়া হাত-মুখে জল দিন। সন্ধ্যা-আহ্নিক করা হয় কি?”

“আগে হত না। এই পাঁচ ছয় দিন আবার নূতন করিয়া আরম্ভ করিয়াছি।”

“সন্ধ্যা-আহ্নিক সারিয়া লউন। আমি আহ্নিক সারিয়া এখনই আসিতেছি।”

“আপনি সত্বর আসিবেন।” বলিয়া দেববাবু জামা কাপড় ছাড়িয়া হাতমুখ ধুইয়া সন্ধ্যার আসনে বসিলেন।

সন্ধ্যা হইতে উঠিয়া দেখিলেন, পার্শ্বের আসনে জলথাবারের ত্রিনিস-পত্র সাজান রহিয়াছে।

কাহার জন্ত এ সব আয়োজন ইহা বুঝিলেও, কেহ না বলিলে দেববাবু বসেন কি করিয়া? এমন সময় আর এক প্রস্থ জলথাবার আনিয়া, একজন পরিচারক নদেরচাঁদকে ডাকিয়া বলিল—“নায়েব মহাশয়েরও ঠাই এখানে করে দাও।” দেববাবুকে বলিল—“আপনি জলযোগ করুন।” এই কথা শেষ হইতে না হইতে নায়েব মহাশয় আসিয়া দেববাবুকে আসনে বসিতে অনুরোধ করিয়া, নিজে অপর আসনে বসিলেন। দেববাবু আসনে বসিয়াই বলিলেন—“আচ্ছা নায়েব মশায়, আমার আসার কথা আপনারা কেউ কি আগে শুনেছিলেন? এত আয়োজন এই সময়ের মধ্যে হওয়া, এই অজ পাড়াগাঁয়ে সম্ভব বলে মনে কর্তেই পারছি না।”

“ঠাকুর-সেবার প্রতিদিনই এমন ব্যবস্থা আছে।”

নান্ন কথা কহিতে কহিতে জলযোগ সমাধা করিয়া দেববাবু বলিলেন—“নায়েব মশায়, আমার উদরের তৃপ্তির মত মনের তৃপ্তি যাতে হয়, তার ব্যবস্থা কি করছেন?”

“আপনার আদেশ পেলেই সংবাদ দিই। এখানে বসেই সব কথা হবে।” এই বলিয়া নায়েব মহাশয় বামনকে ডাকিলেন, “বামন, তোমার মাকে বল, খাস-কামরায় নয়-আনীর বাবু জলযোগ সেরে আপনার অপেক্ষা করছেন।”

বামন চলিয়া গেলে, দেববাবু হাসিতে-হাসিতে বলিলেন,— “নায়েব মহাশয়, এখানে আমি সবই অদ্ভুত দেখছি। আপনাদের এই নদেরচাঁদ তেকেলে বুড়া, মাথার চুল সব সাদা হয়ে গেছে, তবুও কাজ করছে। মাথার সাদা চুল দেখেই যা মনে হচ্ছে বুড়া। কিন্তু দেহের গঠন যেন যুবাব মত। আর এই বামন, এ নামেও যা, আকারেও তা। তারও মাথার সাদা চুল পিঠে এসে পড়ে কি বাহারই হয়েছে। কিন্তু চাউনিটা কি তীক্ষ্ণ, যেন মনের ভেতর পর্যন্ত দেখতে চেষ্টা করছে। তার পর যত সব বুড়া লোকে—এই আপনাদের কাছারীতে পূর্ণ, তাও দেখে এলাম। এদের নিয়ে কি করে, এত বড় মহল নির্বিবাদে চলছে বলুন দেখি? অবশ্য আপনি মনে অণু ধারণা করবেন না। আপনাদের মত এই এতগুলি প্রবীণ একসঙ্গে এর আগে আর দেখিনি, তা নয়; হয় ত দেখেছি, কিন্তু এক কাজের মধ্যে দেখিনি। সকলেই কি বরাবর আছে?”

“বেশীর ভাগ তাই বটে। আমাদের দেওয়ানজী আজ-কালকার শিক্ষিত অপেক্ষা বহুদর্শী প্রবীণ লোকই পছন্দ করেন। তাঁর ধারণাই হচ্ছে—লেখাপড়া বেশী জানুক আর নাই জানুক, অনেক দেখেছে—অনেক শুনেছে, অথচ সরল ও সত্য ব্যবহারে অভ্যস্ত, এমন মানুষকেই কাজের লোক করে তোলা যায়। আর ভাষায় পণ্ডিত, লোককে মুখের দৌড়ে যত বড়াই দেখা যাক

না কেন, কাজে তত পাওয়া যায় না। তাই এখানে দেওয়ানজীর ব্যবহার যিনি একবার মাত্র পেয়েছেন তার আর বার হবার উপায় নাই। তাঁর আদরের অত্যাচারেই আমরা এখানে বুড়ো হয়ে গেলাম বাবু। তিনি যে শুধু আমাদের মত বুড়োই পছন্দ করেন, তা নয়; ছেলেদের মধ্যে যারা খুব সাহসী, যারা গায়ের জোরে—মনের তেজে একটা কিছু উচিত কাজ করতে ভয় পায় না, তাদের তিনি যেন মাথায় করে নেচে বেড়াতে পেলে বাঁচেন। যে যাই করুক না—এই সারা গায়ের ছোট বড় সব ছেলেরাই তাঁর কাছে সব কথাই অসঙ্কোচে বন্বার জন্ত ছুটে আসে। সকালে দেখতে পাবেন, গ্রামের প্রত্যেক ঠাকুর-বাড়ীতে গ্রামের প্রত্যেক ছেলোট প্রণাম করে বেড়াবে। তাঁর এই সাঙ্ঘিক শিক্ষায় এমন অদ্ভুত হয়ে দাঁড়িয়েছে; তাঁর নামে কেমন সব নেচে উঠে। এই ক’দিন তাঁকে দেখতে না পেয়ে যেন সবাই মনমরা হয়ে গেছে।”

যখন এই প্রকার কথাবার্তায় তাঁরা উভয়ে অগ্রমনস্ক, তখন ঘরের ঠিক মধ্যস্থলে নদেরচাঁদ একটি পর্দা টানিয়া দিয়া গেল। পর্দা টানার শব্দ শুনিয়া নায়েব মহাশয় বলিলেন, “মায়াদেবী আসছেন, আপনার যাহা কিছু বক্তব্য বলতে পারেন। আমি পাশের ঘরেই আছি। দরকার হলেই ডেকে পাঠাবেন।” এই বলিয়া নায়েব মহাশয় পাশের ঘরে চলিয়া গেলেন।

পর্দার যে দিকে মহামায়া ও ঝি আসিয়া দাঁড়াইল, সে দিকের আলো পূর্বেই নিবাইয়া দেওয়া হইয়াছিল। দেববাবু যেমন বিছানায় বসিয়াছিলেন, তেমনই বসিয়া রহিলেন।

পর্দার পার্শ্বে দাঁড়াইয়া ঝি বলিল, “দিদিমণি বলছেন, কাছারীতে

আপনি যে পত্র দিয়েছিলেন, সে পত্র উনি দেখেছেন। কিন্তু সে সম্বন্ধে কি করা যুক্তিসঙ্গত, আপনার নিকটেই উনি তাঁর পরামর্শ চাচ্ছেন।”

দেববাবু বলিলেন, “নায়েব মশায়, আমার পত্রের উত্তরে নায়েবকে লিখেছেন—‘ধাবতীয় বৈষয়িক কার্যের ভার আপনার উপর। বিশেষ আপনার এই নূতন নিলাম-খরিদা মহলের ভার এখনও কারও উপর দেন-নি, সে সম্বন্ধে সাক্ষাতে সব কথা হওয়াই সঙ্গত।’ এই কথা শুনেই আমি আপনার নিকট এসেছি। এ ক্ষেত্রে আমার পরামর্শ কি থাকতে পারে? আর আমার সব কথাই বলে পাঠিয়েছি। কার্যোদ্ধার না হলে আমার মত একটা সামান্য অতিথি বিমুখ হয়ে ফিরে যাবে; এ কথাতেও কি আমার সব বলা হয়নি?”

এবার মহামায়া বড় করুণ-কণ্ঠে পর্দার আড়াল হইতে বলিল, “অতিথি হয়েও যদি কিছুমাত্র অসন্তোষ আনেন, তা হ’লে আমাদের অকল্যাণ করা হয় যে। আমার বলার দোষে যদি আপনি অন্তরকম বুঝে থাকেন, তার জগু আমি একশ’ বার আপনার কাছে মাপ চাইছি। আমার অভিভাবক হিসাবেই আপনার নিকট এ সম্বন্ধে যদি সঙ্গত পরামর্শ চাই, তাতে আমার কিছু অগ্রায় করা হয় কি?”

“এ কি কথা? আমার সে সৌভাগ্য যদি কখনও হয়, তখন এর উত্তর আমি দেব। এখন আমি যথাসর্বশ্ব হারিয়ে পথের কাঙ্গালের অধম হয়েছি। তার উপর বুদ্ধির দোষে যা নষ্ট হয়ে গেছে, তাই আজ অপরের দয়ায় ফিরে পাব এই আশা করে এসেছি। এখন আমি কি পরামর্শ দেব?”

“এ আর এমন কি শক্ত কথা। আপনি মনে করুন না, আমার মহল সব বিক্রী হয়ে আপনার হাতে এসেছে। আর আপনার কাছে আমি আমার মহল-মজকুরা—আমার যা কিছু সবই ফিরিয়ে চাচ্ছি।”

“দেখ, ঠিক এই অবস্থায় পড়লে, আমি যা বর্তমান সেটা না শোনাই উচিত। কারণ বুঝতেই পারছ যে, এই মহল ফিরিয়ে নিতে আসার সঙ্গে সঙ্গে আমার মনে আরও বড়-বড় সু কি কু ঠিক জানি না, একটা অভিসন্ধি ছাইয়ে ঢাকা আগুনের মত লুকানো রয়েছে। সকলেই প্রথমে মনে মনে কাজের একটা সূচনা করে, পরে কথায় বলে, তার পর কাজে করে। আমারও মনে যেটার সূচনা হয়েছে, সেটা কথায় বা কাজে হবে কি না জানি না, যদি একান্তই শুনতে চাও, তবে শোন। আমার কাছে ঠিক এই অবস্থায় তুমি গেলে, বর্তমান—‘বিবাহ করে আমায় তোমারই করে নাও। আমার যা কিছু সবই তোমার হক; তোমার যা কিছু সবই আমার হক’।”

মহামায়া এবারে দৃঢ় অথচ ঈষৎ আক্ষেপের স্বরে বলিয়া উঠিল, “মানুষ এত অধঃপাতে না গেলে, বুঝি তার এমন ভাবে লক্ষী ছাড়ে না। যাক্, আপনি আপনার মনের কথাই যে সত্য বলেছেন, তার জন্তু আপনাকে শত ধন্যবাদ! আমি এর আগে বাবার কাছে শুনেছিলাম, আপনার কল্কাতায় বিয়ে হয়ে গেছলো না?”

“বিয়ে হয়নি, তবে বিয়ের সব কথা ঠিক হয়ে গেছলো বটে।”

“কেন সেখানে বিয়ে হ’ল না, এ কথা বলতে আপনার কোন বাধা আছে কি?”

“বাধা আর এমন কি ? তবে সে সব কথা, তোমার না শোনাই ভাল, আর শুনেও কোন লাভ নেই ত ?”

“লাভ-লোকমান ভেবে কি আমরা সব কাজ করি—না কব্ছি। এই যে আপনি একজন সম্ভ্রান্ত বংশের কুমারীকে আপনার বিষয় সম্পত্তি দিয়েও বিয়ে করতে চান বলে মনের কথা প্রকাশ করে বলেন, এতে আর আপনার লাভ কি হ’ল ? কিন্তু একজনের মানের বিশেষ হানি হ’ল। যাক্, ও কথা ছেড়ে দিন। আমার ওটা শোন্বার বিশেষ আগ্রহ হচ্ছে যে, সব ঠিক হয়েও কেন বিয়ে হ’ল না ? অথচ, আপনার অন্তরঙ্গ যারা, তাঁরাও জানেন, আপনার বিয়ে হয়ে গেছে। আর তাঁদেরও বন্ধুবান্ধব হিসাবেই আমরাও তাই জানি।”

“মহামায়ার সঙ্গে তোমার আলাপ আছে না-কি ?”

“শুধু আলাপ ! তাঁর কথা আমি যত জানি, বোধ হয় এত আর কেউ জানে না।”

“কখনও তোমায় সেখানে দেখিনি ?”

“দেখেন নি তাই রক্ষে ! তা হ’লে আবার একটা বিস্ত্রী ব্যাপার না হয়েই কি যেত ?”

“কেন ? এমন আইবুড় ছেলে-মেয়ের কত সম্বন্ধ হয় যায়। দেখা হলে এমন আর কি দোষ হ’ত ?”

“বেশী আর কি, যেমন মহামায়ার হয়েছে।”

“কেন মহামায়ার কাছে আমি এমন আর কি দোষ কব্ছি, যার জন্ত একটা বিস্ত্রী ব্যাপার হয়েছে, বল্ছো ?”

“আর বাকিই বা কি ? হিন্দুর ঘরের—ব্রাহ্মণের ঘরের মেয়ের বাক্দানের পর আর বিয়েই হ’তে পারে না। এ ছাড়া আপনাদের

বিয়ের প্রায় সবই হয়েছিল—মাত্র মন্ত্র ক'টা পড়া হয়নি এই ত ? আপনার দোষ কি, তবে শাস্ত্রকারগুলো এ সব পাপের যা শাস্তি বলে গেছেন—তাতে আপনার মত লোক ভয় পান না এই যা দোষ । আর সব দোষের সেরা দোষ—তার কপাল ।”

“তুমি রাগ করো না । এ দোষ শুধু আমার একার নয় । দোষ আমাদের দু'জনেরই আছে । আমি অভিমানে অন্ধ হয়ে চলে এসেছি, সেও অভিমানে অন্ধ হয়ে আমায় ডাকেনি ।”

“কিন্তু আজ আপনি সে সব ভুলে গিয়ে, অপরের বাক্দত্তা পত্নীকে গ্রহণ করতে কুণ্ঠিত নন । রূপমুগ্ধ হয়ে আপনি কত বড় অনায়াস না করেছেন, দেখুন দেখি । এর ঞ্চায়বিচার আমি আপনারই মনুষ্যত্বের নিকট প্রার্থনা করছি । আপনি বলুন, এখন আপনার, আমার—মহামায়ার কার কোন্ পথে দাঁড়ান উচিত ?”

“আমার এ বিচারে অধিকার নাই । আমি এর বিচার করতে পারি না । আমি সারাজীবন অহঙ্কারে অন্ধ হয়ে পরের ভুলই দেখে এসেছি, কখনও নিজের ভুলের দিকে চেয়েও দেখিনি । চিরদিন নিজেকে অভ্রান্ত বলে মনে-মনে ধারণা করে এসেই আমার এই অধঃপতন । তোমার হৃদয়ের মত বল আমারও হৃদয়ে যাতে হয়, তার জন্ম ভগবানের নিকট প্রার্থনা কর । তুমি আমায় ক্ষমা কর । আর বলে দাও, মহামায়া কোথায় ? আমি তাহার নিকটও ক্ষমা চাহিব ।”

মহামায়া এখন আর কি করিয়া বলিবে যে, এই তোমারই সম্মুখে দাঁড়াইয়াই সে তাহারই স্বামীর পরীক্ষা করিতেছে । স্বামীকে বিশুদ্ধতার অগ্নিতে পোড়াইয়া নিজের অশ্রুতে অভিষিক্ত করিয়া লইতেছে । তোমারই ধ্যানে জীবন কাটাওয়াও, আজ

তোমারই সান্নিধ্যে আসিতে পারিতেছে না। তুমি তাহাকে ডাকিয়া লও—সে যে তোমার ক্ষণিক চাঞ্চল্যের ফলে, কর্তব্যের পথে দাঁড়াইয়াও অভিমানে যেমন তোমার পরীক্ষা করিতে আসিয়াছে—তেমনই তাহা অসম্পূর্ণ রাখিতে বাধ্য হইল। নারী-হৃদয় লইয়া কি স্বামীর পরীক্ষা করা চলে? ওগো অন্তর্যামী দেবতা, তুমিও তাহাকে ক্ষমা করিও।

এমন সময়ে দেওয়ানজী মহামায়ার হাত ধরিয়া সেখানে আসিয়া বলিলেন, “দেবনারায়ণ, আজ যাহার নিকট তোমার মনের ভ্রম দুচিয়া গেল—আজ যে তোমাকে ধর্মের পথে টানিয়া আনিল—সেই তোমার ভাবী সহধর্মিণী, এই মহামায়া। মা, মহামায়া আজ তোদের আশীর্বাদ করি, সম্পদে-বিপদে, সুখে-দুঃখে, বিচ্ছেদশূন্য হয়ে অনন্তকাল স্বামিসুখ ভোগ কর, আর দেশের ও দেশের সেবা কর। স্বামীর প্রকৃত সহধর্মিণী হয়ে প্রকৃত সৌভাগ্যশালিনী হও।

“এস দেবনারায়ণ, এস মা মহামায়া, তোমাদের আশীর্বাদ করবার জন্ত জ্ঞানবাবু ও সদাশিববাবু বাড়ীর মধ্যে এখনই আসছেন। তাঁরা এইমাত্র কলকাতা থেকে এলেন। এ সংবাদে তাঁরা যে কি পর্য্যন্ত আনন্দিত হয়েছেন, তার আর কি বলব।”

দেববাবু বলিলেন, “আমিও এই সময় মায়াকে আশীর্বাদ করে যেতুম। তিনিই ত একদিন আমারই পিতামহের বংশের কুললক্ষ্মী হয়ে—আমারই কনিষ্ঠের গৃহলক্ষ্মী হয়ে—আমাদের একমাত্র বোমা হয়ে, আমাদের বাড়ী যাবেন।”

মায়া দূর হইতে এই কথা শুনিয়া লজ্জায় আরক্ত মুখে দেববাবুর নিকট আসিয়া ভূমিষ্ঠ হইয়া সকলকে প্রণাম করিল।

দেববাবু আশীর্বাদ করিলেন—“মা, স্বর্গ যেমন স্থির—পৃথিবী যেমন স্থির—সমস্ত জগৎ যেমন স্থির—এই পর্বত সকল যেমন স্থির, সেইরূপ তুমি তোমার পতিকুলে স্থির হইয়া থাকিও।”

দেওয়ানজী উচ্চ হাস্য করিয়া বলিলেন—“চিরদিনটা তোকে ‘মা, মা,’ বলে ডেকে এসেছি, তাতে তোর এমন হাসিমুখ দেখতে পাইনি। আজ যেমন ভাসুরের মুখে ‘মা’ ডাক শুন্তে পেয়েছি, অমনি হাসিমুখে ছুটে এসে প্রণাম করছি। ওগো তোমরা সকলে দেখ, এই মেয়ের জাতটা—এই মায়ের জাতটা কেমন হাসিমুখে বুড়া ছেলের মায়ী কাটিয়ে কোলের ছেলেকে কোলে তুলে নিচ্ছে। তা হ’লে আর এ বন্ধ দেওয়ানজীর প্রয়োজন নাই; এতকাল যে আশায় এই সব নিয়ে কাটিয়েছি, তা সার্থক হয়ে গেল। এইবার দেওয়ানজীর ছুটী! এখন যে দেশে যাব, সেখানে ত আর দেওয়ানী মিলবে না—সামান্য একটা পাইকগিরী পেলেই কৃতার্থ হয়ে যাব। এখন সেই চেষ্টাই দেখতে হবে,—দেওয়ানী আর নয়!”

সকলে একবাক্যে বলিয়া উঠিল, “আপনার জন্ত সে-পারেও কাজ ঠিক হয়ে রয়েছে;—সেখানেও আপনি

“দেওয়ানজী।”

জ্ঞানানন্দবাবুর অন্তঃপুর-সংলগ্ন সুসজ্জিত উদ্যানে স্বভাব-সুন্দর বনিষ্ঠ এক তরুণ যুবক একটি পাঁচ বৎসরের সুন্দর নধর শিশুর হাত ধরিয়া বেড়াইতেছিল। উদ্যান পরিভ্রমণ করিতে করিতে একটি কৃষ্ণ প্রস্তর নির্মিত বেদীর নিকটে আসিয়া সেই

তরুণ যুবক তীক্ষ্ণদৃষ্টি দিয়া তাহার উপর কি যেন পড়িতে পড়িতে আপন মনেই হাসিতে লাগিল। দশ বৎসর পূর্বে তাহারই শ্রীহস্তুর লেখা যাহা কালের বশেই অস্পষ্ট হইয়া মুছিয়া যাইতেছিল, কতকগুলি ফুল তুলিয়া লইয়া তাহার উপর ছড়াইয়া স্পষ্ট করিয়া ফুলের লেখা করিয়া দিল—“আজ যে দিদি হ’য়ে রাগ কচ্ছে—সেই একদিন বৌদিদি হয়ে সেধে সেধে কথা কইবেই।”

এমন সময় মায়াদেবী প্রাতরাশের জন্ত নিজের শিশুপুল নিরঞ্জন ও দেবর সূধীরকে ডাকিতে আসিয়া দূর হইতে সূধীরের এই কীর্তি দেখিয়া বলিয়া উঠিল—“ও বেদবাক্য ত লজ্বন হয় নি ; ওর কোন কথাই ত ভুল হয় নি। এখন স্বাক্ষরটা হয়ে যাক, ওটা আর বাকী থাকে কেন ? ঠাকুরপো ! আচ্ছা যাহোক তুমি ! এখনও ও-কথা ভোল নি ? এখন ওসব ছেলেমানুষী ছেড়ে দিয়ে গোকাকে নিয়ে থাকে এস ভাই !”

সূধীর হাসিতে হাসিতে বলিয়া উঠিল—“আমি আড়ি দেওয়া লোকের সঙ্গে কথা কব না, থাক না !” তারপর খোকাকে ডাকিয়া বলিল, “ওরে খোকামণি, তোর মাকে বল, আমাদের এখনও গুরুপ্রণাম হয়নি।”

তখন সেই হরিণশিশুর মত চঞ্চল, সদা প্রফুল্ল, দেবোপম কাণ্ডিতে উদ্ভাসিত বালক আপন মনে খেলিতে খেলিতে নাচিতে নাচিতে হাসিতে হাসিতে কতকগুলি ফুল ছিঁড়িতেছে, আর সেই উপহার রত্ন-সমূহ লইয়া সূধীরের হাতে এক একটি দিতে দিতে বলিতেছে—“কাকা, এ ফুল তোমার, এ ফুল বাবার, এ ফুল মা-মণির, আর এই বড় ফুলটি আমার দাদামণির।”

এমন সময় বৃদ্ধ দেওয়ানজী সেই স্থানে আসিয়া বলিলেন—

‘আর তোর দাছকে ভাই মায়ার ডোরে বাঁধিস্ নি। এবার আমায় ছুটি দে। পরপারের ভাবনা ভাবতে দে—আর ধরে রাখিস্ নে ভাইটি আমার।’

‘আমি যেতে দেব না। কাকা যাবে না। তুমি দাছ আমার, লক্ষ্মী আমার, আমায় ছেড়ে যাবে না। তুমি যাবে ত আমার পূজার ঠাকুর কে হবে দাছ! বস দাছ, পূজো করি দাছ।’ তারপর সেই সুন্দর দেবশিশু, বৃদ্ধ দেওয়ানজীর পায়ের উপর মাথা রাখিয়া সাষ্টাঙ্গে প্রণিপাত করিতে করিতে অতি মধুর কণ্ঠে বলিতে লাগিল—

‘অথগুমগুলাকারং ব্যাপ্তং যেন চরাচরং।

তৎপদং দর্শিতং যেন তস্মৈ শ্রীগুরবে নমঃ ॥

অজ্ঞানতিমিরাক্তস্ত জ্ঞানাজনশলাকয়া

চক্ষুরন্মীলিতং যেন তস্মৈ শ্রীগুরবে নমঃ ॥’

দেওয়ানজী সুধীরের দিকে চাহিয়া হাসিতে হাসিতে বলিলেন, ‘সুধীর, খুড়ো ভাইপোয় মিলে-মিশে আমায় কি অমর ক’রে বেঁধে রেখে দেবে বাবা? ছেড়ে দাও আর কেন, আমার যে সময় ফুরিয়ে এসেছে—পারে যাবার বেলা যে বয়ে যায়।’

সুধীর হাসিতে হাসিতে বলিল, ‘দেওয়ানজী, বাঙ্গলা ছেড়ে—আমাদের ছেড়ে কোথায় যাবেন? আপনার মত লোক যদি মুক্তির পথে যেতে—কর্মের সাধনা করতে বাঙ্গলার বাহিরে যায়, তা হ’লে বাঙ্গলার আজ বড় দুর্ভাগ্য। এই সুজলা সুফলা শস্ত-শ্রামলা বাঙ্গলায় কি না আছে, কে না এর কোলে বসে পরমানন্দ পেয়েছে। মহর্ষি ব্যাস, বশিষ্ঠ প্রভৃতি অনেকেই যে সারা ভারত প্রদক্ষিণ করে শেষে আমাদের এই মাতৃস্বরূপা বঙ্গভূমির কোলে বসেই—সৎ-চিৎ-আনন্দ হয়ে গেছেন। এই বঙ্গেরই তাঁরা শেষ

সমাধি নিয়ে আমাদের মায়ের কোল উজ্জল ক'রে দিয়ে গেছেন। এমন সিদ্ধপীঠে পূর্ণ বাঙ্গলার মত সাধনার স্থান ছেড়ে আপনার অন্ত্র যাওয়া হতেই পারে না।”

দেওয়ানজী বলিলেন—“আমি যেন তেমনি করে এখানেই আমার মাকে দেখতে পাই। হে ভগবান্, আমার শেষ সমাধি যেন এই সোণার বাঙ্গলাতেই হয়।”

প্রভাত সমীরণের সুখস্পর্শ প্রবাহকে আরও সুখকর করিয়া তুলিবার জন্ত কে একজন সেই সময় মায়া ও মহামায়া দেবীর প্রতিষ্ঠিত “সনাতন আশ্রম” হইতে অতি সুমধুর স্বরে গায়িতেন—

“ধনধান্ত পুষ্পভরা আমাদের এই বসুন্ধরা,

তাহার মাঝে আছে দেশ এক—সকল দেশের সেরা ;—

ও সে, স্বপ্ন দিয়ে তৈরি সে দেশ, স্মৃতি দিয়ে ঘেরা,

ভায়ের মায়ের এত স্নেহ কোথায় গেলে পাবে কেহ

—‘ও মা তোমার চরণ দুটি বক্ষে আমার ধরি’,

আমার এই দেশেতে জন্ম—যেন এই দেশেতে মরি—

এমন দেশটি কোথায় খুঁজে পাবে নাক তুমি,

সকল দেশের রাণী সে যে—আমার জন্মভূমি।”

সেই সময় ভাবগুণ্ড অতিবৃদ্ধ দেওয়ানজী সাক্ষ-নয়নে গলগলী-কৃতনাস হইয়া প্রণাম করিতে করিতে বলিলেন—

“জননী জন্মভূমিচ্চ স্বর্গাদপি গরীয়সী।”

সমাপ্ত

শ্রদ্ধকার প্রণীত অভিনব গল্পপুস্তক

ব্রাহ্মণ-পরিবার—।।

— আট-আনা-সংস্করণ-গ্রন্থমালা —

মূল্যবান্ সংস্করণের মতই কাগজ,

ছাপা, বাঁধাই প্রভৃতি সর্বস্বচ্ছন্দর।

—আধুনিক শ্রেষ্ঠ লেখকের পুস্তকই প্রকাশিত হয়।—

বঙ্গদেশে যাহা কেহ ভাবেন নাই, শুনে নাই, আশাও করেন নাই। আমরাই ইহার প্রথম প্রবর্তক। বিলাতকেও হারমানিতে হইয়াছে—সমগ্র ভারতবর্ষে ইহা নূতন সৃষ্টি! বঙ্গসাহিত্যের অধিক প্রচারের আশায় ও বাহাতে সকল শ্রেণীর ব্যক্তিই উৎকৃষ্ট পুস্তক-পাঠে সমর্থ হন, সেই মহা উদ্দেশ্যে আমরা এই অভিনব 'আট-আনা-সংস্করণ' প্রকাশ করিয়াছি। প্রতি বাঙ্গালা মাসে একখানি নূতন পুস্তক প্রকাশিত হয় :—

মফস্বলবাসীদের সুবিধার্থ, নাম রেজেষ্ট্রি করা হয়; গ্রাহকদিগের নিকট নবপ্রকাশিত পুস্তক, ভিঃ পিঃ ডাকে ১১/০ মূল্যে প্রেরিত হইবে; প্রকাশিত-গুলি একত্র বা পত্র লিখিয়া সুবিধানুযায়ী পৃথক পৃথকও লইতে পারেন।

গ্রাহকদিগের কোন বিষয় জানিতে হইলে, "গ্রাহক-সম্বন্ধ" সহ পত্র দিতে হইবে।

এই গ্রন্থমালার প্রকাশিত হইয়াছে—

- ১। অঙ্গাগী (৫ম সংস্করণ)—শ্রীজলধর সেন।
- ২। ধর্মপাল (২য় সংস্করণ)—শ্রীরাখালদাস বন্দ্যোপাধ্যায় এম, এ।
- ৩। পক্ষীসমাজ (৫ম সংস্করণ)—শ্রীশরৎচন্দ্র চট্টোপাধ্যায়।
- ৪। কাঞ্চনমালা (২য় সং)—মহামহোপাধ্যায় শ্রীহরপ্রসাদ শাস্ত্রী এম, এ।
- ৫। বিবাহবিপ্লব (২য় সংস্করণ)—শ্রীকেশবচন্দ্র গুপ্ত এম, এ, বি, এল।
- ৬। চিত্রালী (২য় সংস্করণ)—শ্রীস্বধীননাথ ঠাকুর।
- ৭। দুর্ঘাটন (২য় সংস্করণ)—শ্রীবতীন্দ্রমোহন সেন গুপ্ত।

- ৮। শাশ্বত-ভিখারী (২য় সং)—শ্রীরাধাকমল মুখোপাধ্যায় এম, এ ।
- ৯। বড় বাড়ী (৩য় সংস্করণ)—শ্রীজলধর সেন ।
- ১০। অরক্ষণীয়া (৩র্থ সংস্করণ)—শ্রীশরৎচন্দ্র চট্টোপাধ্যায় ।
- ১১। মধুশ্র (২য় সংস্করণ)—শ্রীরাধালদাস বন্দ্যোপাধ্যায় এম, এ ।
- ১২। জত্য ও যিথ্যা (২য় সংস্করণ)—শ্রীবিপিনচন্দ্র পাল ।
- ১৩। রূপের বাসাই (২য় সংস্করণ)—শ্রীহরিসাধন মুখোপাধ্যায় ।
- ১৪। সোণার পদ্ম (২য় সং)—শ্রীসরোজরঞ্জন বন্দ্যোপাধ্যায় এম, এ ।
- ১৫। লাইকা (২য় সংস্করণ)—শ্রীমতী হেমলিনী দেবী ।
- ১৬। আলোয়া (২য় সংস্করণ)—শ্রীমতী নিরুপমা দেবী ।
- ১৭। বেগম অমরু (সচিত্র)—শ্রীব্রজেন্দ্রনাথ বন্দ্যোপাধ্যায় ।
- ১৮। মকল পাঞ্জাবী (২য় সংস্করণ)—শ্রীউপেন্দ্রনাথ দত্ত ।
- ১৯। বিজ্ঞদল—শ্রীযতীন্দ্রমোহন সেন গুপ্ত ।
- ২০। হাল্দার বাড়ী—শ্রীমুনীন্দ্রপ্রসাদ সর্কাধিকারী ।
- ২১। মধুপর্ক—শ্রীহেমেন্দ্রকুমার রায় ।
- ২২। লীলার স্বপ্ন—শ্রীমনোমোহন রায় বি-এল ।
- ২৩। সুরেশ্বর ঘর (২য় সংস্করণ)—শ্রীকালীপ্রসন্ন দাশগুপ্ত এম, এ ।
- ২৪। মধুমল্লী—শ্রীমতী অশুরুগা দেবী ।
- ২৫। রঙ্গির ডায়েরী—শ্রীমতী কাকনমালা দেবী ।
- ২৬। ফুলের ভোড়া—শ্রীমতী ইন্দিরা দেবী ।
- ২৭। ফরাসী বিপ্লবের ইতিহাস—শ্রীহরেন্দ্রনাথ ঘোষ ।
- ২৮। জীমন্তিনী—শ্রীদেবেন্দ্রনাথ বহু ।
- ২৯। নব্য-বিজ্ঞান—অধ্যাপক শ্রীচারুচন্দ্র ভট্টাচার্য্য এম, এ ।
- ৩০। নববর্ষের স্বপ্ন—শ্রীসরলা দেবী ।
- ৩১। নীলমাণিক—রায় সাহেব শ্রীদীনেশচন্দ্র সেন বি, এ ।
- ৩২। হিন্দাব নিকাশ—শ্রীকেশবচন্দ্র গুপ্ত এম, এ, বি, এল ।
- ৩৩। মায়ের প্রসাদ—শ্রীবীরেন্দ্রনাথ ঘোষ ।
- ৩৪। ইংরাজী কাব্যকথা—শ্রীশান্তোষ চট্টোপাধ্যায় এম এ ।

- ৩৬। জলছবি—শ্রীমণিলাল গঙ্গোপাধ্যায় ।
- ৩৭। শয়তানের দাম—শ্রীহরিসাধন মুখোপাধ্যায় ।
- ৩৮। ব্রাহ্মণ-পরিবার—শ্রীরামকৃষ্ণ ভট্টাচার্য্য ।
- ৩৯। পথে-বিপথে—শ্রীঅবনীন্দ্রনাথ ঠাকুর, সি, আই, ই ।
- ৪০। হরিশ ছাণ্ডারী (২য় সংস্করণ)—শ্রীজলধর সেন ।
- ৪১। কোন্ পথে—শ্রীকালীপ্রসন্ন দাশগুপ্ত এম, এ ।
- ৪২। পরিণাম—শ্রীগুরুদাস সরকার এম, এ ।
- ৪৩। পক্ষীরাণী—শ্রীযোগেন্দ্রনাথ গুপ্ত ।
- ৪৪। ভবানী—নিত্যকৃষ্ণ বসু ।
- ৪৫। অমিয় উৎস—শ্রীযোগেন্দ্রকুমার চট্টোপাধ্যায় ।
- ৪৬। অপরিচিতা—শ্রীপার্বলাল বন্দ্যোপাধ্যায় বি, এ ।
- ৪৭। প্রত্যাবর্তন—শ্রীহেমেন্দ্রপ্রসাদ ঘোষ ।
- ৪৮। দ্বিতীয় পক্ষ—ডাঃ শ্রীনরেশচন্দ্র সেনগুপ্ত, এম-এ, ডি-এল ।
- ৪৯। ছবি—শ্রীশরৎচন্দ্র চট্টোপাধ্যায় ।
- ৫০। মনোরমা—শ্রীসরসীবালা বসু ।
- ৫১। অরেশের শিক্ষা—শ্রীবসন্তকুমার চট্টোপাধ্যায় এম-এ ।
- ৫২। নাচ ওয়ালী—শ্রীউপেন্দ্রনাথ ঘোষ এম-এ ।
- ৫৩। প্রেমের কথা—শ্রীললিতকুমার বন্দ্যোপাধ্যায়, এম-এ ।
- ৫৪। পৃহহারী—শ্রীবিভূতিভূষণ বন্দ্যোপাধ্যায় ।
- ৫৫। দে ওয়ালী—শ্রীরামকৃষ্ণ ভট্টাচার্য্য
- ৫৬। কাঙ্গালের ঠাকুর—শ্রীজলধর সেন (বহুহ)

গুরুদাস চট্টোপাধ্যায় এণ্ড সন্স,

২০১, কর্ণওয়ালিস্ স্ট্রীট, কলিকাতা ।

